


萬善花室文稿



叢書集成

初編

主編 王雲五

商務印書館發行



稿文室花善萬

(一)



3 0646 3774 1

撰籤履方

萬善花室文稿

本館據畿輔叢書
本排印初編各叢
書僅有此本

原序

余未嘗爲駢儷之學。顧於其源流派別。嘗攷核之矣。往者喜楊蓉裳農部芳燦之文也。蓉裳之言曰。吾之爲儷體文。色不欲其炫。音不欲其諧。以闕采而得古錦之觀。以闕響而得孤絃之韻。是則吾之所取於玉溪生也。蓋本朝之爲駢儷文者。無慮十數家。而討論之精。則後來者往往軼出前人之上。若蓉裳之文。取格近於邵叔。六孔。彛軒。而易其樸而爲華。取材富於陳其年。吳園次。而易其熟而爲澀。其於此事。信可謂三折肱焉矣。彥聞明府。往嘗與余唱和詩歌於京師。及來爲令於閩。而乃知其工駢儷文。昨自福州郵以示余。其命意遣詞。浩乎若靡有津涯。蓋與蓉裳有異曲而同工者。蓉裳固彥聞之受業師也。蓉裳爲人樸誠。若不見其才之能有爲。而其爲伏羌令。嘗著戡亂之功。人謂民感蓉裳之誠。故潛以賊謀之謀告。而蓉裳得擒之以守城而定亂也。然蓉裳絕口不自言。上官亦未有舉其功而特擢之者。今閩中無亂民。而其俗之凋敝甚矣。舞文抵法者接踵而興。閩縣爲赤緊。而其俗之敝自若也。上官咸知彥聞之才。故自永定調取以治首邑。彥聞發揮儒術。當必有異乎俗吏之所爲者。行見膺不次之擢。其遇合逾於蓉裳矣。歐陽子曰。文章止以潤身。政事可以及物。余故序彥聞之文。而舉誠能動物之旨。以爲彥聞必能深究乎誠。求保赤之學也。道光十一年春仲。新城陳用光序。

敘錄

萬善花室文藁七卷。國朝方履錢撰。履錢字彥聞。大興人。高祖辰。就婚常州徐氏。卜居陽湖。故彥聞自號江左僑民。中嘉慶二十三年舉人。官終福建閩縣知縣。彥聞博學嗜古。自天文、地理、氏族、金石、錢幣及六書、九章之法、梵筭之典。靡不綜貫。年十三。爲文示楊蓉裳、芳燦、楊驚爲奇才。長與李申耆、陸祁生、董方立、吳山子輩。以文字相切劘。故其派別明而源流正。淵懿樸茂。舉齊梁以下浮靡腐熟之習。力矯而廓清之。乾嘉間陽湖工偶體文者。以洪稚存、孫淵如、趙味辛、劉芙初爲最。彥聞與董子誥、董方立兄弟聯鑣繼起。以稱雄於世。所謂屈平、宋玉、導清源於前。賈誼、相如、踵芳塵於後者也。陳恭甫編修稱其文匯漢魏晉宋作者之風骨神韻。纒纒焉御風而行。而陽開陰闔。雲譎波詭。神明矩矱。動與古會。唐宋以來。迄明一人而已。誠知言哉。彥聞又有詩集五卷。詞集二卷。富蘅齋碑目六卷。伊闕訪碑錄三卷。希姓錄一卷。泉譜一卷。皆爲當世所重。光緒乙亥。其孫恠。與余同居保定之蓮池。索全書不可得。僅獲其文藁七卷。是編乃永定人士思其政績而刻以誌愛者。板甫成。卽燬於賊。故集中譌奪處多未及更定。而前後排纂亦無倫次。王君文泉重爲鈐板。與同人核對。稍訂其譌。至編次因無定本可據。姑仍其舊。世之讀是編者。庶沿流溯源。知所宗向。不至染髭鬚而輕前輩。易刀圭以誤後生。如曾賓谷之所深譏也。新城王樹枏。

萬善花室文稿目錄

卷一

擬嵇叔夜琴賦并序

擬江淹江上之山賦

擬庾信蕩子賦

網山賦并序

傷友人賦并序

飛蛾賦

簞賦并序

小山招隱圖賦并序

金近園供石圖賦并序

別知己賦并序

神樹賦并序

感役賦

蔡浣霞太守煙雨倚樓圖賦并序

玉鸚鵡杯賦并序

倉山月話圖賦

古藤賦并序

卷二

懷遠縣重修塗山大禹廟碑

萬壽恭頌謹序

萬壽頌謹序

贈陳丹崖序

答董方立書

再答董方立書

與方立論古泉書

仙山塵夢圖序

卷三

春暮遊陶園序

周伯恬詩集序

問潘念諤疾啓

潘念諤誄并序

送趙林一序

江行記

與江神牋

祭莊印山夫子文

祭周籟雲文并序

書劉芙初編修駢體文集序

送董晉卿南歸詩序

誥授朝議大夫甘肅鞏昌府知府護理鞏秦階道胡息齋先生別傳

沈貞婦繪古圖贊并序

答劉青園書

綠玉詞序

郭烈婦傳

王君貽珠香雪圖序

立魚峰贊并序

宋母曹太宜人墓表

葉鶴巢越雪集詩序

越西江行竹枝詞序

卷四

歐陽文忠公畫像贊并序

游菊江亭記

陸祁生宣南話舊圖序

陸母林太孺人家傳

清歡堂詩集序

祭董母莊太宜人文

懷知圖序

徐仲平原學六篇序

汪母董孺人靈表

祭亡友文并序

李氏三忠家廟碑銘

趙收菴先生二學圖記

清故江西廣信府知府誥贈朝議大夫兵部車駕司郎中晉贈振威將軍兵部侍郎兼都察院右副都御

史安徽巡撫兼提督軍務康公神道碑

黃氏息圃記

答陳伯游書

卷五

鄧完白先生墓表

鄧氏隸書贊并序

康蘭皋侍郎行年圖序

刑部主事康君妻王宜人墓表

與李中蒼書

榕陰消夏圖贊并序

贈李靜菴序

嵩山啓母廟碑

董方立誄并序

蘭石齋駢體文遺藁序

小琅玕館雅集詩序

答吳巢松督學少司成書

和簡勤公讀易匯參序

卷六

東流縣志敘錄

河內縣志敘傳

武陟縣志敘錄

謁紫虛元君文

瑞麥頌并序

天甯寺重修九蓮閣記

呂子楸誄并序

史孝子贊并序

許烈婦贊并序

重刊法苑珠林序

東湖縣知縣洪祐甫碑

卷七

龍母廟碑

周筍雲墓表

董大令敏善黎陽城守記

鄧漢中德政錄跋

莫愁湖秋泛圖記

鶴樓雅集圖記

趙甌北先生重赴鹿鳴圖序

孫母倪孺人墓誌銘

潼陽唱和詩序

爲金近園與朝鮮駙馬洪約軒書

爲金近園答朝鮮進士尹玉壺書

萬善花室文稿 目錄

代胡素亭謝朝鮮進士方暉齋惠藥啓

袁蘭村誄詞并序

宮保尙書制府孫公錫壽恩榮記

萬善花室文稿卷一

清 大興方履錢

擬嵇叔夜琴賦并序

嵇中散負名世之才。而生逢不淑。天下無主。終隱其身。棄絕當代。一人睚眦。竟以讒死。可謂傷矣。孫登說其性烈。作書自言。輕肆意者。神龍螻不。求信。而其天矯之性。終未易使湮沒也。夫鐵以剛折。百鍊則爲繞指柔。鍛之爲好。殆有深蘊乎。其生平著述文章。意皆本此。至於琴賦。則尤擇其至純。去急徵焦殺之音。而壹以和平之聽。稍汎濫於奇詭。卽引而歸於正。盡琴之理。抒己之德。所謂文與道合者矣。余聞於音律。兼拙詞賦。而有志於古。聊擬其體。未能揆夫形似。細已謬於毫釐。宜其陋也。辭曰。

羨奇標之挺英兮。蒼精蕤於龍門。蔚昊極之中潤兮。稟坤靈之至純。若木蔭於垂榦兮。金波藹其輪囷。臨儕枝而高峙兮。渺蒙育而難鄰。止鳴鶴於晨風兮。舞威鳳於夕春。沃流景以終古兮。非斧折之可循。且其形勢則仰託於山。俛峙於淵。駸駸罷陀。翹翹嫵娟。峰蟠塊圪。霞頰蜿蜒。丹苔虬根。紫芝絡顛。嶂劈削以頽鳥。石崩勇以幻天。東走崑崙。浴乎鬼室。鬱羣崒而靈据。流九宇而奇穴。風夙靡以摧霄。雲晝昧以失日。容成莫運其樞兮。輸石不能注其鎖。若乃奔泉迴湧。緝緝漾漾。滿漭瀟澗。洩瀨滉瀉。圓消瀑而若珪。周圍瀟而成障。鵬溟卻澁。滄嶼礪浪。川平神秀。津壘聲宕。驚潭窟而不前。搏扶桑而直上。縈巒徐折。凌涯遠收。變



跂下構。靈胥上儔。鏡浴欲抱。翠瀾獨浮。萃華蓄珍。曠耳眩眸。懸黎垂棘。土輝澤媚。三色七采。竭用而不匱。椒茝爲之茵。櫝檀爲之僕。珊瑚爲之墀。火齊爲之燭。膏露之所浸淫。彤雲之所喬郁。列真之所浮游。龍鱗之所澹伏。猿嘯影而忘哀。鸞唳羣而歸宿。蓋亦攬八極之曠朗。冠千載之祥淑。神麗於是乎偉兆。休徵於是乎酬酢矣。乃有志德上士。抱道逸民。登天台而恨隘。入峨眉而厭陳。相與披榛莽。闢邳垠。載愚公之畚。役五丁之斷。奄息舒節。以憩乎名山之巔。湍池之濱。遐睎巨阜。近眺容溪。疏煩想於葑鬱。招幽慮於離嘻。拍洪崖而相闕。揖松喬而下之。緬孫登之至音。遏素女於太清。嗥饗父之磻磻。引頻伽以嬰嬰。旣調曲以赴節。集衆響而衡平。感妙桐之逸格。晃天籟之寄情。乃扣玉膚。順瓊蒂。攀柯爲階。斲材爲翳。因制爲琴。思有默契。剗剛始就。雕琢仍加。面其洪纖。掩其陋瑕。計四時以爲修。廣六藝而不奢。前巨後狹。象乎尊卑之度。上圓下方。承乎天地之數。澤潤而敷。中虛而注。經以文絃。緯以冰箸。持正而掎。不失晷步。其軌審也。精黝紋綴。迺映流黃。脂柔密凝。繪繡微揚。錯華玉以爲枕。駢瑤藥以爲牀。砌池平以象貝。編徵繩以夜光。發彩陸離。輝乎四方。其飾麗也。乃其發聲。則按指各清。並而不淆。軒輕雜流。悠促孔昭。輕攜慢撚。心冶手調。闊解漏越。撥刺柱撓。始布器而命引。已人近而意遙。至於宮商旣諧。角徵協韻。瓠巴安操。師襄理索。初雍容以神暇。繼盟嘖而氣奮。冽飄眇於沈思。返紛糅於廣運。攄醴醴其嘈噴。騁嬈嬈其振迅。碧霞散彩。白雪斂寒。風霏天外。雲生袖端。驅拂渙忽。動聞潺湲。流水無垠。峻崖改觀。滌躬齋省。蕩志甯宅。摠衣入戶。解襪登席。進御主人。退揖嘉客。囊檢徐紆。飄埃緩掖。詢恬淡之素質。非玩好之餘癖。若夫峩峩層構。岌岌飛棟。

綠芰懸插。絳英橫控。金闕華開。銀河星動。簫管謝闌。金石罷弄。鏗然獨奏。潛弛陰縱。則有元鶴二八。集於廊門。郢中猗蘭。海上陽春。尼山思歸。姬旦感親。蘇囉熙泰。綏肆洞神。彈越弱腕。歌激皓脣。歌曰。洞庭張兮。夕暉渡。引仙舟兮千里去。憩蓬萊兮雜佩陳。冷煙島兮要美人。怨年華兮惜朝槿。醅朱顏兮嬌采蘋。贊舞操以自廣兮。夫何恨乎鴻鈞。新聲向畢。授節亦舒。旻衍異態。紛爲疾徐。驟抑按以藏摧。遂休慄而斷續。或急擊參差。奔放躑躅。叢談禁吐。睫瞬遑矚。或聯縣長往。銜命不復。鵠噉竟空。雞號終宿。或清壯激嚙。震驚百里。少卿一呼。創痛皆起。燕客赴秦。蕭蕭易水。或婉約平唱。綢繆告語。落花隨人。亂鴛無主。詩諷論而不傷。騷反復而不怒。遂乃馭杳並輿。翩翾衆舉。適樛亮而礪駭。忽充屈而猗靡。婉嬋娟而俱赴。倏蹀躞而背馳。沛訇磕而迭遇。猥搖演而失歧。或駱駝其拔擢。或殊奔而絕羈。磅礴嚙齧。澤捐旖旎。啣嘈瞪費。鹹汨趨蠟。烈聲競剖。短韻委蛇。澎溥而不容隙。瓌豔而不可知。然皆不縮不盈。度中模楷。紆餘煒澤。彬蔚揮灑。扣幽阻而平朗。抑繚糾而神解。或散繁植業。抗世希美。姿妍麗以都雅。體溫潤以流綺。效明誠以齊欲。漑垢滓以裨理。斐靜擇宜。規翔倍蕙。安徹駘蕩。從容闌邇。扞拭推搨。擱摑排拈。共鶩而挹。殊特而峙。餘音參出。浮彈未已。燦若連珠。升雲中。端若旒旒。朝辟雍。熙若芙蕖。揚葩而爭灼乎南風。緯孔昊之載儀。希虞韶之足崇。耽道真之寂寥。吾亦養夫吾躬。爾乃春郊遍淑。芳草被隄。幽蘭緝帶。新楊染綈。巡迴曲水。偃息城西。妾魚鱗重。乳燕翅低。順蒼穹之造育。鼓羣蟄之積迷。整逸響以遐布。佐化功於重黎。至夫月皎上宮。露盥瓊闈。羅圍結麝。綵帳暉雀。乃宣正情。防極樂。譜懷陵。轉清角。吸諠譁於再摠。延素隱於大漠。懸條昶於罕

觀受滋融而有綽。若其名則池上爲平。濱下爲詳。號鐘繞梁。焦尾鳳皇。聲出清和。則言暢以自廣。樂象憂
悌。則命操以善藏。其爲曲也。騶虞鷓巢。白駒伐檀。龜山越裳。貞女水仙。風遠入松。石近飛泉。別有楚妃九
引。雜歌河間。胡笳白魚。篴篥離鸞。錯落掩映。翻後迭先。貫序所推。務乎聖賢。是故宓義俯天察人。而琴生
其端。少昊繼之。禁邪促煩。唐帝雅法。重華攄延。文王賦美。大武益絃。微子思懟於殷宗。孔父道厄於魯年。
莫不攘指發弄。奕奕淵淵。然而仁不足化。八紘者。無以渥其惠裕之治。智不足格萬類者。無以應其溫直
之志。武不足扞四國者。無以凌其慷慨之氣。信不足傾一諾者。無以察其貞介之誼也。擬箛篥而騁越。懲
笙簧而淳懿。聆斧藻其至德。襲琢磨之令器。可謂應感隨會。通塞因紀者矣。追哀激之音。則雖忭愉者聞
之。莫不百感悽惻。漫泣橫臆。齋志默悼。斷腸蕭瑟。宕暉嗜之奏。則雖戚思者聞之。莫不謳舞康衢。展懷自
克。踊躍跳蹈。忘化顏色。綜條達之聽。則貪戾者聞之。莫不竄其強隱。究清厲之引。則懈懦者聞之。莫不勉
於峻刻。於是成連輟於海表。子春鳴於空巒。師文注耳而不寐。鍾期傾心而洽觀。趙定蔭思於修竹。龍德
奮志於皋蘭。絲駒舌結。秦容吟喪。駟馬仰秣。游魚疊浪。落霞拊耳而神女翽。清徵觸視而天駿望。屏寒暑
於已披。羅律呂而盡鬯。詢可以窮義知化。備德體道。壹性贊情。先識彌照。管生抱璞而頤慮。楚老含貞而
坐嘯。徒風俗於漸浸。參日月於並耀。豈獨媿觸躒與圭璋。徒襄飾夫形貌。殆音聲之超極。爲君子之貴操。
辭曰。琴德徂長。樂之輿兮。雅詩三章。孰侮余兮。登於瑯環。錫玉書兮。廣陵久散。曠秦初兮。參譚樞機。識者
疏兮。運於微茫。抱六虛兮。

擬江淹江上之山賦

驚瀧無前兮。帶荆門而襟越。千步一曲兮。走斷山以爲骨。嵯峨兮。箭筈。恫怛兮。勃率。疊嶂兮。轉壑。拄屏兮。立笏。通四溟之地。肺起九疑之靈窟。削錦麟以承基。挽玉龍而伏闕。爾其碧潯東下。晴江萬里。佇萍實於前洲。垂丹草於中沚。迴濤迫以蛟眠。怒峰轟以鶴峙。石望夫而舒頸。巖留仙而啓齒。悅鳥性以忘憂。眺花城之合葉。宅千載而無窆。鎖百川而如砥。惟靜言之契晤。感蹊徑之莫同。蕙當階而已蹴。棘被道而滋豐。悼人生之常歷。致流蕩於厥躬。情嬋媯而方已。意翕翹而若蒙。偉哲人之才力。欽顯允之化功。呼六合之廣周。納一息之穹隆。仰濯枝而垂露。豈隕籜之從風。伊撫志而自嗟。應羣物而屢殆。伏虛檻以招雲。謝游簪之在海。傷蛾眉之孰珍。望玉階而誰待。吟梁甫而和予。舞清商而旣悔。不若整桂橈與芰裳兮。刈畹區之芳苒。獨登江皋之斷山兮。揖靈修之異彩。固陋質之駸駸。尙企爾音於葦宰。亂曰。夕陽之疏兮。懷江南。層嶺溢目兮。思之覃。安能驅此逝流兮。嗟孤衷之俯探。

擬庾信蕩子賦

蕩子去國年復年。孤征風雨黃河邊。游塵逐暗月。淒聲隨曉煙。若夫寒閨春晚。遠地秋多。雙砧難節。單笳未和。鶴操離曲。雉識悲歌。銀繩竹箭。金的銅荷。長樂不樂。莫愁易愁。舊粧素鬢。新吟白頭。夢迎薰帶。魂去蘭舟。絲絲怨骨。昔昔泣眸。去日應無遙恨。生郵知期短復。吞聲化石。羞餘尊迴波。卻染形落花。開匳一寸雨。飛絮著牀三日晴。昨得河中尺鯉書。漢南歸信今非虛。且展芙蓉匣。先籠翡翠襦。宿豎加意整。歡顏不

覺舒相逢驚瘦影。借道往時殊。

網山賦并序

夫昧泉之扃。不能以陽燧燭者。真宅之闕蘊也。穹谷之杳。不能以崇墉掩者。坤靈之毓采也。故陔堵駢羅。名佚其五。蓬萊麟岫。迹外乎九。有熊之偉。通夢域於華胥。夸蛾之精。運王屋於海尾。是知幽峽者。非人力所營。而人能達之。冥搜者。非神功所助。而神亦啓之。蓋玉堂石室之華。珣岑珠岫之奇。五丁與千夫爭勞。巨鼈與屏庶比烈矣。柳城縣東南五里有網山者。亦遐區之異岑也。涉巔有荆榛之阻。撫踵有虺蟄之虞。訥訥洄洄。歷百紀千。隱隱沈沈。莫之或覩。邑士某者。緣山爲宅。夜分而寐。爽與神遇。命其鑿九泥。豁層岫。勤而不屈。維余能佐。某卽信之。逝告鄉閭。斂錢命衆。具畚施鍤。曾未浹旬。訇然遂闢。石穴倒峙。盎若覆羅。溫泉環咽。斜以徑腹。雲骨霞髓。剗鏤識其仙才。金液瑤漿。呼吸通其靈氣。倬詭旣見。四方奔走。飾罍曇於竇陰。假纓絡於叢溜。懸穿旁達。岩嶙纒連。有條不紊。若網在綱。指象攷名。命曰網山。時實嘉慶十五年庚午之秋也。逾三載。大人牧於茲土。僕自京師來趨定省。覽南極之川原。問朱垠之坻嶠。躑步中皋。款睇勝域。會得茲麓。心焉賞之。港洞上隙。瀑乳下垂。坦慮忘遐。鈎奇選儔。列柵藉卉。留連終暑。鄉先生何君澹溪。揚觶於前曰。逸躅臨而翠微悅。高蹤邁而芳杜恥。不獨聳流覽之娛。耀棲遲之美也。將使桂壁受榮於嘉藻。丹邱標目於君子。今山之始。翁終朗久。錮乍披。波涌鏡吐。曾不幾時。而吾子振綺靈蛇之珠。奮翰雕龍之彩。涉湘度嶠。惠然戾止。豈蟲蟲者有所翹與。或磴磴而展其儀。騁妍寫妙。請子賦之。乃爲之賦曰。

迪余懷之銳發兮。薄九皋而迴翔。縹閬風於中區兮。跋崑崙而稅華陽。鶖桂軫以探疑兮。夕余濟乎江湘。珉阜縣而宮別兮。哀芝田與蘭唐。蒼山之陰。象林之左。丹水出其磧。火井焚其塚。野莽置而無垠兮。陸瀾迤而弗勝。洵乾以之祕壤兮。超紆謫之塵瑣。爰有山焉。隱魄榮威。諗祥靈祇。頌職萃夔。爾其山之爲狀。則嶄巖嵬。魄駭盤紆。匿穎蔽珍。環落密塗。鼓崆峒而連卷兮。鞠嶽巖而灌輸。鬱律隆峴以自峻兮。徑輪廣袤。瀆以晶齟。肆翼翼之高下兮。允京峙於炎隅。原隰衍於陸海兮。參紛互以交錯。秀禾平碧。億頃兮。亡屑塵之潛躍。蹇朝步以駘蕩兮。巨望督岑而眇薄。忽背隴而徐頽兮。靈關覲首而閔廓。迺亟趨以愉意兮。驚巖觀之仍藁。咨山關之哈我兮。循沓嶂以審夫重鑰。蓋自遙自邇。一直一枉。時尙奄息而未轅兮。徒徒倚而恟悅。孰鴻構此絕游兮。亦奚疑夫山之網也。於是倒窻空。濱厝窟。拂翠羽。披石髮。剝鑿滅痕。漱蕩騰沫。響然颯怒。對然雲凸。排曉曖之森森兮。迫寥窈而屢蹶。天扉呀以隆闌兮。鬼脇貫以迷真。摩笏巧老其相。輾轉兮。豁衍裂而爲皴。礪百笏以玲瓏而上達兮。尙寸銖以纏積而修綸。左右覩以驟轉兮。惚不察其逡巡。爾乃擘其領袖。揆其端倪。袂藉級而曲引兮。檻登蹠而獨躋。則有飛蚪停鳳。偃仰而爭睨。泐菡萏之精英兮。石瀑滂淪而戢丹莢。佳乳醞馥以垂注兮。寫吐氛之虹霓。溜倒茄之滲漉兮。若瓊柯彫錯以瑩乎初日之梯。路不周以彌涉兮。又踳躅攢仄而植宇。度徑庭之倏延兮。棼闐闐其承弣。彼椒冢之萬仞兮。陽離胡所施其嫗煦。神樞運於太虛兮。三句用韻嚶涌洩出乎巖竇。泄元關而叩紫府。曰母蒞其貞明兮。素娥嗣其光晷。火齊墜於朴歸兮。覆孟脫而不盈咫。朝旣炯晃於珩壁兮。暮方激射於璣葉。羌誰悟此壓渾兮。荇閭

闔而據僂僂。鳴籟緣雷而振宕兮。雄風四戰於屹嶼之尾。泗磐浮以瑋琮兮。球鐘合以鋸鈺。水龍婉以答響兮。春鶯颯以諧音。繼復蕭騷。映盼而相失兮。碾碾磴磴。鑄以長吟。淪吩叭。輶軋以旁嘶兮。疾霆破筌於窮陰。使不難者將震而柱鬪兮。遑論夫惴憊恐慄者之謫膽而賊心。覃桐柏之真館兮。挹八玉而御五煙。躡安期之赤舄兮。禁秦皇之玳鞭。神人舉影鉅鹿兮。玉女散轡於天淵。儲沆漑之英兮。產芝髓之妍。夕肝雲韶之樂兮。晨誦奏夫靈文之篇。瑱琿璀璨其佩綬兮。繽紛駉驛其輜軒。咸叢集於厓隙兮。疏煩想以錄冥。筌巨靈自赧其脰掌兮。肩吾曾不得儷其精研。嘻蓋藏之已駿兮。倣能醇粹卓犖而蔑先也。當春則巔旭祛寒。巖和散滯。雜花曼鮮。芬草羣砌。爛乎若剗錦。費績駕飛梁於霄際。時禽習習而將翔。蟄獸颯颯而奔蹶。洊雷假道於岐達。豐隆孕形於林裔。故能苗膚寸。澤嘉稔。浹春霖之蔭敷兮。錫沛然之休瑞。入夏則龍從森鬱。檀欒漉漉。濃翠璘璫。皎色炫晃。如湯之沸。所弗臨。赫曦之焰。莫能往。迺藏夫初皇之雪。循蜚之冰。嘯寒而淪凍兮。氣淒清而曠朗。麾澳忍於炎寰兮。祓燠熇於裸壤。香雨滴瀝於枝蔭兮。泆流噴吐而成響。暨秋則絳蜺半捲。赤苔始衣。勁鶻止其恒。宿雅巢其啤。調珠露兮。桂爲帳。揚野馬兮。蘭之帷。肅其沘寥。汜豔兮。羈客臨眺而思歸。列子御風泠泠兮。武夷張樂而停駢。斂皓魄於岫隙兮。鏡圓靈於峰圍。朔管引而月小兮。江笳逝而山悲。徂冬則簡積頽。在澹淡。靖嶸。悒悒。鑿鑿。默默。含宏。地脈蒸而難泆兮。雖嚴節其莫甯。冲曖而乘躔兮。怙統類於元英。弱蔭聶炕於凋候兮。蠕蟲噪嘒於素商。實噤閉之窈穽兮。疑重瘖之在空。幕温睨於塤黠兮。韜凝晦之霰翼。瀏飆繁韻密率而寘。蔽兮。答子律於黃鍾。至若淨粲朝宗。清瀆迴

澗。雙帶盤盃。四絡鉤聯。左瀟沅。右邕川。前融江。後牂牁。懷赤泉。揭丹淵。瀼瀼瀼瀼。迅復增澆。亢溜懸制於
 其寰。蹶舜浴之。惑不庭兮。妃帝臺之。劭高前。趨瀟瀟以。瀉瀉而。各碎宕兮。沸表坂以。溜埃埏。黃甲紫鱗。馳
 波而跳浪兮。白苕青藻。輶以洄沿。俱經乎隘陜之口。詣乎蹄涔之間。其木則有條有梅。有柰有楊。榆桃榿
 梧。檟棗柅柳。楚荆牡荊。女桑榘桑。樸橄丈尋。條肄合抱。松有上古之槎。柏有千歲之葆。桂歷序而榮英。枏
 連理而獻藻。沙杉散楸。楓椰科聊。大榕之蒨。菴靄於嶠。扶疏瑰奇。百狀千名。菱蕝攢柯。菸邑擎莖。重明上
 罅。狂颺自生。抗葉敲枒。短琮碎瓊。棠棠仟仟。靡暑克甯。其下乃有麀麀麀。孤獾迅雌。角端猓胡。猓猓壘
 獺。熊笑人面。猿引仙臂。峒象晦奔。蠻馬晝睡。猩猩之侶。費費之倫。雨散風跂。冤伏陵窘。鬃鬃驚躍。疑有文
 有标目元狐。蹙猿素狼。踐影暉踪。善疑易怪。覬山之貌。擬置擬罟。若將罟罟而儻束焉。莫不踟蹰踟蹰。魂
 滯氣懾於洞外。其上乃有文鸞彩鵠。獨鶴羈鷓。城旦倒懸。桑扈竊脂。孔雀珍翫。紛縟斐尾。翾翾歧歧。碩於
 斯者。葦榮尤侈。自邕來翔。越人呼之。名曰鳳凰。鳩婦翼赧。鸚母鬢霜。哢喔構廈。離離成行。望帝之身。咽血
 哀鳴。使人回開。悽愴。怨游而神傷。其草則靡蕪杜蘅。王芻菴韭。蔞列虎杖。莽曰馬帚。都管六葉。銅鼓單拇。
 蓬茸薤蔓。茵藟贊剖。夏翼冬蓓。晨刈午葩。曜日熙天。不可指扣。其上乃有班班雉奴。雉棘竄蘆。啄飮半夏。
 爰惟鷓鴣。蜻蛚晚唳。蜩蟬夙唱。其下乃爲蜈蚣之邑。蛇虺之都。修虺碩腹。異蟄方顛。水蛭爲螽。天螻爲蝓。
 橫睛怒喙。聳耳齧齧。射工蠶賊。吞旅士而膳室。徒蠕蠕蜿蜿。甘我肌膚。其果則龍眼益智。若榴丹荔。柑柚
 橙橘。種以十計。烏欖茗泛。檳榔鹽漬。蓬萊仙棗。藥曰如何。栗房蕉實。棠藜密羅。黎朦櫓罟。人面羊桃。土品

莫測。峒名殊科。鱗甘咀芳。丕繁且多。若乃丹砂紫芝。黃連青乳。款冬決明。桔梗益母。薏苡比穀。荳蔻設脯。蝮蛇之膽。可敵楯弩。凡兪跗之所稽。桐雷之所譜。蓋已拔一報九。擿十得五。其石則砮砮琅玕。嘉氣穹窿。縠粟磅礴。疆表樸中。釜瀨延曜。飛仙憩空。似承露盤。續幻芙蓉。片片礪齒。星星照容。其竹則班曆暈螺。篔簹琢漆。質篋可箭。篠簞中筆。歲兩苞籜。月百挺節。聽鳳餘紺。化虵猶碧。嶰谷無以詳。伶倫安所識。徒觀其動植之萃。奧寶藏之舊。絢幹質之潤。黠奇贏之仍。荐如毳如絲。如霏如霰。綵綴爛朗。焮熾遷變。天府之祕。璇宮之選。竭巧罄奇。於此乃見。所以煥炳日南。作鎮朱縣也。舉衡之右。故號靈巖者。則有龍隱棲霞。雉巖立魚。劉仙屏風。曾公讀書。皆以玉筍瑤簫。峭立林豎。高直化城。下竟水府。質其餘勇。勒其參伍。以角力而鬥麗。莫不拱雄刻。羞坯土。逼者戴。望者俛。昔以命服未之該。周譯未之名。葛洪屈而不爲標。柳生守而不能銘。屏悠禩。遁荒裳。蹠踟落拓。蔑陳乎海圖。虞經。徒使俚獠曳腕而登涉。獐獐缺舌而肆評。山祇享貓鬻之祭。澤圉聆踏搖之聲。則闡秀後於媯補。託基邇乎亥祿之因也。使溯歷以先之。則廣成不棲崆峒。而黃帝將駕航於濼水焉。王母不築崑崙。而穆王將脫驂於湘涘焉。孫登去蘇門而訪幽。園公避商雒而結軌矣。若是之虧。營漏渫者。吾固不恨山之虺頰。而深悲九京之難起也。然而屯於秦始。蒙於嬪載。啓曠展闕。惟我清代。璣祥顯符。臻與懿會。蓋天子纂神嗣聖。洽和永泰。羣時受釐。脗蠻致膾。德翔樂砥。沛乎無外。鶴林鰈海。輸琛納貝。是以社斗凝其暉。憬維幹其真。辟精極崇。貫珮雕珉。嶼岬海汜。爲岱遠臣。據頸延其膏。蕭兮。將配藜於蒸薪。字嘉禾與黃龍兮。藪奇木與白麟。至於蒲塞持教。大乘談果。借拯溺於無生兮。秉慈

航之慧鎖。緝名鷺以飛鉢兮。悅禪誦之宴坐。徒巢卉以藉樹兮。剝蔭日而宅火。謂列岫之森聳兮。咸爲擁錫而豁聞。彼羸氓之欽述兮。非信心之在我。若乃君乎牧乎。是耶非耶。馨誘臯蘭。顏若茗華。關山之客。假夢而夸。誑彼頰頰。斐爾葇加。昭光振芻。秭出金沙。越士感之。勤薄勳奢。詭兆或允。詮理其瑕。太人司占。敢告無譁。於是釐六氣兮。游無窮。思遠託兮。愴忘歸。拂霄嶸兮。誰與期。良醞醞兮。莖獨來。揖靈僑兮。揮羨門。遏金女兮。卻宓妃。徑爲闢兮。窺爲囿。芝爲殮兮。瓊爲酎。誓解纓兮。登帝鄉。暢陝區兮。徂世宙。亂曰。馮隆之宰。宸特鑒兮。助听而寤。列宿挾兮。忍俊羨昔。產激澀兮。運裏奪汝。罌在原兮。崇島織路。舞蹲蹲兮。神之遲遲。歛南隄兮。有卷者阿。嶽外垣兮。兀巖嶽嶽。刊精魄兮。蓋蓋無厓。永無極兮。

傷友人賦并序

僕所友善者。有馮志高其人焉。野王序裔。敬通啓胄。高華摛雲。朗抱襲月。故國千里。賃伯鸞之春。燕臺十年。投定遠之筆。饑迫欲死。神頹瘠生。孔文舉云。憂能傷人。殆斯謂矣。彼穹匪忱。景命徂謝。幽局長寂。歸輶未期。卷施之心。已抽。萱草之望。誰慰。況復弟非曇首。門戶何寄。婦許秦嘉。婚禮未迨。孤館無可通之夢。荒亭有未招之魂。傷心之事。更何可言。昔安仁之於楊仲。爲賦懷舊。文通之念殷孚。彌悲知己。僕旣惜朝露。未感宿草。因作斯賦。以紀哀云。

晨風侵骨。悲條鬱林。北陸思渺。南鴻響沈。詫吾友之毀芳。悼遙緒於素心。惟此良友。鏡華毓萃。容與典籍。迴拔儕類。彥輔謝清。叔寶慙穢。志茂鳳翼。遇蹶驥步。弱去庭闈。遠辱親故。京國羈人。燕雲歸路。惟疇年之

皋且。余邁歸於帝邦。乃投袂以結言。抗執手而不忘。眷棲息於一室。結繯繆於異鄉。協旅思之不寐。起中夜以彷徨。天高月白。夜寒燈侵。長缺氣冷。短歌聲瘖。感北風之惆悵。跋東國之徂深。解久期兮紫玉佩。泣橫涕兮丹羅衿。余凌岫兮言旋。爾紉止兮將別。策邊草以促征。賦停雲於廣夕。誓明河之躑躅。怨星車之參差。勵明德以共勤。申麗翰以要之。何生平之暫睽。乃幽明之永歧。刈蕙若之春英。斷瓊芝之淺蒂。嗟銑采而未發。嘆瑤光而終闕。彼泉室兮緜昧。屏斯人之偉器。肆求形於宵夢。若登叫於帝闈。叩九重而不納。遺一世其若塵。顧沴氣之遽結。遂芳菲之不可因。

飛蛾賦

緊蛹化之繁類。乘薰節以遊遨。暫伏影於永晝。乍騰翹於初宵。羣棲擇之無所。萃鬱蒸之相招。望依依而靡向。趨焰焰以自焦。華繁兮舒烈。百枝兮豔室。炤爛兮灑漾。赫戲兮奔逸。挂銅荷兮輝映。空蓮帳兮彩密。引微軀以何從。轉橫芒而愈逼。祇蔽曜以有途。雖隕身而不惜。嗟人生之窈昧。狎造物爲可持。臨義壑而遂畏。縱利焰而瘁思。偉碩人之致命。蹈鼎鑊而無辭。非悼傷於才力。羣申申以冒之。何茲蟲之委瑣。甘投體以抱緒。誠自晦於機穽。亦失炫於媚嫵。辱君子之明光。意縈藹而難主。狀馳直以好修。遂迴旋以懸炬。豈赴脂之近榮。已斂明而齋怒。愧剛克之素蒙。蹙隱憂之終類。彼夫胡蟬之微翼。方息情於晨風。蜉蝣之陋采。亦停質以逞雄。皆默生以悠悠。哂驅向之異同。懷平原兮吾有思。撫玉玦兮大道中。孰矯勇之敢隨。吾亦鑒乎吾躬。

簾賦并序

物之美於夏者莫如簾焉。動不易時。處不違用。雜彩在室。沍然來涼。意之所暱。感而賦之。

萃北陰之崎曲。裁千尺之質管。絕寒威於虬枝。吟商岫於琳琅。惟擷翠而成縷。集羣材而流黃。抱浮雲之迢遙。奉明塵於往夕。貴設施之異宜。展霜華之凝霈。仰左右之薰儀。慙丹臚之顏色。於是沈陽沸烈。溫風渙。澗。綺疏斂彩。璣帷欲燼。顧蘧曲之是衡。乃絢練而厲情。藻披素而自悅。氣滋紅而爲馨。佇炎洲之如砥。豈熙澤之可縈。非氤氳之敢遠。固杼柚之含貞。潤嬋娟之蕭條。駛餘陰於屏几。擘容與以相從。撫波文而無已。廁美人之前席。託玩賞於足恃。祛鬱氛於一朝。荐流颺於千里。佩德音之纏緜。甯獻媚於芬華。效六尺而忘蹙。指三秋而有涯。甘韜筒以祕彩。雖捐置而無嗟。揚纖埃兮終潔。怒卷舒以意遐。重曰。攀幽蓀兮淥水潯。拂微瀾兮披子衿。幸芳臭之同倚兮。時永愜乎素心。

小山招隱圖賦并序

董子晉卿作小山招隱圖。其族子子誥賦之。意有未盡。復命余廣其言。乃爲之賦曰。

伊穹窿之莫接。固參差而誰修。遭薜荔兮河廣。續荃枝兮道周。奉蹇媒以自容。羌欲達而夷猶。金峯遼兮碧湍曲。陽林旋兮蕙櫛促。騁彤雲而神變。斐長風而喬郁。山靈旣其連蜷兮。漱華池於心目。於是斜飄迴拂。遺塵汨前。翔兮淺淺。渺兮翩翩。蕩榮趾於睫末。沈此心於流泉。曾巒壑之可循。孰慕悅之足先。魂恹邑而太息兮。塞靈修而未悔。捐余玦以紉秀兮。夫亦知其甄采。怨盛年之隄側。隱思君而魄礪。懼鳩飛之爲

媒。又衆芳之將怠。望夫君兮誰思。揖中洲以來歸。悲落葉以沒躡。遵霜露以爲期。步絲緒而慙戚。寒峻峻其幾時。挽同心於千里兮。雖僂俛而奚辭。歌曰。棲九疑兮狄夜寒。撫雲車兮湘之端。倚樽酒而延佇。心忤忤兮未敢言。進軫琴以歡御。橫玉瑟以炤座。列幽馨以相通。庶佳人之予和。覽鬱並節兮。報菲芬以忘瘳。重曰。踐石室兮天有涯。實寸憂兮重咨嗟。甯抗袖而悵望。結桂枝以意遐。瞻白日之代序。抱黯黯於芳華。

金近園供石圖賦并序

海東之國。朝鮮其最先者也。操疇陳範。基於父師。効費納忱。纂爲外服。梯山航海。秉朔獻琛。歸我聖朝。百七十載。史不絕紀。歲無踰賓。故使者之來。亦喜與大邦之賢士大夫遊從爲樂。宏其志覽。而金君近園。藉桐胃之華。茂瑚連之器。逸躅抗雲。飛譽嚼雪。執當時之觴翰。識彼都之价臣。與朝鮮侍郎申紫霞。有瓊李之貽。僑札之好焉。申君旣歸。其門人李子絳。茶聆而慕之。神期若一。兼葭有思。賞契所欽。蘭桂自郁。乃折訊走幣。因申君達於近園。遐方之珍。先之以峻石一區。徑不盈咫。闌可窮握。靈寶千黍。寒暉百尋。清流自引巔。非潮而亦生。紅芷相縻。帶橫煙而欲滴。迥然如雨。蔚然如霞。至其嵯峨翕絕。若削若貫。眺碧樹於幽城。迥丹砂於天半。可以知海域奇幻。山川瓌麗之所煥也。若夫隱岫斂光。複陸俯彩。縣縣延延。十步九紆。如往而在。可以觀荒憬翔和。拱挹醲化之餘。埴也。咏北風者無攜手之歡。懷東人者有介石之誼。近園旣感遐侶。彌重他山。遂作斯圖。而余爲賦以永其意。賦曰。

紫天爲宇兮。流沙之陰。掌敷榮之眇曼兮。環奇碣之嶽岑。弔海濱而莫返。怨天闕之不我臨。迥去瀕洞。越

潺湲跨金甌。棲玉湍。雜雲百億。鬱兮盤桓。山有華兮石有蕊。送君子兮誓秋水。知懷衿之允拔。沈悲緒之無已。苦因風而不前。草蔽月而自舞。傷乘桴之孰從。魂寂寂而延佇。倚修幌之無極。若結紳而欲語。矯芳杜之初生兮。石能擊而下之。惟廣渚之流連兮。恐懸磬之難知。媿清佩之如一。雖窮陬亦奚傷。沐神交於飛虹。習瑤波之末光。嗟餘形之遠峙。撫貞介而不忘。裁絹素而爲悅。貌循覽之在旁。豈契闊之敢違兮。汨予心於石梁。亂曰。蒼蚪鳴兮丹室開。青玉爲案兮芙蓉承杯。願使容成駕九螭兮。登王母之笙臺。終窈窕而不見兮。抱薜雨而下來。

別知己賦并序

余以仲春之月。久客思返。言從京師。歸於南邦。良朋密侶。淒別難勝。載酒相送。匪朝伊夕。嗟乎。魂靡銷而不長。臆初陳以何已。張衡之思。今夕兮何夕。宋玉之賦。非秋而亦秋。雖無蘇李臨觴之怨。而有莊惠解帶之忱。涼月欲升。修日未落。橫咽水於東西。緒愁雲於南北。曠遠期者。人百其感。黯行塵者。或二其毛。哀樂未迨於中年。嗚嗚。乃生於春半。別之爲累。何其永也。維時層篠鼓風。徑葉晝舞。凍梅斲雪。庭花夕陰。樽中之醴。清濁已分。天上之星。參商互見。況以恨骨易醉。迴腸難吐。僕之生斯世者。積二十有五年矣。毀齒而爲客。卅角而獨行。征車聞鐸。接夢寐之嚙聲。羈舍逢人。驚眉睫之異色。蓋有歲以皆別。亦無別而不傷。嗚呼。百年之期。倍此者四。繼是言別。累之以千。鄰笛短而宵漏沈。秦聲低而燕歌壯。載攀桃李。恐損孝章之年。折彼瓊枝。欲問當時之驛。若諸君者。或以折衝雅範。震耀勝流。賈生儒術。甲於此朝。相如文詞。無出其

右而辱斯譴劣。隨其末光。提攜誨導。相與成之。金石遜其精堅。肺腑亞其儔匹。可謂深矣。贈言盈篋。不無新製之篇。去陌牽裳。恐墮舊遊之淚。明月在鏡。照其清懷。停雲藹梁。譜此離曲。意有未酬。乃爲別知己賦一首。聊以謝故人之遐心。蕩予思之幽魄。云爾。賦曰。

伊蒙陋之陳力。奉君子之明塵。按河漢而輸彩。效珪璋而庇身。翳蓬姿之寡植。雖夙夜而靡申。感清惠之不遐。披寥廓而爲鄰。嗟予業之未旣。復濡迹以遐邁。春陰陰而畏寒。風颼颼而成噫。晤牽袂而永思。怨投簪之徒隘。日迨夕兮何速。樽與酒兮助憊。惟吾友之逞芳。肆令聞於廣居。或葆光於軌躅。或振妙於道腴。或揮翼而初儀。或戢足以自疏。攬靜芬於跬步。忘輝映於坐隅。彼碩人之相答。勗余志之高蹇。接寢處之爾遙。徵翰墨之我先。流晷短而易逝。去悰促而不還。懼休德之孰從。傷同心而遽捐。於是日光紅兮絳花落。鵲宵鳴兮烏入幕。滯離樹之千尋。指層嶺之百穀。惟初別之俄頃。若狂醪之決鬱。迨旣別之徂深。如疾疾之煩燠。賦驪歌於此際。立斯須而何加。感知己之繾綣。申余情之芳華。贈青棠以蠲忿。擲瑤瑟以生嗟。驚旅魂之不可遠兮。託軫想於蒹葭。

神樹賦并序

余既有粵征。道出皖口。以外舅宰桐鄉。遷道省之。淹留浹旬。游覽風物。見廨宇之左。有樹葱翠鬱鬱。高不可狀。至其下。則有前人之封護云。此樹久歷年所。風雨之夜。每覩詭異。人或汗之。輒得疾患。余見其章榦盤礴。自拔千仞。且生傍公室。無壘巘復嶂之順其宜。有桁楊雜穢之迫其性。而能挺然不滓。自遠於物。亦

足嘉也。抑豈假人名德，有如召公之甘棠哉。或得於天者獨厚，而蘊於躬有所珍。故若此其矯矯耶。人有請賦之者，乃爲之辭曰：

嘉植卉之黝黝兮，迺託產於官畿。何中峙以闡秀兮，又抗莖而成圍。展不察其初育兮，嗟人壽之易違。彼振芳而漸萃兮，固榮色之相麗。修榦郁以箭簦兮，夸條分而含錯。翠藻扶留以婀娜兮，落英蟠纒而綺縟。左迴翔於勁颯兮，右拱吐於朝旭。緬春翹之能敷兮，況秋繁而不索。聞獨鶻之哀號兮，覽祥鳥之孌婉。羈雌結而爲宇兮，游駕翺而旋返。上旣馭莎以受澤兮，下亦菴藹而布遠。素陰亘於疏途兮，斜標衍於九畹。伊茲樹之茂堅兮，信有寄於高隅。越百尺而不斂兮，中繩墨於公輸。庶垣闔之媵轉兮，諒斤柯之皆撫。奚復顯其頽頽兮，致奔駭於懦徒。豈汗漫之夙游兮，或蛟蜮之所居。永言被此異稱兮，亦安所保其禎符。蓋仰太虛之扶光兮，擅真氣之別茂。惟偃蓋之莫移兮，聊自解於剝瘤。感生理之終休兮，嗟蘊材而希覲。近曲庭之相倚兮，又何規遠於瓊岫。曰自貴其儀質兮，拾雲蕘而疏霞藻。鸞鳳棲而吟嘯兮，顧何取乎浮螳。恐凡瑣於廡下兮，致鑿翳之爲訾。迺布潔而躬疏兮，敢競誇夫姣美。擇丹瑣之瑤華兮，帶芙蓉以爲裳。君獨奏爾瑟琴兮，我更抒其文章。握雜佩之陸離兮，得假馘座之明光。畏景炎之迫君兮，進廣陰於蒼蒼。怨葦施之無所陳兮，鼓寒颺而傍皇。羌甯愛其零露兮，將揖天闕之琳琅。噫夫獲庇於一周兮，懷嬋娟之永也。固審夫孤榦之不揚兮，愬而爲此穎也。迨神化之不可究兮，俯旨茗之在卮。先苒染而攄蔡兮，望山川之遐蹤。余第矯其能貞兮，傷此心之所同。

感役賦

假永日以舒眺。遣軫結之沈懷。覽周原之接旰。循節物之孔偕。柔條鬱以成林。薄卉腓而靡涯。感候蟲之異喙。寓時鳥之呼儕。嗟余躬之久役。失流景之徘徊。瞻元燕之來賓。見汀葭之萌秀。迺羣類之已周。又靡靡而改茂。企歲星之復旋。逾四序而迭奏。何征人之永違。若浮梗之忘舊。嗟豈舊之敢忘兮。亦迢迢而不舍。邈雲螭之前驅兮。既吝藏而莫予假。層陰欲阻予之轡兮。薄霧騰於中夜。勉忼慨而將前兮。又依章而相謝。彼鳩草之在原兮。羽翼當之而悴傷。繁鳥懼罹其咎兮。爲斷駕於高驥。良朋哀其汲汲兮。設醴酒而饋瓊漿。展我情之固竊兮。悲不忍於巖霜。擘飄袂以下視。歷寒炎而改色。愁爛熳而流長。恨崔隕而山積。惟幽怨之削肌。况鬱思其銷骨。思百折而莫窮。意萬轉而能折。犧樽遠而不御。瑤琴毀而孰調。昵親好於逆旅。就執鞭以爲僚。實隱憂之中蕩。髮蓬葆而已焦。攬明鏡之末光。驚眉睫之下撓。朝幽并之曠墟。夕秦邱之元壤。迨奔皖而跨豫。對江皋之宿莽。彼土矯而情殊。亦謹疾之無黨。束孱躬而言寄。恐蜮阱之迷惘。欲毀方而瓦趨。又詆挫而見搶。搏九天以不下。遂飾緇而措網。恆抱景而孤遊。意蕭颯而悒快。誓渡湘以遠歸。閉閒關以自廣。緬在昔之明哲。莫不瘝心於世離。矧余情之枯槁。徑晦迹而絕羈。倚結幹而替感。摻玉珮而嚶吟。攀薜蘿以蓄慮。聊宣列於繁辭。

蔡澆霞太守煙雨倚樓圖賦并序

澆霞先生。清選雅望。著於中朝。官禮曹十九年。出爲延平太守。有懷故鄉湖山之勝。作煙雨倚樓圖。予賦

之以申其意辭曰

初霞頽兮。絢越江之千里。舉回波兮。杜若綴浮岑兮。文梓攬絳裾兮。朔遊鼓蘭柅兮。西汜雲旗眇兮。雜岫寒芳日漾兮。落花紫瞻層闕兮。蒼蒼荃獨懷兮。美子綠鳳兮。始升赤虹兮。在庭瑤闔兮。周匝碧樹兮。瓊瑋隱薜蘿而頽眠。恨曉霧之乍明。感斷緒之縈迴。若重關之既扃。魚何勞而逐翳。鴻何慕而栖汀。於是眺故嶼之靡窮。眷修途之易阻。憶剡溪以硠礚。企桐廬以容與。愁嬋娟之未達。躡招搖以命汝。倚長劍兮海濱。蒼荷蓋兮江之滸。秋風兮瀾瀾。戛而來兮。偃而逝兮。君心盪而不懌兮。願何須於雲之際。關丹牖兮。百重託芳靄兮。終契爽籟起兮。神飄幽陰濛兮。情閉贈明璫以置懷。蹇奚待乎朝霽。若乃繚辛夷。疏石蘭。坐綺閣。循雕欄。十步五步。惟聞霜湍。怳怳歸夢。烟波夜寒。思天涯之峻軌。審知音之良難。歌曰。湖光灑兮。中欲渡。歡邂逅兮。與君遇。蓼花紅兮。君所居。枕蕙樓兮。守予素。芳草豈復遠人兮。漑溥溥之秋露。甯駕澤車以下上兮。勿徒懷乎故宇。結桂軫以絕遊兮。展蜺帶以延佇。亂曰。煙淼淼兮。雨浪浪。樓中人兮。不可忘。羌絕世而獨立兮。余跂領於瀟湘。

玉鸚鵡杯賦并序

周君鑑湖。觴余於曲室。既酣。出其所藏鸚鵡杯曰。此器潔而有容。文而克粹。庶可以比君子之德乎。子其爲我賦之。賦曰。

伊寶盃之焯爍。體量采之奇英。孕稷翼之崇巘。曜沂水之迴陁。守純璞於永禩。遵良工而始瑩。落重重之

石藥飛。雪。雪。之。寒。瓊。爾。乃。虛。中。受。刻。因。材。聘。巧。取。範。流。霞。棲。形。隴。鳥。翼。斜。舒。而。不。斂。味。抗。舉。而。縈。繞。炯。晃。發。乎。內。彩。璘。玢。涵。於。外。藻。澹。春。花。兮。若。浮。凝。晚。霜。兮。逾。重。軼。槐。里。之。碧。尊。欺。扶。桑。之。銀。甕。瑕。久。琢。而。成。文。器。雖。珍。而。適。用。既。蘊。物。以。彌。深。亦。傾。憤。而。能。縱。爰。不。脛。而。遐。邁。乃。遄。登。於。玳。筵。沃。九。華。之。妙。醴。冠。百。列。之。嘉。籩。名。姝。捧。而。袖。綠。勝。客。進。而。衣。斑。目。眴。迷。而。乍。轉。意。矜。持。而。不。前。肇。黃。流。之。潤。色。挹。元。醴。之。清。妍。羌。一。酬。而。再。醉。悅。禮。義。之。我。先。彼。誼。嘷。而。噓。噴。亦。斂。辭。以。畏。讐。至。若。珠。露。依。苔。弓。月。入。牖。襜。接。良。儕。坐。延。詞。友。玉。琴。兮。橫。徽。翠。管。兮。解。綬。祕。笈。兮。可。探。清。譚。兮。徐。剖。於。是。卻。飛。雲。之。轡。揮。鳳。足。之。卣。欣。此。杯。之。獨。御。引。芳。醕。而。爭。受。氣。氤。氳。以。中。人。光。煜。燦。以。在。手。淇。秋。蘭。兮。香。始。升。綰。同。心。兮。歲。月。久。藉。昭。質。之。無。虧。銘。眷。言。之。良。厚。亦。臭。味。之。永。契。兮。豈。瓊。華。之。鮮。偶。彼。其。揚。光。上。國。馳。聲。洛。都。題。延。壽。於。金。闕。陳。常。滿。於。瑤。圖。縑。以。龍。文。之。綿。承。以。絳。銑。之。附。酌。漢。主。而。仙。至。宴。魏。使。而。禮。殊。蓋。運。會。之。有。俟。固。韞。匱。於。厥。初。弛。芳。情。於。斯。辰。委。君。佩。兮。未。遠。假。琬。液。以。託。素。庶。春。波。之。相。款。苟。一。酌。之。莫。酬。兮。思。偃。側。以。荏。苒。結。惠。纒。於。千。里。兮。朱。顏。酡。而。帶。緩。琉。匣。閉。以。曠。時。兮。顧。美。子。之。繾。綣。乃。知。夫。容。之。滿。室。兮。芬。不。足。以。爲。之。盥。也。

倉山月話圖賦爲袁闓邨大令作

青溪舊宇。徵君小山。鍾乳溜徑。雲衣繞關。檉柏廣蔭。花藥迴環。劉公之所經始。沈侯之所遊盤。聞幔亭之仙樂。悵駕鶴而未還。乃有蘭成逸韻。山陽勝侶。篁岫朝款。蘿陰晚佇。散髮巖阿。澆巾幽渚。麗藻連觴。清言薦塵。副濠梁之雅契。傲滄洲之客主。情醪醪兮不選。神淼淼兮先舉。金波搖漾。滌其素襟。空碧無際。忽見

遠岑延以綺榭。鏘然玉琴。子有流輝。我無遐心。徙倚兮庭樾。飄飄兮桂權。鏡瀾兮明瑟。冰鱗兮騰越。俯落花之在茵。仰閒雲之出嶠。忘修夜之已闌。息羣言於獨妙。彼達士之拔俗。固人事之可遺。乃華曜之易貿。念昔游之莫追。光荏苒兮元珠。抱曠逸兮素絲。襲真人於天際。揮豪翰兮永思。歌曰。偃佺誰與期。松子非吾友。芝朮貴談討。金石保永久。秋風颯兮秋月涼。企江國兮心難忘。隔千里兮共此夕。吐蘭緒兮攀扶桑。

古藤賦并序

東坡自嶺南歸。寄居毘陵顧塘橋孫氏宅。卽余家四世寓廬也。其東楹有紫藤一株。傳爲先生手植。幹大十圍。天矯如臥虬。層蔓飛翼。蔭庭院百武。蓋余猶及倚翫其下。至嘉慶乙亥。厥根朽蠹。遂俱傾落。所存僅纖條。大不盈握。而生氣猶茂。迄今十餘年。亦已蒼鬱。檐杪本枝徑尺矣。自宋至今。幾七百載。膏脈未絕。爲世珍異。洵名德之所憑。有神物呵護之也。庭有嘉樹。古人識無忘焉。況此藤之奇古。託於昔賢之手澤。又復爲吾家之故物者耶。余雖不敏。輒爲賦之。其辭曰。

爰有貞卉。崔錯凌虛。春條旣擢。夏蕤以舒。蘊兩儀之菁采。緜千禩之榮華。非喬松之是託。倚磐石而不渝。爾其逸幹輪囷。孤槎蟠鬱。體同青銑。色欺蒼玉。風梢旣引。霜皮暗蹙。擬潛螭之偃蹇。類尺蠖之蜷縮。忽擎攫而欲舉。又宛渾而自伏。雨雪助其豐翳。曦陽斂其堅樸。若夫紫萼初吐。絳鷺始繁。亭亭高榭。猗猗曲欄。明霞朝覆。珠露夕團。羨濃芬之菴藹。耀舊影之叢駢。密葉舉以成幄。柔絲纈而爲藩。映新碧於綺疏。舞落英於玳筵。惜芳華兮易逝。忽荏苒兮歲年。閱榮寂兮旣久。挺茂質兮莫攀。產不同於剡溪。幸永辭於剪伐。

賴君子之末光。比甘棠之遺烈。謝絕澗之妖蔓。殊窮崖之萌苗。迺委蛇於連館。保蒼蔚之清樾。維南陬之雅郡。有通德之故閭。戀桐鄉之惠愛。師季彥之僑居。翫佳植於名賢。時徙倚於廣除。或移談而就講。亦假蔭而陳書。洎余身而四葉。又垂穎兮百載。嗟本實之先撥。喜紛紜之未改。念人事之代嬗。知化機之是宰。何獨鍾於茲榦。振芳菲於魄礫。物雖微而有值。澤雖遠而不忘。彼藟木之多壽。藉明德以克彰。感孤根之荏弱。含霧秀兮中藏。耿獨立之是懼兮。恐隕墜於繁霜。何所憑以滋且永兮。庶仰承夫餘慶。撫庭柯而太息兮。展時序以彷徨。

萬善花室文稿卷二

懷遠縣重修塗山大禹廟碑

夫乾曜奠化。庶彙宅躬。榛豕兆蒙。亭毒燼起。原自驥首。霧若受圖。而秉元龍。顙神昆承。華而纂辟。尊盧赫胥之記。譙明祝誦之躔。固已權輿帝象。細縵泰壹。金鏡朗乎六合。玉券書其十華。而運徵蒼昊。事遠黎黔。嗟矣荒屯。鮮可稽尙。降暨五德。紹駕九招。籥和迪迹者。上聰宰治者。迭聖析綴。葉而耀暈裳。準結繩而鏤蠶簡。創因開味。茂於黃炎。踵麗鑠文。訖於陶媯。世紘以依。清濁以治。然而陽九。遘災元二。履厄平壤。震汨崇陵。懷襄洪流之堙。放勳所不能濟。巢窟之衆。虞詔所不克諧。亶惟夏王。肇闢昏墊。美哉禹功。明德遠矣。粵夫有莘。啓哲高密。誕祥星精。貫昴木之宮。石紐叶神珠之瑞。執威樞之柄。玉斗入胸。戴經極之珍。鈎鈐在首。錫嘉名於文命。奉冥漠於元符。觀奇表之所鍾。固非常之聖也。時則息壤用廢。滔天未窮。九載旣勤。弗又其績。四嶽僉咨。乃圮其族。白馬傳刑。唐廷所以速明效。黃熊避策。羽淵所以顯幽祇。禹乃傷前勳之不彰。懷厥考之成勳。於是應明徵。續世業。升石夷。理寰薄。苦身焦思。胼爪胝趾。酷認懊咿。悵勞繁慮。巾挂於道。履涉於淵。跨巨浸。則龍鼉以爲梁。踰翠岑。則明虬以爲御。行迨徧乎濛汜。惟不踐於羽山。而後丕烈綏肆。遺蠱弭忘。使方命之臣。配郊於顓頊。汨陳之罪。奏德於皇天。養至渥也。報至純也。故天下咸知大禹之孝。以爲逆瀧之奔。非真宰不靖。彝倫之敘。非探蹟不獲。達其變。乃能窺天地之藏。致其精。乃能究通塞。

之界。於是東觀濁河。而巨霧獻綠字之箴。西至肥水。而長人授黑玉之誥。乃復案歷中經。管求宛委。解於陽沔。厲於衡嶽。惟神弗諗。再覲始逢。蒼水使者。銜關詔而趨迎。黃帝巖書。黼籠庭而發秘。金簡瓊函。瑤編銀瑒。巡水之源斯備。衍瀆之旨具稟。苟非智瑩形析。合契下鑿者。曷以臻此。故天下咸知大禹之誠。至於沐日浴月。流江決河。家久旅而若忘。門習馳而不入。蘊垂負掌。橈楫乘泥。斬高喬下。鑿於溟洋之墟。沙軌山樛。泄夫孫皇之寶。是以濡不給。挖脛不生毛。裸人因之而來歸。祖女見之而太息。辛壬荒度。呱呱者棄懷。庚子嚴齋。頽頽者候夢。故天下咸知大禹之勤。若其治呂梁。修大陸。創堯岱。底雍梁。則登乎孟門之上。載乎壺口之安。南自華陰。以滅高阜。東至底柱。以疏峻流。敵爲九河。奠於三門。太史湧而有常。徒駭潛而曲指。於是穿雷夏之澤。決滎波之滌。彭蠡震澤之大。以蓄其壘。汝漢濟漯之濱。以滑其駛。流沙寫弱水浮。積石延寒谷引。青泉丹沼。順乎五行。赤岸黃支。排乎四海。使鶉首就粒食之生。魚民返甸服之處。共操耒耜。告成賦於中邦。爭息閭閻。得庶土之交正。故天下咸仰大禹之功。夫民非食則不育。食非土則不植。所以惠莫廣於濟元元。澤莫近於拊饑渴。地鈕旣缺。二帝謝平成之基。濫觴未修。百王辭廣衍之斥。惟能種水豐物。爲萬世利。故天下咸知大禹之仁。蓋自有熊問道。徒劍履於崆峒。虞氏陟方。攀弓髯於梧野。非絕迹之能溯。矧寓內之未周。降至後王。或勤外略。戴勝虎齒之域。穆滿曾游。頭痛身熱之區。漢武初啓。未有暢垓埏之廣。踰血氣之親。毛龍在前。飛菟屬後。順則鳥獸咸若。怒則百霧請命。桐柏之君長。稽首而肅兵。龍關之華胥。褰衣而示卦。奇肱三面。窮髮九津。銘之岳瀆之經。疏爲山海之記。故天下咸欽大禹之神。且

以叢善之當烈也。舉益使治之。而距海距川之患刈矣。以稼穡之宜播也。舉稷使務之。而艱食鮮食之呪奏矣。童律狂章之徒。制其水怪。鷓脾桓胡之魅。授之庚辰。皋陶則拜厥昌言。太嶽則羅爲心呂。改天下咸知大禹之明。由是覩土觀地。分州殊方。聲教所隆。要荒是暨。豎亥把算。二萬八千餘里。大章展極。五億十選之步。渠搜貢珍。蠡之裘。后土錫蹏蹄之獸。愆餘相柳。羣帝升臺。印檢元鬯。環牧享鷓。德有及而不治。道無納而不徇。故天下咸歸大禹之化。鼓之舞之。不軒不熹。偉矣哉。甯澄之綜敘。而亶羈之藻溢矣。於是鐘山燎祀。升中於天。陽翟秉圭。職成於帝。天方申其昆命。帝亦去其菁華。疾風迅雷。彰於笙箏。持衡擁璿。調於馨虞。蟠龍憤信於其藏。元龜協吉於先定。共遷虞以事夏。乃猶謙讓而未遑也。退處陰河之北。陽山之南。避嗣於商均。遜賢於成伯。旣僉同於朕志。始受朔於神宗。故天下咸知大禹之讓。時乃榮光興。慶雲集。百工相和。六府孔修。赤文負圖。黑風會紀。則維貴爵而尙齒。先賞而後罰。面稽天若。頌小正之時。依永和聲。譜大夏之律。鉤車綏旆。命相土以佐任。毋追深衣。禘黃帝以宗駘。朝據饋而趨土。夕揮鞞而求言。貨幣泐安邑之文。金貝鑄歷山之國。折額疏狄。俯袂泣囚。三年而百姓以遂焉。五年而天下復樸矣。然後稽時巡之制。而大會諸侯於塗山。斯時也。肇用大輦。載乘余輪。雄虹建旌。鳴鳶揭幢。元璧若月。丹珪如日。紛紛回回。肅肅雍雍。羣后齊趨。霧神並致。十有二州之殖。罔不覃懷。千八百國之臻。猶爲枝屬。蓋執玉執帛者。萬以爲計。儻干儻冕者。日中不遑。左應矩而右應繩。擊爲律而身爲度。塵精精於名岫。羊玉表虔。施彫勒於朔宮。雞彝瞻潔。則有防風後至。亟徇兩觀之誅。屈鷲不恭。威徙三曾之伐。神姦咸攝。魍魅莫逢。是以大

陵比享。俎豆於馨。橋廟同規。粢盛盼饗。此塗山之崇祀。所以閱億載而無替也。爾其山之爲狀。則高衍提隘。登降剡施。翠嶂疊修。瓊巖迴峙。勢峻嶒而獨宏。形沌渾而不鬱。用能蒸電流颯。膚雲澤穰。氣奔蕩於千里。霧汨通乎層霄。挽壽春之上流。鎖維揚之巨鎮。望嚴則衡峯遙佐。地崇則岱嶽可循。爲坤軸之所必爭。天輪之所必奔。原夫山之始也。脈聯荆陽。湍激淮右。軫石完婁於其陂。狂流滔湧於其際。禹乃奮功。鑿而洩之。刻石確磈。鑿燒破析。盤渦旣順。疏峽就夷。故二百十丈。控淮之全。四十六里。對荆之阜。金樞舊穴。昆明之劫灰猶存。雪岸浮沙。伊闕之斧痕夜泛。林樹森起。若黼黻而朝。芝蓋英飛。得冠裳之色。是則樂聞截竹。奏於禹會之村。紛合珠光。拂彼啓母之石。塗山之盛。煥矣如此。而或者謂越裳甲楯。卽鼎湖龍去之鄉。蜀路蠶叢。亦玉泉負屐之地。遂疑余山於渝嶺。並遷神蹟於會稽。不知披輿圖者。剖古今之分壤。考王會者。辨大小之受共。自太原宅都。晉陽徙邑。壞城平池。焚兵散物。朝端建鼓。車右立綬。夫五載巡狩。有虞氏之制也。四方會朝。夏后氏之盛也。立天下之中。以乘天下之望。而諸侯之士。不留於道路。藩維之臣。咸懷於天威。豈復率九陽之辟。同問道於巴川。捨七表之風。獨垂裳於越絕。是塗山之可證者一也。至於禪封。潛霍。鎔鼎。條荆。導淮。則自壽春而北。以合乎渦。排泗。則由廣陵而東。以入乎海。游泳譙沛。疏鑿翠夔。非混混以無稽。皆班班之可指。豈復先後殊其地。而終始易其名。是塗山之可證者二也。且夫候人待娶。實號嘉夷。女媯來歸。爰妃令德。成室台桑之野。我造彼昌。孕貳轅轅之年。度功弗子。雖綏狐之說無徵。化熊之言亦誕。而江淮昏禮。尙沿辛甲之辰。濠右壻鄉。終譜南音之曲。是塗山之可證者三也。至於刻水遺墟。景

棧鐘之制。山陰故宙。傳大計之名。禮典本合乎省方。敷試或隨乎駐蹕。壇園域樹。滋後論之偏疑。假葬衣冠。嘆前王之不復。此皆推帝紀而足憑。求夏歷而能祿。雖少康紹業。中興窮髮之鄉。句踐仍封。創霸文身之俗。而黃圖迥別。紺谷誰移。是塗山之可證者四也。惟是華殿棲神。修除承享。蘭橈奕奕。松栢閑閑。陰映瓊臺。凌乎清都之上。玲瓏石闕。幕乎秦時之中。藻畫扇閉。遠絳雲華。觚棧夕張。來咨風后。徒觀其枯槎千尺。幽篁百叢。元霧重陰。闕颺生嘯。檀癭磊砢而垂乳。楓鬼盤拗而擎莖。複道霓合。楯軒霞譎。丹柱歛翹。飛鳥企乎明堂。文陛逶迤。暗虬屬乎岡嶺。洵栖真之祕館。觀上古之彤庭。然而閱歲愈遼。庀工漸圯。層櫺剝蝕。懸棟離披。蟲落星枿。恐毀螺書之什。翼頰斗拱。遂愆鳳舞之儀。何以肅共明禋。齋嚴報秩。懷遠縣知縣孫君讓。以嘉慶十八年到官。救乏振滯。修廢舉墜。安養阜成。勤恤民隱。寶寸陰之訓。勿懈厥躬。懷朽索之箴。克慎庶獄。歲奉朝命。聿修祀事。陟降在麓。憬焉以思。深懼夫聖王頌祇之所。弗眷於遐。國家薦歆之典。將委於地。且謂捍淮之衝者。莫如塗山。弭淮之患者。莫如大禹。迴瀾其父。孰迷瓠子之歌。高澗不窳。猶據青泥之篆。惟我昭代。敷文玉鏡。協瑞河圖。蟻珠浮於三洲。金鼎出於二峽。守斯土者。其可不答揚休。祐用布几筵。塗墍巍峩。鎮茲水府也哉。於是選材如雲。構梁不日。大哀役徒。親佐舂鍤。虛檻咫尺。凭其周垣。省闈五重。駕乎峭壁。步武依世室之制。徑園遵夾牖之風。零陵廟前。空鼓琴瑟。曲阜祠下。自闢荆榛。安足比此清鏘。方斯煜燼。大矣美矣。輪焉奐焉。蓋經始於某月日。落成於某月日。鳩工若干。計資若干。禮也。然後天儀穆穆。廡仗森森。貝瑱珠間之飾。以資其華。茅茨土階之平。以返其儉。祭則山嶽嶷。玉奈金漿。旅實

於庭。任土作貢。馨香馘達。昭告維虔。謀勒豐珉。以誌不朽。乃徵下士。俾抒其文。履錢化人。毗迹蠻服。欽忱綴學。但識夫追蠡。探奇欲窺於洞穴。竊嘗溯源馬頰。乘葦龍門。道夏陽之邑。而搜吉金之遺。謁祝融之峯。而臥穹碑之下。懷容猷之浩浩。攬舊甸兮茫茫。詡揚易隘。贊述難名。則惟推崇德報功之鉅。記維新創造之庥。雖敘績於偏隅。庶追聲於匪頌。來瞻聖域。闡宣尼無間之言。載鏤巉崖。繼子厚留銘之石。銘曰。二儀習坎。參漏乘乾。天水氣蘊。人魚道旋。湍河覲帝。禱麓循躔。苞麻惟御。洪範則詮。三仞三沮。六沴六事。淳瀨以漾。瀝澗以漬。葱嶺派九。滄嶼函四。陽鳥攸居。裸蟲丕被。填災援沈。心療形瘠。河壇飛錫。亥旣奉珠。風驚鶴涌。水起龍扶。吾誠不忒。疇敢以渝。乃作司空。平成覆載。乃總朕師。經營華外。干羽格苗。絲竹感瑞。天下爲家。酬勳弗逮。信彼塗山。維禹甸之爰始。導涯激蕩。嶮巖中審。山脈剖而爲歧。伏淪恬源。通泗會沂。磅礴縣流。煥爛綺錯。海潛東鍵。河渭南絡。登詔藩后。述職方岳。瑀戈董威。鈞車效樸。遠陳龜壁。甫棄舟航。礪砥砮丹。織縷篚筐。靡壤弗臻。惟德是翔。粉藻灼灼。馨管鏘鏘。脫屣一朝。扇薰廣運。朔正貿遷。蒸嘗迭晉。谷峙淵和。天鈐海潤。遺簪九服。燔柴千仞。荆淮之中。宅有幽宮。翳彼白日。颯然神風。松楸瑟瑟。岡阜濛濛。元武映北。紫燕朝東。荀淑宰懷。史晨相魯。肅焉如在。惕焉恐侮。爰究爰度。式壽式舞。沈沈壺奧。鬱鬱庭廡。斟明水兮椒盤。叩蜃窗兮揚鑾。巫善步兮山址。蛟不鳴兮江湍。淮有茅兮茅三脊。藉桂酒兮貢黍稷。惟神致繪兮禮樂諧。奠淮陽兮鞏皇國。刻桷兮丹楹。戢庸兮順則。引齡兮無極。視此兮偉碣。

臣聞皇極之建。聖王執圖。綜德迪化。體道守度。以順乎天政。備乎天養。而爲天下先。爰是錫褫祐之符。晉曼壽之策。滂沛沕瀦。布濩闔澤。上集其休。下賁厥福。灑灑奕奕。何遠不格。懿哉泰初。攝提兆其端。成鳩得其籙。紀齡以億。猶有奇羨。說者仰夫。竄始以爲莫可釋矣。降自授時垂拱。羅於方冊者。凡二十有三氏。秉位遞運。分典垂聲。淳漓攸界。暨穆乃萌。然後上帝。昭元化。翊景運。以式啓我聖清。惟聖清之受命也。霧貺氛氳。寶祚充衍。朱果馥林。彤雲布甸。世德神武。浩穰駢闐。傳十三之遺甲。掃九性之強藩。是建丕業。來蘇垓埏。四聖相續。載巍載煥。德亘斗極。功造天關。植基區夏。景揚萬年。欽惟皇上。紹天參軌。合太乙之神履。黃中之美道。凝覆育仁。感顧謏克。以膺當陽之正統。受傳心之茂祉。昭華之玉攸歸。金緘之匱可紀。於是乎。賚大命。孚天哲。虔鞞左右。勞謙日夕。放準循繩。而八表該。拊木引綱。而百端直。滋洽之惠深。敦龐之化謐。秩秩乎至治之勤務。可得而述也。欽若昊綽之臨。聖敬日躋。上答於南郊北郊。青壇翠幕之陳。瑄玉嘉籩之薦。震動恪恭。鴻文抒誠。報於天眷。隆祈穀之儀。率加推之典。封終南而列嶽光。禮古帝而百神宴。靈鬯協辰。歡臚福珎。至於匡飭煦養。敷夏蒸黎之功。有雲蔚風行。綜核質文之序。廷燎嚴乎昃旦。更籤警乎當曙。勤政之論。炳於典籍。刻漏之銘。輝於記注。乃召方牧之長。對親民之官。拜颺大庭。聖訓是頒。戒以慎勤。導以慈寬。春臺熙樂。衽席乂安。帝念民瘼。爾饑爾寒。曰有獄訟之勿平。爾其陳時臬。有祁暑之或過。爾其告用亶。故均禧叶慶者。鏡宇歌謠。遐陬元靜。朕垠砥屬。要荒遯聽。乃御玉輅。載華旂。遵時巡。省風詩。蒞興京。展孝思。蹕方普惠。禮官正儀。致謁乎松山之陽。蓋清甯之首畿也。奉几筵之奠。企岡陵之遠。洞洞屬

屬容藹而辟退而問風察音悅其敦摯習國語之和威弧矢之利書事燦奎文之華大禮著慶成之記所謂親親至恩尊尊大義惟聖皇之恭孝克通誠於寤寐若夫天駟馳西招搖在東幸析津之直沽登紫府之五峯循秋獮之盛烈蒞木蘭之行宮虎賁雷動豹尾雲從秉矛乎花準合嘏乎唐弓豪獸繫乘奔羽踢空蹈藉陵踐摘伏追蹤雙骼共楛一發五縱覲名王以犒樂集甌脫端宿衛舞修橦簡精銳天威旣振皇情亦契固非第順夫豫遊之候亦可以申猛氣續戎功而講武事也且我國家以武德闡運殊勳偉猷小徵大匡授兵符於金闕穀神弩於玉堂籠靖海寓蕩滌回疆三百六度積其算九十萬里開其方皇上神謨內纂天聲外濯七德是苞四維咸若翦蠹除膺收鋒斂鏑拓麻里開卡述平雷波擒烏石磨瞻對逋魯特闕瑪蘭攻羅克實至仁而有勇斯戡亂而懋績丹水勝而叶簫韶朱旂轉而蒙干戚是以車書合於十洲枹鼓安於九譯嚮風者接武率職者銜襟燭龍火鼠烏弋雞林陸馨水慄獻寶納琛牂牁冉孺南平東謝之國修其儀琉球俄羅呂宋日本之長厥其角請朔謝封之使踵於途侍子胄士之倫躋於學舍生之類靡不濡渥皇上乃御黼扆以治之詔宗伯太常以禮之錫幣帛燕樂以饋之設費字雅館以肄之卻珍奇大玉以惠之天下豐矣遠人至矣遂又緝熙右文覃敷典藝陳籍錄圖博覽多識研究六經琢磨百氏釋奠時聖同揆淵智俯幸瓊林優游講肄申命儒臣經撮史鈔齊馳玉軼揚路金鑣上媿宛委中規姒姚總唐文以千卷固無微而不昭澄是非於往古鑑得失於前朝石渠寶笈緗裘丹標文穎雅頌明珠大珎皇上躬演睿思彰施麗藻駕黃鶴之歌逾神鳳之操三集蔚炳雅詞典邵咏全史以錯綜發麟經之樞奧

郁郁乎禕哉。固彌綸該洽。日華雲爛。而無不曜矣。夫天人泰和。會極也。美利不言。茂殖也。下武嗣昌。孝德也。天功時亮。陳力也。聲教攸暨。廣闢也。文德熾隆。懿策也。皇上猶乾乾夕惕。持之而不盈。置戒慎之鞞。勒恭壽之銘。敬誦實錄。味爽丕興。義利是辨。因循是懲。上瑞鑠應。抑而不稱。然而東風入律。南壘表旣。囿五采一角於郊。馨元秬黃。葵於鬯。延嬉格於泰壇。霧液蒸於仙仗。二儀璧合。而杲映。五星珠聯。而晃漾。燭焉彪焉。觀者翕釋以咸暢。若是乎皇上之以總和假於天。而天之以百福臻於皇上者。斯其兆歟。今以祝釐。亶安之歲。恭值皇上六旬萬壽之辰。實龍飛嘉慶之二十有四載也。乾亨坤慶。氣調時樂。羣臣合詞而進。曰。皇上聖德。怙冒中外。禔福庶績。其凝羣生成育。遠至邇安。一意同欲。泰元增其神筮。山川襄其菲祿。仁祚之永。祥祉之全。滂洋錫羨。卓犖蟬聯。緜緜翼翼。於萬斯年。凡在壽宇之下。莫不翹頸企踵。拱望丹陛。翔洽聖嘏。以忭以延。恭惟皇上舉慶典。納頌聲。介觴稱壽。臚表遂誠。於是復普駿澤。施大賚。播嘉禮。廣錫類。命詞官以升中。展宗牒以溥惠。寵覃封以廣孝。優耆年以保艾。祥刑弛於簡憲。正供蠲其積貸。恩榜選於俊髦。坊帛旌其孝弟。煌煌恩款。十有六章。自上下下。其道大光。丕天之豫。戩穀無疆。康衢之童。華封之叟。含景醴飲之民。卉儀羽族之耦。颯風溫洛。蹈德隴畝。沐仁海而忘乎津涯。戴壽山而量乎高厚。以爲際斯世之盛。固生民之未有也。臣之愚陋。不足以雍容揄揚。然猶以世掌綸誥。習聞掌故。獲欣親乎寰宇之彙。慶聖壽之繁昌。且臣受恩至深。懷封圻之任。職在宣敷。邇治而不克詣闕庭。隨祝釐之班。仰首懼忭。不勝微忱。敬陳延洪之緒。侑以萬壽頌一篇。以獻頌曰。聖人基命。日之在中。元氣鼓潤。惟感斯通。璇璣玉衡。幹

化豐融。資威洪。祚承顯。攸崇。軒烈譽。漠有嚴。有翼。我皇受之。幾康永。勅星紀。再周。聽觀母。敦禮交。樂應。周是敷。錫羣元。仰契養。以衢尊。肴覈仁。義吐哺。含飧。四生既得。八節咸。惇。縣區雖廣。飲化銘。恩。孳之育。之何生。不蓄。願之復。之何應。不速。月竊。賓裳。風輪卉服。結轍象。背。駢羅典。屬。丕猷。具煥。告祀太儀。翳穹。胎蠻。祐福兆。祺。皇占雲物。甘雨祥。曦。皇祈豐年。九穗雙。歧。重熙克治。報成烈祖。格時孝。享。穰穰來。祐。四方攸。同。惟皇是。撫。本支百世。惟皇是。怙。怙之益。厚。匠成。噢煦。撫之益。勲。休德矩。矱。餼加行。葦。燕歌。湛露。登選。俊民。寵榮者。庶。司農。上計。正賦。絀盈。皇曰。沛哉。予貸。其徵。司寇。執讞。奉律。持平。皇曰。宥哉。予矜。其情。浩澤。所介。嘉瑞。合宜。萬類。翹符。熙熙。填填。安樂。作息。聖人之年。聖人。仁壽。崇高。於天。上。廣。下。被。以貢。皇福。鋪陳。玉冊。誕獻。寶籙。懋哉。懋哉。率茲。九服。同詞。嗜聲。未罄。其祝。臣殷。燕喜。述職。豫章。恢崇。恩訓。對揚。耿光。敬抒。嘉頌。式奉。延慶。聖壽。萬年。永保。無疆。

萬壽頌謹序 代作

臣聞昊旭甯澄。錫祐之源。毋極。天民靜濟。葆和之量。斯宏。蓋惟神聖。踐承翼之端。睿詰運鈞。模之柄。金鏡在握。玉斗維權。軌世字氓。體元順緯。是以合萬年而爲一。范蘊八極。以奉三辰。隆昭運於赤寰。鍾景福於丹扈。固可稽諸顯德。而協於貞符者也。我大清之開業肇基。宅中圖大。龍飛朔海。鵬運松陽。白山朱果之祥。綠水輝禽之瑞。義圖軒鼎。出震始於大東。堯典舜謨。重光洽於區夏。欽惟皇上。膺上聖之聰。闡中天之緒。元辰受璽。三載傳心。守至道以儀人。炳神幾以燭物。五音暢律。煦動植之生。七曜遵行。照寰瀛之象。懿

網羅化自斟文質之宜。洪矩纖規不闡財成之迹。納羣元於在宥。覆總宙於同仁。日昭月融。川流雲蔚。猶且夕乾若惕。宵旰不遑。恭德契乎天心。容範式於祖訓。圖書乙覽。已停蠶漏之音。實錄寅承。始動雞人之唱。四推率典。早警農祥。五日凝齋。克頌藉禮。召分符而嚴職守。飭羣牧而重旬宣。一命之授。必親萬機之統。毋曠。是以翕和醇美。式序敦龐。衆績咸熙。天工時亮。填填之侶。欲忘司契之神。皞皞之區。共協合和之氣。至於義征不諛。武折遐衝。馭羣去害。馬之隄。養稼翦莠。苗之幹。三曾偉略。令授紫房。九伐天聲。勦成丹浦。齊斧麾而播耕不擾。捷旌展而恬野初聞。乃擒烏石。平雷波。開咽嚨。闢麻里。噶瑪蘭之拓土。布魯特之洗兵。投版爭歸。隨流而攘。於是九垓同軌。四海無塵。金鱗貢碧。碧罽之琛。玉塞奉白環之使。戴日戴斗。率職來王。太平太蒙。無思不服。千八百國。奉正朔之頒。四十九旗。列蕃臣之位。海市明珠之產。溢鮫浦而弗珍。莎車大玉之來。棄龍堆而卻獻。東序西序。侍子列於青衿。南庭北庭。斥堠通於丹徼。皇上綏之以嘉惠。沛之以至仁。荷寵錫之既優。見競絀之胥泯。遂又綜經典學。稽古右文。表六籍以憲章。陳百家而討論。微言探賾。盡宛委之所藏。精義窮神。積中經之未載。采珠船於藝海。駐羽蓋於翰林。纂千卷之唐文。詠列朝之詩史。味三餘而成三集。分八載而宣八風。帶鐫恭壽之銘。琴譜光華之頌。履冰之慎。金鏡先真。流火之時。木棉初賦。綈裘細襲。之麗。芸編芝檢。之全。人重璠璣。戶懷鉛槧。若夫大禮著慶成之記。展成昭書事之篇。則本聖學以爲經。抒思文以繼志。觀風皇潤。熙景祐之裁基。駐旆周京。瞻溥原之式廓。社枌之茂。歸通駿於前甯。鄙黍之登。告屢豐於十稔。此則時巡之制。獨企神游。睿鑒之宣。克彰世德者也。至若斗車東指。雲

罕西馳。曲淀青波。初日樽桑之域。中臺紫氣。化人貝葉之宮。水號通津。覃敷帝澤。山名如意。遙暢皇情。迨乎金律。風高。瑤天露肅。司馬奉梁鷗之典。虞官獻秋獮之儀。三駕三驅。作黃門之武樂。一遊一豫。沛赤子之恩膏。誓廣校於長阪。大合圍於漠野。龍驤萬乘。虎落千屯。羽林奮衛士之雄。區脫下名王之拜。武功歲肄。政覽時勤。省土覩於畿田。答封章於黼幕。甘棠宿麥。盡動天樞。望杏瞻蒲。實殷民事。大矣美矣。巍焉煥焉。神武至文之宇。禮明樂備之期。吉金珍石之和。函海陽春之治。天珍夙降。地瑞畢登。五緯珠聯。二儀璧合。緇文皓質。狎於坰牧之垣。銀甕珊瑚。溢於大庭之庫。馨禎圖之所繪。發祥譜之所臚。茲際滎河獻範。寶漢浮光。合五德之嘉符。彙萬邦之顯慶。皇上御天下之二十四載。恭值六旬萬壽之辰。川琛嶽貢。巷舞達飲。福嘏日浴。壽祺天介。北斗黃神之拱。聖莢周星。南山紫鶴之騰。帝紘戢穀。鳩年鳳紀。泰元增玉券之華。饒水鷄林。頂祝仰銀繩之耀。皇上猶持而不盈。恢之彌廣。升中圓繹。錫羨方顛。瓣香告神。瀆之濱。豐帛致介。邱之禮。璿源仙牒。恩承舞勺之年。菊澍耆英。寵賁建坊之典。鴻卻之陂未復。普貸官租。雁戶之賦尙虧。特蠲舊耔。駕羅在野。鏘鏘吉士之升。鷺序盈階。奕奕覃封之賜。一十六章之詔。匝宇納於蕃釐。萬八千歲之徵。聖人貞於皇極。臣學漸萃。擷職隸編。摩瀛海摛文。欽聖謨之精一。越江選士。播元化之穹窿。欣際仁壽之朝。敢忘詠歌之義。敬爲頌十六章。拜手稽首以獻。扣槃捫籥。用抒歸美之誠。刻竹引絲。謹拊矢音之末。頌曰。惟聖紹天。基事定命。璣幹已齊。瑤光得正。皇圖藻曜。帝階日鏡。德開道闔。動仁守敬。其元運丕厚。積洽重暉。欽哉四聖。式是九圍。我皇膺祚。光於前徽。大猷濬發。萬象允歸。其敬恭享祀。犧尊虎粢。庚拜辛

祈丁郊甲社。百神受釐。三階奏雅。精誠上格。以承天嘏。其翰簡垂露。戈鋌彗雲。武義乃武。文教惟文。化隆垂拱。德曼鴻芬。巍巍蕩蕩。爲萬禋君。其順扶天關。橫亘斗極。憬琛負賚。請朔奉職。皇靈誅蕩。是撫是翼。蒼兕輶弓。元蚪憑軾。其禮經樂律。陰端陽倪。宮儀聿纂。麟史旁稽。經筵帝典。國學天題。三集炳煥。勳華日躋。其六。攜宮謙慎。官牧是寄。酌於民言。咨於羣議。黛耜省耕。彤階選吏。勗爾百箴。俾襄邳治。其七。鈞陳駕秋。婁宿當辰。采謠施惠。問稼行仁。崑峯之巒。瑤華之輪。雲馳天御。日岫星津。其八。十年篤祐。孝乎惟孝。言蒞神京。瞻循複廟。玉耐昭清。瑤緘朗耀。鴻慶遐邇。明禋福苒。其九。爍爍嘉况。日采月浴。卿煙玉露。天馬河龍。瑞麟交角。文雉連蹤。帝命弗宣。珍符益鍾。其十。龍圖推莢。天子萬壽。廣運愉樂。鴻休懿茂。集慶乾坤。臻祥宇宙。禋階山鞏。福源海富。其十一。帝惟大賚。臣民萬方。林林總總。覃施無疆。憲平時豫。迪吉降康。貽顏黃髮。拜舞徜徉。其十二。帝念宗枝。尙養尙長。湛露所濡。行葦是廣。帝思俊民。聿開彙榜。秋實春華。珠羅珊瑚。其十三。帝宏錫類。慶賁官聯。五雲之誥。綸綍載宣。帝優天爵。寵逮耆年。百歲之坊。餼帛胥延。其十四。帝慎祥刑。弛於流蔡。鼙鼓春鳴。雞竿恩沛。帝軫民依。逋餘悉貸。租緩司農。賦蠲職歲。其十五。保樂洽壽。延美大光。經壇馥郁。王會躋躋。清都穆羽。怵頌聖皇。於萬斯年。受天之慶。其十六。

贈陳丹崖序

陳君丹崖。吳之晉陵人也。璇壁折源。旭日媚谷。識鏡泰初。智孕萬宇。載籍羣羅。富若編貝。詞華勇綵。麗於春雲。丹瓊遜寶。綠蘭謝芬。高韻夕霽。神明朝起。生平著述。好事壯遊。東涉河洛。先登岱峯。北溯京燕。至於

恆嶽探芝鳳巢。叩梧龍圃。上鑿石斧。潛啓玉簡。導稷邱之士。招太室之精。於是天關崔嵬。峻坡鬱律。怪木拱削。陰飈斜趣。翠雲橫磴。逢躡皆飛行。雨如蓋。迴瞬卽霽。乃駕熊脰。輿層霄。前巨靈。後昌容。呼吸六氣。餐羞五采。鍊其形精。助爾膽目。蘊異闕奇。神僊是資。震逼泰壹。不可久居。歸來南國。湘水千里。春陽曳綈。梅粉留眼。絲絲波漲。瑟瑟天低。香芷數尋。遊絮一尺。蘭雨酣酒。燕風暖人。藉讌西陂。相樂終日。旣而潘岳閒居。嵇生倦返。緬倦昔時。曾當跋履。山川凌胸。歲月積指。寐求華胥。晨則虛境。述爲文章。宿已陳迹。不若翰其寶跗。舒乎丹青。彩逐煙遙。毫隨錦落。遊鸞驚霧。櫛鱗揚淵。潑墨而障空。欲升投袂。而銀河俱動。表珍銅阿。霜生夏簟。紀節溫國。暑滿秋紈。長安三月。弄玉吹簫。夕陽一丈。落花結珮。景不假臻。神所妙領。固已僭繇。退舍探微。慙拙而幽思之偶。舒尤畸士之末技也。然而蒿牀溼鋪。荷裳不易。朋從欲稀。坎壤久處。仲蔚之介。猶有蓬屋。子山之賦。獨無小園。師榮叟之帶索。嗤揚雄之逐貧。夫廣寸之珠。郢人按視。千金之帚。燕客自享。目攝管寶。徑可規天。身披隼翼。出而駭衆。河鮒無斗水之需。餓鱗無落毛之日。斯世爭尙。契可合言。伊人有懷。窮固其所耳。履錢齒弱。惟倍神交。載傾入次公之座。知能養空。望長康之樹。盡成靈變。感言慷慨。序而貽之云爾。

答董方立書

方立足下。七月十五日。辱君五月九日手告。稔軌道多泰。跋履惟吉。豫章栝柏。去鄉逾珍。叢台毓珠。所在爲貴。皖中風雨。關上山河。敬迓文人。爭開新色。固知詞源長湧。掃洛塵於前轡。筆鋒所推。闢太華於駢指。

秋水伊人。白雲遐眷。跂予望之。良慰翹想。足下年華殿最。精采奪羣。挹秀南國。抽奇上士。連璣衆耀。明月尤朗。錯佩皆礪。青犢增銛。加以二龍長途。一日千里。元方季方。並譽漢世。大山小山。騁英齊代。比之足下。未可云異。今者仰披惠簡。欣繹高文。儷旨風流。懷思往復。章安之檄。剪若春榮。孝穆之書。全同古樂。傳音振翼。龍鶯唳於清霄。比物樹芬。荃蓀溢於仙圃。山澤通氣。激天籟之塤箎。日月有明。摛重光於緝錦。可謂杼柚獨操。骨韻自成者矣。且驂騑在御。不遺蹇驂。芳菰盈豆。猶戀脫粟。猥蒙獎借。載深勞佇。瓊瑋暫得。翫之不忘。圭臬呈前。對之彌慙。鄙以少乏師承。長寡藥石。徒恃幾微之明。未獲跬趨之步。年逾二十。歸自西雍。遊從時彥。與聞講貫。延頸秦岱。險道未由。投足淵海。中流焉濟。冥想若契。而握管已違。揣摩雖久而襲形殊淺。以其固陋。終多謬疵耳。方立足下。衡宇花飛。故園春老。流景易逝。侘傺無聊。寸履初闕。徒招奔駛之譏。緘口未弛。已罹曉瀆之咎。南陽之竹。取憎茅茨。龍門之桐。辱置爨下。低頭馬坂。昔人所悲。奮翼鷓溟。此志誰展。凡我朋儕。同遭斯酷。怨何勝言。足下今居長安。古帝王之都也。岐陽之化。不泯。漢京之治。猶存。余昔周馳千里。羈遊十年。衣裳風古。山川氣壯。詢此樂土。無異舊壤。足下登嘯太乙。訪勝甘泉。起劉向於天祿。揖相如於茂陵。覽懷文章。故當益盛。比已玉露戒晨。金風迅夕。野有歸燕。隰見翔隼。秋寒多厲。善保元吉。願襲重福。益滋令名。惟是江南文水。明波一寸。灞橋煙柳。遊絲十尋。廣鳴嚶於伐木。求其友生。賦小戎之三章。亂我心曲。造次答言。恕不詮悉。幸借郵傳。再惠端綺。方履錢白。

再答董方立書

方立足下。前奉到惠書第三札。並新獲隋唐誌楊十種。幸甚幸甚。破函佇瞬。芬彩言溢。玉鈎雅麗。足稔近學。鑒我癖古。珍錫羣帖。摛華粲粲。垂穎皆珠。韜翰斌斌。凝楮成玉。扞列滿座。如升太學之堂。耽玩兼旬。乃作錦囊之貯。損茲嘉意。勉其摹楷。幸甚幸甚。自與子別。四時將周。流鴻鼓風。已復北嚮。秋草盈陌。凋盡江南。今已仲冬。沆寥尤甚。僕陳書沒肘。擘隸補窗。斂卷而嘯。不知天地。狂吟達戶。時無昕夕。五夜雖短。可燭萬古。十年未暇。收於寸眸。計念足下。當乎此時。備業稍闕。誦理有隙。探志通經。則鄭孔潛歎。求瑕邱索。則左馬默慚。矧乎文章。發以情思。惟相與酬答。不詳何人。欲駕喬雲。謁子西國。層飈阻魂。溼月沈夢。衣裾有聲。簾帷無影。我勞懷人。奈何而已。哲舅家居。時相過從。爲文益工。所遇猶昔。楊生劭起。同此岑愁。足下近作。幸速寄覽。能令故人。駢手吟諷。亦甚快也。計此書達。當在臘餘。春風初興。神骨多解。善備旅寒。幸加餐飯。光彩所臨。相見有日。

與方立論古泉書

方立足下來書云。長安市中古泉。銅質爛惡。率多贗物。恐足下於此。尙未及深究也。請陳其略。幸覽采焉。蓋自斟元陳樞。先定司契。迭辟繼道。卽稱倖貲。逮乎歷山之起。範金而爲幣。渭叟之遺規。圓而成象。安陽平陽。羸秦垂乎小布。五千五百。新莽繼以貨刀。孝建之後。始知紀年。開元以前。尙無通寶。彼泉之源。伊其遠矣。於是探奇之士。證古之餘。商周有文。憑於彝鼎。金石雖廣。吝於儒生。輸此癖意。繫惟孔方。好之旣篤。爰有四益。夫史之爲帙。富於淵岳。代之改元。繁於日星。披誦未周。茫乎莫憶。偶徵異品。必事考詢。則僭竊

之稱。庶不淆於正統。絕域之號。可無登於中原。辨名旣正。讀史所資。其益一也。襄垣之幣。字皆從培。安邑之金。文都作曼。贅允則太古難名。翫繆則梵言莫解。形聲同錯。即可溯夫五代。假借成義。是可通於六書。其益二也。文錢四出。已識塵守之譏。太貨六銖。迺兆又腰之哭。居攝瀆制。而民不克從。景和鑄輕。而商行轉阻。覲貨用之興廢。知代嬗之盛衰。其益三也。吾人讀書。鄙兼謀食。不言阿堵。久嗤其愚。匿志飛蚨。又懲其陋。我則貫於杖頭。先徵肉好。置之空橐。無愧圖書。和嶠之癖。聊以解嘲。劉寵之選。差堪自悅。其益四也。因此四端。更有五失。則或推論未廣。泥古過深。執太昊之棘。而求干楯之形。信路史之文。而得葛塔之器。九府未啓。已有圓模。五幣未通。預加吉鑠。是則強結繩之朝。爲分班楮。代茹毛之聖。貽以釜鬻。此一失也。又或自受所域。臆評自雄。永壽係於外蕃。而誤傳西漢。太安鑄自大理。而訛爲後涼。布泉不辨。佩玉筮而曰宜男。鍾官未詳。鑪赤仄以符式女。是則楚人之謀。契行舟而求劍。莊生之喻。斷鶴脛以續鳧。此二失也。自漢迄隋。屢製五銖。有唐終始。不廢開通。質有重輕。字分隸楷。細核其代。始可詳知。今乃釋齊國吉貨之疑。遂呼杏九。仍大黃布刀之謬。忘其橫千。是則雌霓未校。莫正其誣。蹲鷓相傳。奉爲圭臬。此三失也。平準之治。依在帝都。偏安之泉。未布四海。是以建安直百。存於蜀邛。赤烏當千。徑於江左。使其不按輿畿。茫羅品類。則猶渡淮食橘。失之於枳。緣木求魚。失之於海。此四失也。且東郭吹竽。世多濫列。毛生脫穎。務在知人。登九都之市。而索千古之金。則必上問軒轅之貝。次徵有虞之策。不知則寶敝帚而自享。知則擲燕石於壺盧。而罕如豐貨。珍如九幣者。方且字蝕緣而隨朽株。輪飛赤而充下陳。推之足下所云。或有蔽於此。

乎。此五失也。僕少客隴右。長遊京燕。車跡所抵。搜訪靡懈。今居江東。遂無同嗜。履不越閩。陡不過帶。此志雖博。遠使怠荒。惟念足下。旅於長安。秦漢及唐。建都彼國。異品所湮。或失交臂。甚可慨也。願足下祛其五失。就此四益。撫實摠華。遠望爲幸。如有所得。速以報我。

仙山塵夢圖序

吾友楊子劭起。以所作仙山塵夢圖。照相示。命系以序。余觀其爲圖也。繪翠一闌。縹紅十尺。裁瓊鎖軸。縷壁簪楣。展芬溢指。舒藻悅魂。瑤樓曲曲。天桃結牆。雕扉重重。垂楊綰鑰。甲朝未起。風迴小苑之東。午夜初陰。人在闌干之北。加以春凝裾遠。月擁鬢來。浣紗湖畔。背手微吟。姑射山頭。顰眉善怨。羅塵滿轍。映蓮花之一叢。細骨牽裳。賜真珠之百琲。天孫織館。海燕窺梁。王母歌臺。青鸞奏曲。珍之所萃。中有人焉。斂襟彩逸。珂帽神清。籤書成城。抽毫列岫。龍團茶冷。漱玉無聲。鵝尾香沈。裊霞如縷。掃花圍袖。雜舜華之佩。九墨盈斗。譜石黛之歌。芙蓉腕底。淺拂雲箋。翡翠簾前。代融匳管。不日不月。云誰之思。是耶非耶。願我則笑。幻哉斯境。麗矣其仙。夫解纜結言。悲懷故宇。含波通素。寄心君王。本以緣情。隱關綺語。織縑初罷。誰察雙蛾。學繡未成。難工巧笑。影形羞並。榛苓有思。蹇修不來。菟旒盈室。同心離疏。莫憐瓊瑋。閨中邃遠。空獻明璫。碧蟾炯炯。忽悟前身。丹螭蘊蘊。或能先覺。是知同遊洛浦。歎瑤佩之終虛。久謁臨邛。感鳴琴之難遇。旣遺世。其若塵。定傾城而獨立。此卽圖之所由作也。余惟徘徊日暮。窈窕年華。攬明鏡於中懷。恨瀛臺之易隔。迴腸九折。敢寫相思。有美一人。忍與終古。掩卷默契。恍若有亡。誰能西歸。牽裳忍阻。攜珠盤於逝水。悲蜺

冀於中途請質斯言爲君增意

萬善花室文稿

卷二

四一

萬善花室文稿卷三

春暮遊陶園序

晉陵多陂池。竹木之勝。而西南之濱。尤饒逸致。碧流三尺。紅芷百尋。郭檣接天。檐牙隱樹。早畦未翦。菜香襲衣。遠隴相環。麥秀成浪。時值春寒。芳桃滿枝。忽聞鳥聲。落葉盈陌。十里五里。飛花有臺。朝陽夕陽。遊絲互路。修葉櫛比。中通廣橋。循橋而行。迺得名迹。是曰陶園。蓋唐先生荆川讀書之館也。後歸陶氏。遂以陶名。章夏之宅。人識其故居。鄭公之鄉。名成於舊德。虬壁當戶。椒墀爲徑。廣不百步。邃止十丈。重籬拂雲。皆成喬木。曲沼引岫。通於迴溪。藤陰蟠空。全蔽日月。蒼筱鳴籟。雜以風雨。崇堦如掌。分泰岱之一隅。礪石若拳。鬱蛟龍之萬變。是則竟日而往。莫測其幽。極目而觀。未究其勝者矣。余惟息居多暇。遊襟思曠。良朋相攜。好風與俱。騁足於芳浦。稅駕乎茲園。顧盼亭皋之外。偃泊虹霞之中。疎苔列砌。畹蘭障袂。高論布響。泉嘶於山。狂歌乍興。室忘其主。蓋自若木之旭。迨乎玉繩之低。渚禽求宿。宛變羣呼。潛鱗戢遊。暝映爭彩。於是析軫舊轍。停策還途。惟舒嘯之旣窮。亦棲薄之所悵也。夫中山之賞。皆擅名流。南澗之情。猶多慷慨。琴樽落落。遐心何從。居諸攘攘。奇懷盡破。況以勞人之生。尤增他鄉之恨。十日促膝。寡平原之歡。千里命駕。無當時之驛。朗月不來。孤煙長抱。斗酒今日。桃李留陰。望在南山之南。北山之北。飛步天末。言念君子。百年雖短。悲胡能已。若茲園者。亦農夫五畝之宮也。徒以積阜作勢。因水爲奇。遂使林壑增其異色。汀洲藉

其餘韻。憑眺者有古今之感。流連者有悲樂之殊。彼所遠託。豈泛泛哉。吾人之覽於此者。能無悟思乎。因各賦詩。而繫之序。時則嘉慶十八年癸酉之三月也。同遊者爲吳江吳育、武進李慶來、陽湖周儀暉、儀萬、儀顥、管適羣、大興方履錢、凡七人。詩若干首。

周伯恬詩集序

竊聞平陽逸奏。雲谷和風。八律載宣。七鬯斯永。嘶雷門之鼓。凡響皆沈。登郢人之堂。楚歛不復。所以追琢神思。含吐懷蘊。煙霞爭彩。金石助奇。代旣嬗及。流音漸渺。握靈蛇之尺珠。騁駉驥於千里。雖光溢乎後乘。塵駛乎前驅。而志有盛衰。聲有小大。陋厥古觀。靡於新韻。裂錦爲華。惟工雕鏤。取材失慎。鄙於俳優。戶執寸編。家傳百箒。揚雄是以有小道之嗤。劉勰是以急明詩之辨也。至於精駭遐陬。心遊芬苑。引墨自合。運斤易施。振徽播烈。斯其尙矣。吾友周子伯恬。娉節外昭。修能內茂。虛嗣已勁。久峙青雲。華姿無倫。終隱元豹。浮邱挹袖。重孝綽之清儀。蘭台絕塵。推彥升之蘊藉。瓊瑰映於江左。鸞鳳唳於層霄。杼軸典藝。發諸觴咏。一室自得。挾藻於天庭。十年操觚。綴端於青簡。偉麗之兆。有可言焉。則惟南軒晨張。北樞夕啓。坐圍彤籟。几拂瑤管。淵情揖容。哲之徒。沖襟攬江海之契。八儒三墨。馳赴腕節。一唱再嘆。脫穎齒牙。含毫矍腕。翹首綢繆。碧蘚匿牆。芳華在樹。風雨之夜。清琴初調。樽酒之前。故人獨往。悵候緒之闕寂。益躑躅於予懷。欲抗袖而緩吟。遂放言而不已。又或太沖延賞。開咏史之流。醴陵繁憂。多則古之什。月旦千載。使撫心而悲涼。孕育百家。爭聯手而款語。薜蘿美人之曲。招楚臣於瀟湘。芙蓉初日之篇。近謝家之池館。魚龍雜舞。陵

壑齊鳴。吹笙鼓簧。我黻子佩。往軌之所相答。結綆之所自娛。至於鬱鬱不樂。遲遲有行。歸辭千日。薄遊萬里。翺玉虬以遐征。駕蘭槎而直上。乃臨東岱之巔。問河西之渚。赤城窈窕。遍摩秦室之碑。劍閣崢嶸。獨喚蜀王之鳥。垂星在袂。奪雲入懷。瓊巖留題。玉洲聞嘯。句成秋水。寄迹馬蹄。筆隱春霞。新迴牛渚。靈運之雅律。川陸惠其無窮。郭璞之山經。神鬼居其大半。少時壯概。讀之而魂飛。世外奇言。編之而心懾者矣。因而挾冊出走。正襟而來。京洛之浦。祕簡傳觀。公卿之間。咋舌相告。入阮瑀之座。十萬縑而先韋。侍孔融之杯。九千言而爲贊。柏梁合製。鏗鏘擘璧之諧。南皮勝遊。喬郁山雲之起。終朝所咏。人盡輸籌。旬日少休。錄已盈篋。涉獵之盛。尤爲最雄。若夫苧村秋早。蓮陌春低。湖頭棄珮。顧影湘君。峽裏牽裳。怡神織女。左徒瑤情。通於日下。流波翠瑟。何事人間。桃花驂冷。贈子以木蘭。楊柳橈輕。思君兮逝水。則有將離善怨。芳草含光。譜錦歌殘。迴文序短。宋玉傷心之賦。秦嘉寄婦之章。莫不泣沅澧之征鴻。和洞庭之唳鶴。豔骨猶憐。餘香未祛。其瓊思也若此。其摛藻也如彼。雖紫鳳之英辭。碧雞之雄辨。舒向淵海之宏機。岳丹青之韻。皆已執策遜其風標。挾楮嫌於篆刻也。自壬子歲訖於乙丑。曰惟雒齋集。凡十卷。自丁卯歲訖於癸酉。曰之福居集。凡八卷。昭明集富。纔逾壯齡。會昌纂成。尙多後錄。時行時止。追伶竹於蒼隅。愈唱愈高。奏洞簫於天末。日之方升。銖之益累。長寫不測。亦孰知其所抵哉。然而攬申椒其不芳。惟蕭艾之匹也。望鴛鳳而戢鳴。亦鴛鳩之好也。願盼萬古。俯仰天地。長袖善舞。短歌易瘖。中年哀樂。過太傅之沈思。身世流連。同開府之多恨。依遲春日。曠放江南。對飛花而銜笑。聞流鶯而感時。歡筵並坐。五日無聊。魯酒獨持。三星未落。愁賦初

罷越吟乍舒。早有遐心。以永今夕。此何故也。斯其悲矣。夫以吞吐河漢之豪。摧折迴飄之勢。持樵賈董之行。詆訶曹劉之作。蹴九華而西傾。抗八極而東覆。搖筆而熊羆晝呼。發聲而蛟鼉夜走。乃志士之盛概。文人之逸情。然能退藏於密。處盈於虛。引和宮商。酬應韶濩。情之所極。則言無不周。意之所通。則韻無不茂。報星漢之昭回。視風日之駘蕩。則蓬山可達。不羨尾閭。芸觀爲羣。甯誇下里。豈不至哉。是所望也。蒙也幼睽圖史。長慚淵藪。雍門肆響。祇愛繞梁。瓠巴安操。惟知仰秣。以山陽之款密。識元凱之平生。命書集首。因志儂詞。亦惟南斗晨暉。揚秕糗之先導。黃鐘初應。舉瓦缶之虛聲云爾。

問潘念諛疾啓

念諛足下。近阻令儀。遠閱寒紀。一再奉謁。辭以匿風。悵懷不達。悵然遙深。比聞足下。宿疴將解。滋神惟久。通闕晏晏。局此日月。息韓媿媿。遺我友朋。資滌齋忘。當益澄慮。所業興廢。以何遣時。昔枚叟之發未七。而楚貳眉舞。洞簫之賦終誦。而漢儲心逸。足下清襟勝託。必無耽樂之虞。徒以劉楨養疾。歸臥漳濱。桓譚苦思。疹患時作。乃有麗詞紉釋。妙義相循。玉屑晨飛。金音秋舉。登阮瑀之堂。奪樂廣之座。驅煙墨爲聲辨。縱俛來而置郵。斟理洗嘲。竦論破元。式謠式咏。靡朝伊夕。庶可失此風歛。益其神智。則僕方從事於此。且爲足下執塵而前也。協洽次闌。幸鼓糜蟄。蓄彩展悵。青鳥明之。

潘念諛誄并序

潘準字念諛。常州陽湖人也。以嘉慶十七年三月二十八日卒。年十九。烏虜哀哉。夫春槿隕華。自幽於中。

谷。適。枹。堅。質。不。樹。於。蒼。淵。殤。耆。之。倫。惟。委。靈。轂。損。益。之。端。無。舉。斯。世。人。生。不。匱。冥。乎。未。聞。若。乃。山。雲。摘。采。銑。露。降。英。荆。璆。孕。而。璞。輝。豫。柏。挺。而。巖。秀。固。已。踵。謝。睿。哲。揮。挹。寰。區。而。使。列。颯。摧。柯。斧。斯。毀。壁。昔。顏。氏。短。折。傷。好。學。之。無。徒。賈。生。謫。居。悼。壽。命。之。不。永。先。民。不。作。後。起。誰。嗣。烏。虜。哀。哉。君。少。不。好。弄。長。有。遠。度。丰。神。鏡。朗。志。節。淵。沈。未。屆。十。載。能。通。九。經。文。章。百。氏。淹。若。夙。貫。賜。書。滿。家。得。石。渠。之。祕。振。筆。舒。藻。擅。雕。龍。之。名。猶。復。隱。迹。一。室。研。精。窮。年。寢。懷。鉛。墨。穿。幼。安。之。藜。牀。口。茹。墳。典。亞。文。通。之。流。麥。竹。籀。之。書。寫。已。盈。寸。戶。牖。之。箸。時。復。成。編。雖。琬。琳。自。晦。而。盛。譽。普。宣。矣。君。以。弱。歲。卽。喪。母。氏。每。懷。風。雨。泣。奉。楸。棊。誦。詩。卒。業。竟。廢。蓼。莪。入。室。靡。從。不。歌。華。黍。令。名。自。傷。字。曰。念。諼。蓋。志。痛。也。年。十。八。舉。秀。才。嘶。向。日。之。聲。初。馳。方。里。鼓。接。天。之。浪。始。垂。尺。鱗。乃。未。三。月。而。病。作。病。五。月。而。竟。卒。哀。哉。凋。碧。玉。之。神。樹。銷。紫。石。之。靈。根。卷。施。抽。心。留。解。宿。莽。之。恨。龍。門。死。桐。尙。抱。咸。池。之。曲。共。著。書。若。千。卷。手。錄。書。若。千。卷。藏。於。家。不。朽。之。業。其。在。斯。乎。予。以。昨。歲。息。影。故。廬。奉。夷。甫。之。塵。談。接。平。仲。之。縞。契。听。夕。論。經。沿。溯。伏。鄭。甲。乙。飛。辨。錙。銖。曹。劉。下。至。遊。藝。璇。紀。之。祿。旁。攷。籀。史。之。章。前。籌。固。遜。附。翼。足。豪。天。乎。不。諒。喪。我。良。執。烏。虜。哀。哉。夫。誄。以。表。德。言。以。昭。緒。爰。是。述。其。茂。美。託。之。旒。旗。乃。作。誄。曰。

嗚。嗚。者。天。促。促。者。命。逝。矣。之。子。悲。來。胡。竟。孰。嗇。之。壽。孰。馨。之。名。匪。名。之。馨。來。茲。是。型。伊。子。之。生。碩。宗。鼎。盛。清。芬。允。貽。名。德。終。令。蔽。芾。棠。陰。輿。誦。循。政。奕。葉。隆。譽。世。守。廉。敬。爰。襲。苞。蔭。克。揚。前。麻。金。枝。蘊。彩。瑤。系。餘。修。惠。質。早。端。聖。童。是。伴。詩。禮。庭。詔。勗。哉。箕。裘。枕。藉。經。籍。窺。息。名。理。文。耀。冬。霞。神。澄。秋。水。詠。契。莊。騷。參。悟。元。史。

談塵一揮。蠅吟怖止。子之勤修。夙夜詎甯。盤盤一編。如影委形。銳志砥礪。靡思不深。照用菱苳。心寫晶瑩。子之持行。不激不隨。道潤斯華。德充乃滋。婉孌登堂。孝友可師。翼乎維度。確乎維宜。子之令儀。鳳翥神溟。若華四照。澄波萬頃。穎寒骨儉。迺迓帝警。巫陽有招。曇雨成影。烏虜哀哉。琅玕舊題。匪子誰燭。黼黻皇極。匪子誰勸。匪直也人。邦家之穀。莖蕙質芳。元壤是促。白雲停彩。朝陽在門。如何不淑。闕此英芬。漢宮有木。錦水有鴛。如何不傷。望子潺湲。子身可亡。子名不朽。名山之業。不脛而走。恨滅北邙。氣高南斗。廿年千秋。百歲亦苟。惟念素執。周旋無由。玩復遺文。永以綢繆。雞鳴嚶嚶。零露載憂。魂兮遠逝。懷思胡瘳。烏虜哀哉。

送趙林一序

嘉慶壬申八月。趙子林一將北遊。時則秋陰滿衣。午涼在樹。蓼花艇小。杖履可容。稻雨波平。舟櫂悉啓。卜日惟吉。俶具以行。其友方履錢。載樽酒而送之。曰。昔人北林之造。泣或損臆。志士南浦之歌。錄已盈筭。誠以絃括之曠。眷戀深於白雲。參辰之感。積憂明於丹鷁。滄海遠道。十年有思。馨香闕懷。千里誰贈。臨河太息。達者未免。矧吾與子。能不增欷。吾自弱歲辭傅。卯角謀交。西謁隴荒。惟覲塵迹。北走燕趙。至於上都。時君昆季。羈客於此。請贊未暇。已篤心誼。執袂道故。乃識舊姻。徐摛形弱。依周捨爲外兄。范縝矜才。比蕭生於愛弟。牛車道上。擁背忘寒。客帳宵中。論經靡倦。傾蓋之始。縞幣尙焉。旣而白紵拋殘。黑貂告敝。勞穀短短。將侍宦於秦川。驚沙濛濛。乘知心於日下。於是斷魂隨轍。轉疾於奔雷。悲吟接天。聲溢乎河曲。束篋一寸。不消季重之愁。嘉言三復。盡入洪喬之厄。如此寒暑。若彌年載。而泛梗所經。復逢故館。求志希獲。無異

曩時遂乃倦遊辭返。並轡歸來。入林宗之里。朋儔遜其連裾。登伯符之堂。華顛喜其得友。居鮮一日之隔。門徹半介之通。跬步籠迹。曜影振華。齋居盤盤。言笑宴宴。蓋同息大江以南者。不自知其歲月之更也。然而緝弧之用。資良冶以成膠。笄玉之生。望他山而援手。奧典可尋。諮孝緒於鍾阜。令言聞往。就少傅於東甌。蓋嘗風雨破夜。危論若師。幅巾終朝。逸思成陣。志荒所業。則振襟以悟之。擇交失端。則微辭以導之。素絲白羽。染采因柯。露木風榮。臨年共悅。此神契之道。無愧也哉。今子將揚蜚聲。筵上侍。揖金辰。祝玉岫。而余奄滯故廬。不克企軌。今日之別。我勞如何。吾子行矣。踴步不休。跋鼈千里。累塵不輟。偕岳崇成。以勸明德。爲吾子箴。鉛刀雖貴。鈍於莫邪。五味雖甘。不先稻黍。榮利之誘。毋以徇取。久穀千鴛。亞於一駿。籠樊之鶴。六翮終奮。賞音在人。益已惟敬。審友之道。爲吾子進。吾子行矣。舉策而告者。謀夫之英。贈言而退者。睿哲之範。爰敢綴述。往契期誌。後朕凡百。悠思神與子偕。

江行記

歲入元默。月居陽首。方子將由金陵。至於漢陽。乃泝岷江。別沱水。擘洪波。指太清。纓溟蜀。勾呀呷。藻瀆。洑。溪。激。澗。湔。灑。沈。澹。初。映。曜。輪。砥。如。重。簾。乍。激。迴。駟。蟲。見。層。巒。瞬。眴。少。舉。可。撫。萬。里。雲。天。相。迫。曾。不。一。尺。於是。霽。光。在。枕。晨。颺。上。衣。舟。人。羣。呼。客。子。驚。視。赤。潦。拍。蕩。垂。腕。能。接。黃。霞。彌。漫。障。袖。欲。飛。蒲。帆。揚。鱗。吼。音。終。旦。筒。篙。森。刺。浪。勇。欲。奪。走。電。謝。遲。勁。矢。忘。速。孤。鶴。無。影。哀。猿。有。聲。邊。笳。四。起。沈。霧。千。仞。地。軸。爭。峙。至此。而遙。則。東。望。棲。霞。之。岫。西。眺。彭。澤。之。陂。指。鸚。武。之。洲。揖。鷓。尾。之。渚。莫。不。俯。臨。前。席。追。攬。後。塵。散。魂。凌。魄。浮。彩。

驚思洵穹寰之奇觀。平生之盛遊也。徐理襟幘。低憑軒窗。一編將展。奔魚駐而竊觀。狂吟遐伸。鳴鼃爲之起舞。偶有所作。濡函未竭。洪波復渙。鼓於几下。削藁投之。駭退十丈。往昔嘯歌。好言激壯。讀景純之賦。吸怒濤於吻沫。考道元之經。摧逆流於握指。以今況之。誠異曩域。若其浩蜺所盤。陰侯所牧。通漉之所遄溯。遐溟之所泚潤。鳥不及盼。魚不暇亢。圍彼瓊巖。易於整敦。深洞八荒。若灌若疏。蓋千萬載。而無縈帶爲之輔者。百川豈能偁哉。旣而寒潮緩升。岸草盡失。葦枝迎拜。惟餘素塵。水氣上驚。半作絳綵。金輦斜趣。左右若木。華琚低映。中環太空。又復漱瀾作食。借石謀居。菰米欲炊。奇芬躋於蒼冥。濁醪橫前。餘歡達於鄰渚。宿雁戢翼。招其逸侶。江豚掉尾。時甘嚙人。挽首遙望。汀洲無際。顧我鄉國。隱於天末。容足之外。卽馮夷之宮。瞠目而觀。非蓬瀛之客。日落未落。招美人之菱花。道阻且長。傷交甫之棄佩。思緒閔寂。悠悠何如。嗟乎。人生之質。非金石所流。百年之期。非風雨所破。而欲閉室間之雀息。挽天上之榆星。不亦惑乎。今雖單袂。孕雨。雙屐分虹。碕岸突下。噤不敢吐。逆濤積湧。恬不敢吞。奇懷夙砥。非達士之憂慄也。述其所覩。因以志之云爾。

與江神牋

蓋聞停法規尺。必有委蛇之司。豁阜嶺步。不乏崧夔之長。是以援瑟而鼓。泣下湘靈。牽裳而來。風迴海若。冥契之道。惟誠斯通。矧以滂渤表采。頤淡蘊真。涕洟淮潁。疣贅漢泗。滄汗六洲之域。浩蜺九衢之中。柱元極於華裔。限坤靈於帶礪。世所沛欽。如江之永者哉。伏惟執事。潛曜康潯。翱翔神渚。巴梁緝瑞。匯衆瀆之

原巫峽宣機。總朝宗之望。璇瀾春靜。紫貝爲門。桂嶼秋高。黃金成浦。肇益崑崙之選。足雄屏翰之儀。況復崇朝而載。利涉蒸黎。沃野同流。布潤畎畝。啓介鱗之萬品。承蒼溟之四隅。楚津三月。桃花浪開。沅芷十尋。芙蓉波細。窮陸無纖。泊之遺。天區有靈。潮之濯。利舒功耀。渺不可推。履錢以朔。方鯁士。炎國僑民。學愧通經。行惟鶩守。湘輿技隱。無送目之名。綵輪工淺。謝歸風之價。今忽沾航。遠泛結屐。旋游遂循河滸。臻茲大澤。淩茅水宿。已逾十晨。鼓棹風吟。安於一葉。旣異澹臺投璧之雅。終鮮靈均懷石之嫌。馳驟如緯。誠復不憂。惟是匕箸之前。並羅典冊。長缺之外。別貯圖書。默坐畏寂。輒喜恬吟。走筆少休。又能狂嘯。自朝迨夕。曾不虛時。而或澳府駭其騰聲。波臣惡其逆耳。竹艇三尺。云非儒生之廬。洪濤百頃。乃祛狂奴之態。愆尤相積。是所不虞。故敢達諸明神。抒其幽素。可協假道之請。不罹突至之譏。庶使破浪有期。告水濱之列族。布帆無恙。謝江東之故人。撫膺拜祝。腆顏載陳。黍稷非馨。楮帛虔頌。謹啓。

祭莊印山夫子文

嗚呼。崇岳失時。朝陽停輝。昊天不憖。景行曷歸。德純而隕。道隆而微。吁嗟吾黨。將安所依。惟我夫子。鏡華毓秀。世載通德。克紹鼎胄。璞潤燭山。珠瑩媚川。岐嶷之生。惠質早宣。爰自初服。束躬儒軌。伏業孔門。遊刃諸子。軒墳輕典。匠史宗經。發爲文章。炳於日星。探討絕學。綴拯微言。上下萬古。奕奕淵淵。望影附形。聆聲和響。令聞顯昭。播於九壤。匪文之肇。道充乃滋。匪名之馨。實耀所施。仁哲溫良。中朗外澤。孝乎惟孝。友恭是則。猗歟夫子。命世而生。式登廊廟。功曷可名。迷陽載途。驂騑失路。用行舍藏。進退可度。高蹤碩望。升聞

於朝。三事大夫。子子干旄。素纁良馬。再徵不起。羣舉有道。上貢天子。赫赫王命。賁於邱園。鴻達遠蹈。轎車高懸。迺錫赤綬。俾全隱迹。棲遲衡門。終保貞白。恤茲後學。蒙不知途。晨訓懿行。夕治典謨。春雲在堂。時雨在座。詔誨小子。勛我迪我。丹鉛橫前。質之晦明。親炙有謚。私艾載傾。如何上穹。不淑不弔。景命永謝。徂此遺劭。嗚呼哀哉。藏晦以密。正用以蒙。嗟嗟夫子。允履厥中。其來無倪。其往無涯。太和同流。人莫之知。撓之不濁。澄之不清。叩虛抱寂。若波千頃。迨乎易簣。安志壹神。啓予手足。悠然韜真。蘭芬而刈。泉醴而枯。梁崩嵩摧。云何其吁。旖羽秋高。總帳天促。千秋誰嗣。百身莫贖。繫予蒙昧。同侍經帷。服勤未逮。心喪空期。素琴留御。書策陳几。終其永懷。悲何能已。敬敷奠詞。生芻載將。嗟我夫子。鑒此苾香。嗚呼哀哉。

祭周筇雲文并序

歲惟元默。次於大涖。周子筇雲。卒於漢皋之旅。嗚呼。駛電匿影。沈月不光。菁華汨於崇朝。哀忱起於中夜。龍蛇之厄。抉十仞而泉飛。夢雞之辰。叩九關而星落。應汝南之著作。不名其官。吳季重之善愁。終之以命。啓文園之篋。封禪之書將亡。披子雲之帷。草元之心未化。嗟乎。滔滔逝水。不能駐金石之流。冉冉行雲。豈殊於蜉蝣之瞬。惟當世以誰懟。假大地而埋憂。達士之寄。今乃言旋。勞人之生。誠不如死。然而摧千尺之桐。竟先撥其枝葉。刈百畝之蕙。又遽傷其根莖。安仁悼逝之時。未周於歲。蘭成傷往之作。不絕於書。匪朝伊夕。掬瓊瑰於盈懷。跼地躋天。恨尺蠖之無足。拓落寡耦。崎嶇損歡。入室靡覩。出門何之。藜蒿泣雨。圍十口之棺。茅簷坐霜。冷三生之夢。望故鄉而不見。類飛蓬之焉如。因其伯兄。宦於嶺粵。將往依之。未及至也。

悲秋羈舍。殉之以身。躡躑冥途。欲迷其徑。枕函簡而長謝。御布衾以永休。十千市木。未知視斂之人。萬里停輿。定多欺貧之鬼。寒煙夕卷。斷葉驚飛。鄰笛乍起。臥白骨而酸魂。生芻載將。以蒼蠅爲弔客。人之生也。死固其所。死之爲累。乃若是其淒怨乎。歌薤露以何時。仰昊穹而莫答。所謂修文繼職。玉棺降空。賈太傅之賦鵬。王子猷之亡琴。千悲萬恨。何可勝言。一號三呼。魂終不復。以今況之。增痛靡已。既卒之後。更閱一載。其友人之在京師者。始克知之。素車奔赴。同慚元伯之靈。寶劍初鳴。難覩徐君之塚。因僦其夙寓。爲位而哭。懼神遠之未格也。乃爲文以招。而祭曰。

黃雲瑟瑟。丹楓漉漉。魂兮歸來。念此夙忱。惟子之生。志度淵粹。荃蘭之姿。爲世珍瑞。既有令德。穆於清風。既有丕文。伴於化工。秋水照神。春霞麗物。良璞在躬。其彩焉拂。莊元之誼。銘衷凝素。發言彪炳。爰談爰賦。時之不達。道屈未伸。百冶之銑。乃棲埃塵。命之不淑。幽閔其世。遭家不造。終屏憂悴。載駕我車。於陝之鄉。載依我兄。於嶺之陽。崔嵬其愁。馳驅其怠。運極命衰。隕越爲害。涼沙掩旆。窮月寢肌。朔颿一來。靈魂誰依。名山之編。藏於足後。嘔心而亡。緊子是咎。子之家室。盡汨重泉。潛質相晤。慰子後先。楸輻未安。魄苦相近。魂其久淹。湖湘之境。友恭是則。思兄未忘。魂其有知。隨流而颺。十棺之穴。兆於隴左。魂其遠行。或侑或妥。少微作芒。離離晨嚮。魂兮歸來。歸於天上。惟我素執。判袂有年。渥彩懷音。夢寐是延。求之不得。泣涕漣若。乃瀉桂醕。藉以清爵。斗酒隻雞。酬於三步。迹徧湘干。珮捐澧浦。神颺肅然。髣髴載欽。鑒此明潔。魂兮來歇。

書劉芙初編修駢體文集序

蓋惟泗石在懸。自殊凡響。涇沚合浸。獨著瑩流。抱孤芳而不前。振遺緒於往昔。文章之道。厥有尙焉。奇耦相代。象同於天。盛衰迭蒙。降因乎世。應劉摧於鄴東。鮑庾渺於江左。雜沓莫正。渙忍不鮮。寡能推源。安所終極。夫文以道勝。言以氣雄。子建所謂儼乎若泰山。勃乎若浮雲。迺君子之作也。先生銘衷凝素。抗濁夷庚。養恬而奧義皆宣。機清而妙理自發。茲駢體文一卷。抒華千載。啓韻百家。句非春日。流紅有花。詞肇晚霞。茹碧成彩。河梁載酒。情深送遠之章。湘雨留人。根觸論文之夢。展其幽思。可夏絲桐。綴其芳瓊。若列錦綉。不錯於雕鏤之工。不逾於性情之外。洵操縵之津途。爲學林之衣鉢矣。不諒下鄙。錫之楷模。祕觀珍賞。如渴飲而饑餐。吟誦迴環。欲編離而字滅。徒形慙沮。敢肆揶揄。謹列圓丹。助此光豔。並志行墨。申我景懷。

送董晉卿南歸詩序

癸酉六月。晉卿以就試至京師。後遽聞其尊甫定園先生有疾。匆促將南歸。是時余與晉卿之晤合者。未周夫二旬也。離衿乍伸。盍簪已卜。優渥晨語。徜徉夕行。惠迪之勛。迹同筌蹄。清機之盟。鼓若琴瑟。短晷偶疎。願失羣而增悵。廣坐列論。引良儔以自豪。又復遲子玉燭。沾我金壘。款曲薰風。延佇朗月。敦交求璞。抱實詆名。結懷周秦。劑思商夏。奇文十册。入夢寐而皆吟。古彝一銘。撫神物而駭走。振青蘭之訊。風雨未來。聞白雪之歌。兼葭莫賦。非遊誼之爲樂。將德音之是招。乃忽疾雷絨怨。飛雲流陰。驚沙十丈。不迷其途。芳草千里。轉趣其轂。嚙指之誠。北溟亦爲之倒瀉。倚閭之慰。南國且見其歡迎。登山臨水。此日無言。蕩魄越魂。送君有淚。吾子行矣。我勞如何。河陽解轡。異於曹植之詩。春水牽裳。欲廣江淹之賦。以是言別。何其悲。

也。至於載觴祖道，停陌行筵，南皮之遊，金谷之送，皆古人之有懷，非今日之所尚也。乃爲詩以贈之曰：爰折瓊枝，揮子駕兮。爰刈芳楚，秣子馬兮。君子之行，瞻親舍兮。陔中有芝，循可采兮。佐爾晨羞，以永歲兮。庭闈悵悵，眷樂愷兮。江漢之流，日夕遠兮。豈不從之，嗟弱翰兮。送子賤軀，適我願兮。琅玕雖榮，罔顏色兮。靈籥雖和，瘖聲澤兮。悟契之殊，將誰悅兮。惠此瑤璠，無終惜兮。

誥授朝議大夫甘肅鞏昌府知府護理鞏秦階道胡息齋先生別傳

先生諱紀謨，字獻嘉，浙江山陰人也。寄居直隸通州，遂入通州籍。王家江左，百代仰爲清宗。陸機東來，當世重其碩望。先生秀質嶷生，見者自遠。風神軒舉，道然不羣。授元幼日，旣探奧義，躡屣壯歲，乃推經師。奉菽悵悵，窺雲闈之顏色。采華粲粲，陟芳帖而懷悲。先生於未衰之年，痛摧二親。追家食之饑，尙客千里。視寢視含，惟資弱妹。不恤不弔，罄所遺藏。外人皆爲先生傷之，而先生哀踟躕之莫從。勵友恭之愈篤。時有外姻某氏，以閨闈之怨，搆角弓之訟。聞先生風，愧慙而輟。沐蘇瓊之化，相揖均田。入王烈之鄉，皆恥爲盜。君子潔其身而同者合，振其采而鄙夫寬。豈徒虛語。迺今知之，又嘗僦舟北行，羈遲旣久，同濟者數十人，皆告乏食。先生竭資以頒，始盡獲免。貸而不書，訖莫知其名族。義非所市，終不答以里居。南山之壽，爭頌潘郎。青麥之謠，旨達莊老。慨恤勤施，罕有尙焉。迨於一尺之符，筮分天水。五幡之綬，遠登玉關。志百鍊而不消，御萬仞而必叱。才辨無雙，則羣司傾座。粲爛日下，則蒼庶悅心。是以量移數郡，遷宦廿年。莅成縣、鎮原、安定、中衛諸邑。陞授安西直隸州知州。庭有和風，縣無逋事。政成三月，延頸者遍寰封。星改一方，阻翰

者滿行轍。先是逆虜縱軼，弄兵潢池，妖氛蔓延，問途隴左。旣已折馘，將謀會殲。先生憫彼脅從，及於耄稚，錄請別減，盡釋其辜。而鳳翔之妖民，雷得本等，又將驅惑以應。先生奉檄治之，至則呼彼都之牧令，偕此邦之父老，酬酒於樽，列樂於座。咏山中之風土，問行畝之東西，而輕騎倏還，渠魁已得，夕陽尙紅，酬酢映碧，衆皆大駭。始知嘯歌於長吏之庭，決勝於賊人之室，邳彤機老，全解嚴城之扉，謝傅神恬，速展前驅之甲。外戶無扃，兵威夙閉。先生之勛，蓋銘太常而無愧矣。於時天子方考九輿，披八索，詢河流之異，證傳註之誣，知清濁之滂於渭涇也。命大吏求其源，大吏以屬之先生。乃登首陽，歷大夏，踰終南，石室之險，溯鳥鼠同穴之濱。至於涇州之拜頭山，得涇之源焉。瑩石如瓊，可析豪髮，澄流若鑑，安雜滓汗。爰著涇源記一編，以獻於朝。此則鄒衍炙轂，謝神經之未詳，張騫浮槎，慚斗牛之荒渺者也。未幾擢鞏昌府知府，攝鞏秦階道。將期經綸彌廣，响嘔益深，泉冽玉漿，案陳瓠脯，豐五雞二甗之養，致千耦萬箱之樂。孰知台職未崇，良臣不懋，年齡俄頃，風電相推。郡中赤土，惟封半篋之書，關上青泥，難易十旬之粟。豈不哀哉！先生頤廣而隆，髯疏而挺，朗朗鑒物，爛爛增彩，葆光含息，天倪往來。自云中歲常，就元經，咽華咀氣之精，晁浴鷗視之要。旣而思真宰之契，不外市朝，神僊之洲，莫非道岸。因以束髮還嶠，折簪入世。又自言曾爲冥曹，剖決陰獄。泰山使者，攝生人之魂，地下主文，當強仕之日。蓋其凝壹之氣，六合同其陰陽，純直之心，九幽受其陶鑄。列子云：上闕青天，下潛黃泉。劉安曰：馳於方外，休乎宇內。若先生者，可謂符之矣。且以識貫遙邇，學粹古今，毫翰爭飛，金玉相儷。春日初午，開高吟以入空，秋山乍晴，喻清抱之在室。著有知足居詩若干卷。

言山澤之性靈。布六文於六律。繪閭閻之饑渴。皆一字而一珠。豈濡脂染墨者。所得同年而語哉。履錢幼侍嚴親。官於甘肅。先生與家大人交相友善。見履錢而愛之。選詞爲駢。走箋命和。揄揚不絕於口。保抱不離於懷。十紀之童。攜之而並列。耆宿一韻之美。咏之而遍駭公卿。子春之旗鼓。自當管生。周君之塵尾。獨資袁憲。嗟乎。生世落落。窮年悠悠。斗筭之才。亦妒。乃周納其狂名。跬步之階。未登。卽指目爲賤士。白眼環於左右。雖黃密於網羅。則惠我辭色。榮過於加華袞。知己片言。恩深於肉白骨也。而況先生之於履錢者乎。丹泉汨地。悲無時之可忘。白雲在天。亦何人之能述。謹綜厥行略。志其遺美。爲之別傳。所以風來禊之楷模。備史乘之搜采云爾。

沈貞婦繪古圖贊并序

夫鴻都設彩。躋想聖徒。蘇門行障。貌求逸士。蓋高躅抗雲。拜圖中之千古。遺思往日。增頰上以三毫。染翰所推。傳神阿堵。未有明閨妙韻。幽居素懷。丹楮欲飛。翠霞未落。縹緗在手。若開怨雨之花。筆鏡臨窗。不寫傷心之賦。明駝萬里。繪寒士之裳。紫雪百尋。灑穹廡之血。林下之風氣。道韞遜其鉛華。陌上之冰霜。羅敷驚其妍藻。洵足寶此芳幀。永於來禊者也。況乎懷清之臺。青蛾欲化。漆室之咏。白燕初歸。畫以人而益珍。節因才而乃見。則伐彼貞木。將鏤少女之形。集於瑯環。更上伯姬之頌矣。乃爲之贊曰。錦帙入座。寒香上樓。松枝影碧。石匣疑秋。鵲啼倏忘。蕉心罷卷。夢裏紅牙。袖中彤管。笈囊獨佩。祕苑初開。江南寥落。古月徘徊。

答劉青園書

青園足下。北土凜冬。勁颿驟起。僵坐斗室。瑟瑟不甯。忽獲惠緘。驚喜失望。陽嘘之降迴谷。凱南之鼓芳甸。不是過也。書中款款。撫此心曲。循誦百周。覽照一室。且知足下。寢食多豫。定省以庥。甚慰甚慰。聞者寇發。近畿。蔓於東國。封豕夜走。毒獍晨呼。星芒動天。月魄匝野。比聞青州之區。將士致命。渠魁就殲。蒼黎無恐。而豫南數郡。尙有逆徒。未卽授首。此如賴魚掉尾。養以沸鼎。窮烏亡巢。棲於烈火。剋旬指朔。可待靖矣。方今四字和甯。中外受化。項堯穆穆於上。皋夔師師於下。一夫之安。勤於宵旰。三尺之子。舞於康隅。而凶狡潛呼。鈎連結轡。持耒鋤之器。率蝟螳之衆。乃欲蕩搖我家室。虔劉我邊陲。扶桑未浴乎咸池。金鈎未登於鷲嶺。曾已裂膚陳肆。折馘囚屯。沈迷猖獗。以至於此。夫以天之仁。不能無厲螫之鳥獸。地之大。不能無沴毒之草木。而太和細縕之覆。廣運淳茂之載。終無所累。適足痛恨耳。泰山以南。連紀苦旱。災傷流離。重以兵患。民之瘡痍。諒未能復。丈人敷政斯邦。爲之豈弟。恫瘝乃身。刑期無刑。而足下子舍可居。嘉猷克輔。相與頌者。豈維故懷。錢也。辭望閭之親。應棘省之試。褐衣猶存。敝屣未釋。初無勝人之資。而欲凌人之上。所齋薄而所願奢。宜其黜也。友人余君鐵香。九江之翹英也。亦擯京兆。出參幕府。雖無班超封侯之志。雅有嵇喜從軍之心。才藝絕倫。兼工手翰。忱思慷慨。篤於友生。與錢之交。不啻錢之與足下也。審交必端。足下其弗遺之。閻君吉人。縞紵已密。胡子昴季。親若同生。相與勵躬明德。探涉文藝。惟望足下。能來同之。少有時。速慰遠慕。沍陰多寒。幸善自衛。不宣。

綠玉詞序

徐君經汝。秉淵睿之器。懷醴和之行。樸學自勵。卓德不羣。仲舒之圃。三年未窺。智深之家。五日不食。心鏡典籍。伏鸞隱其名。識綴篇章。雕龍擅其彩。洵可以馳踪儒軌。蔚炳國華者也。稟命不融。弱歲而逝。豐厥英聲。客此永祿。瑤圖乍披。清芬終沫。元經初寫。風流已枯。芝蘭焚質。室有餘芳。卷施抽心。庭無宿草。哀哉。洞碧玉之奇色。銷紫石之末光。閱千載而猶悲。雖百夫其奚贖。遺文百首。友人緝之。鳴鐘在水。尙動知音。孤桐摧根。久翔逸韻。抽翰之暇。旁及短調。嘔心之言。徵於將亡。此綠玉詞者。亦劉遵之碎璧也。流連時遇。默感窮憂。詞飾煙霞。志悲風雨。幽香入袂。遠泛春波。豔骨若仙。怨遲明月。簪花舞曲。並見迴腸。載酒吟樽。難消愁氣。是則汨羅未返。先成懷石之歌。賦鵬將終。已類投湘之哭者矣。自君厭世。每握斯編。介歡筵之欲闌。招君子之舊侶。各舉穎辭。同爲妙賞。此唱彼和。盡屬變徵之音。長吟短呻。遂激清商之怒。魂荏苒而據碧。泣嗚咽而流丹。擲山陽之笛。湘竹全瘡。遇黃公之壚。玉山易倒。明河一尺。溼雲千圍。庭樹迷離。落葉橫亂。斷猿相答。悲鳥驚飛。寒燭之背。疏檣之罅。如見形影。掩映殘席。痛呼不前。相卽無覩。豈君之神魄。尙有繫於此乎。起九泉之枕。未忘斯人。穿十步之隧。欲問今夕。冥誠之感。未可知也。履錢少羈隴末。偶歸寓邦。迹同閉門。心如合轍。與君之交。久銘中懷。聞君後言。亦愛蒙陋。縞紵乍契。晤遊無多。忽聞溘亡。悔念曷已。茲有薊城之役。深感宿隴之思。因舉小集。先付梓人。秦瑟引吭。聲初肆於宮商。楚劍埋鋒。光自騰於牛斗。有傷寥落。伸言慷慨。乃作此序。以冠其端。嘉慶十八年癸酉四月望日。大興方履錢序。

郭烈婦傳

烈婦姓鄧氏。臨海生員郭光璋之配也。淑苴之質。遘馨於初琴。蘭蓀之芳。賦采於中野。惟珩與璜。容止不墮。聞機迨杼。令華可昭。擢根下里。夙仰摩笄之山。習誠孤宗。幼入扶風之座。出閨之年。歸於郭生。和諧媿影。婉孌將雛。歲有元枵。天乎不淑。心傷寡鵠之歌。腸滿啼鳥之夢。湛湛誓水。湮古井而不瀾。呱呱在懷。裂貞膚而餘血。羅幃冰燄。寶此遺孤。奈室霜鐙。依於母氏。蓋將茹恨罔攀。冀成立之日。形影相弔。續已枯之魂者也。乃以五載久延。百禍未悔。文叔之妻方少。長卿之子先歿。烈婦旣莫號於蒼穹。決相殉於下地。閨戶而縊。尙未就奄。其母知之。抉關以入。里俗之論。每謂解縊。必得少壯布氣。乃可復甦。母故惶遽。遂呼鄰人救焉。哀迫於中。謂螫也何害。慈昧於道。招將伯助予。烈婦且訝九幽之可還。痛再生之愈切。詢得其故。憤結莫追。卽取交刀。自鏢其脣。置脣從容。而復瞑逝。哀哉。肌膚之愛。薄於名節。鏤割之傷。不聞慘但。是誠泐金石而不渝。蹈白刃而不辭者。可謂烈矣。聞之者色驚。知之者心折。而自亡迄今。逾五十年。門無奇行之表。臺無懷清之名。微顯闡幽。曷云能思。且夫貞姬之頌。代不數人。偉躅之傳。史不絕紀。如梁媛斷鼻。以自伸。夏侯毀耳。而明潔。禮修塗面之智。段紀截指之誠。尙矣。彼數人者。豈皆視糜骨以爲甘。仇己膚而必墮哉。誠爲志不可以苟屈。污不可以少存也。吾嘗以爲仁義無恆。履之者至順。貞麻非閔。宅之者至堅。迹險而理乃安。未嘗有駭世之衷。念純而操自厲。未嘗有徼天之幸。若烈婦之行。豈求彰彰乎。然而國家飭俗敦風。言旌行擢。井閭令聞之遺。必達於上。殿陛敷榮之典。必洽於下。是則搜采貽芬。顯乎志乘者。固有

司之職也。而表揚絕德。被之絃歌者。亦士大夫之責也。罄北山之石。徧列豐珉。削東海之筠。全貽煒管。庶可光斯隱微。激彼貞風焉。贊曰。

寒雲入壑。貞柯不移。逝波淩川。精禽何知。貞柯雖頽。郁條猶樹。精禽雖呼。冤恨莫補。烈婦之生。荼酷夙嘗。烈婦之死。慘厄載傷。脣不可存。吻不可嚙。母兮天只。畜我不卒。非母何愛。非脣何污。脣而受污。脣非我膚。維脣之亡。厥寒在齒。維婦之生。爲母之恥。凜凜自矢。愔愔全歸。景曜飛譴。懿美何微。瀟湘之南。無復宿草。丹雪積尋。青嵐迴繞。千載其懋。百世其型。願翼樟册。永此嘉銘。

王君貽珠香雪圖序

桂林王君。芬藻風流。俊詣無敵。修綆窺古。折屐謝游。入超宗之坐。爭識鳳毛。企幼安之名。驚傳龍尾。湘江之左。一日馳聲。嶺海以南。百縑市賦。僕也。隨宦同於吳祐。擇士比於法真。剡舟交粵。曳屣珠方。性樂幽尋。輒深棲覽。暇則眺迴遠洲。修觀近陸。瑤簞玉筍。矯立於偏寰。碧嶂金潭。森隱於炎國。披煙弄月。乘雲俛風。思軼人之遲暮。撫美景之周流。恨焉日夕。繼以嘯歌。而王君敦懷沈素。慕交譚野。蘭菊在室。佐公贈彥昇之詠。鴛鴦於飛。曼季惠士龍之什。遐心我從。雅遊斯篤。他日出其香雪圖幀。屬予爲詩。復乞以序。是惟晨繪希彩。悅乎素心。夕薰多寒。適有真賞。梅花千本。或悟以前身。香草一叢。別啓其生面。袁安閉關而卻掃。王恭披氅而行吟。蓋妍辭初聘。則飛霰滿堂。遙思欲馳。則繁巖染袂。若此圖者。毋亦傷陽春之寡和。怨玉宇之難攀乎。古人云。嶺南千里無雪。惟桂林有之。則王君之在此都。其有似於雪也。然而遇象能耀。水木

資其明華。靚潔成輝。霜露亞其陶鑄。不僅以皎皎荒隅。瑩瑩谿谷者。雪之質也。請以黃竹之申歌。幽蘭之儷曲。爲子勉之云爾。

立魚峯贊并序

柳州城南有奇峯焉。名曰立魚。子厚所謂形如魚之立者也。飛嶺拔天。疊嶂委地。駁若層鱗。疏如健鱗。去塵則三里而近。涉江則一葦可杭。蓋未至其下。而嶢峴無際。疑通仙都。鬱拂旣窮。尙接丹氣。於是刈荒榛。俯翳蒼。左塗右谿。奪虺蛇之徑。上磴下曲。越魍魅之宮。至山之半。始覩一洞。貫洞之中。復得兩穴。礪石外蟠。溼雲內奮。竇有鬼斧。壁無鳥蹤。芙蓉葺蓋。金碧萬殊。樛葛爲門。絳紫百仞。鐘乳斜瀑。驚赤虹於潛湫。流瓊碎階。疑落星於中夜。謝客登山之作。倒鑄於陽崖。杜公泐名之碑。駕峙乎巖缺。由是而望。遂不可梯。竹劍之杪。續彩無名。棘刺之端。飛靈所集。故探祕籥而莫從。怨真宰之有吝也。余方羈客遐陬。狂搜勝域。託情茲麓。永暢厥觀。攀瘴嶺而振衣。戴鬱花而自舞。孟陽侍宦。劍閣書銘。孫登獨遊。蘇門長嘯。山中跨鶴。蒼梧帝子之魂。峽裏鳴禽。江南逐客之操。蓋遲迴而不返。益杳蕩而無盡矣。迺爲之贊曰。終南石闕。崑崙玉堂。風泉入壑。雜花滿梁。巖腹鼇棲。峯腰龍斷。轟然翠柱。軼乎金漢。珠林投僻。桂海幽窮。傷爾孤特。嗟此挺雄。水僊怯霜。明月墮霧。穹蒼何險。域中何慕。蘿谷千盤。墨天一罅。掉影池中。聞聲石下。琪枝在樹。青蓮有臺。窅窅獨往。九真未來。

宋母曹太宜人墓表代永康公作

宜人姓曹氏。江蘇元和縣葑里人也。大家雅範。世東觀之文林。幼娥孝思。銘會稽之江曲。維宜人體資淑令。德贊言容。箴盥惟修。纂組勤業。年十七。嬪於宋氏。誥授朝議大夫。前廣東惠州府知府。含齋府君之副配也。婉孌毋違。柔嘉有則。屈節簪侍。周母儷其英賢。秉心塞淵。戴媯溯其風度。叶蘭馨燕姑之祥。徵帷幕泉邱之瑞。施衿閨闈。愛爾嫻素。咏星夙夜。重其克諧。是以言告師氏。歌絺綌之華。變彼諸姬。奉圭臬之間。府君投版炎區。建麾嶺嶠。司百粵之州。棠陰載路。領九真之郡。桂檝浮家。宜人則衣不純帛。翊庭治之公廉。晨起操蒲。佐中饋之羞膳。履端上日。或頌椒觴。遠道春風。能酬蕙錦。迨乎外樂懸車。內傷撤瑟。獨持闔政。不忝前規。采蘋采蘩。歲時伏臘之敬。俾筵俾几。賓從燕飲之歡。蠶宮三縷。更治盤匱。雞人一號。已登杼軸。自府君頤養於林泉。卽宜人憂勤於家室。喜慍不形。虔恭愈篤。恕以逮衆。婢媪永無間言。敏以承和。戚師尊其容止。絜滌澆以進。娛夫子之暮年。陳揄狄而朝。當女君之諱日。蓋兢兢者。垂二十載。上使期蓋無私顧之憂。下授髻冠以門閥之舊。心綜其大。體安其勞。輕重之繫。在茲一人矣。況復喻義方於機績。則燃荻終宵。貢外傅之束脩。則鬻簪質市。一雙解髻。款士行之賓。十幅裁衾。招孟仁之侶。慈教旣勛。子譽益隆。家聲丕揚。人爵斯茂。長子棣遠。官於山東。次子楷遠。官於安徽。版輿未駕。尙侍先公。象服是宜。以儀君子。宜人貴不忘貧。儉惟知足。還鮮不怡。反金必怒。嘗爲述昔年之矜節。詔祖德之芳型。勵其所生。期於克紹。若乃精俸之貽。甘旨之獻。咸臻於宜人。宜人歎曰。此府君之餘慶也。先夫人之惠麻也。則必列於蒸嘗。薦之寢廟。展遺容之莫追。告諸孤之成立。見者莫不仰其高明。化其禮讓焉。旣而楷遠移宦西粵。入慰北堂。

且欲奉雲閣之顏色。重泛湘中。棄蠻府之微名。久依吳下。而宜人戒之以宣力。勉之以馳驅。王尊叱馭之。坡非輕軒所行。何武強仕之年。非閒居可賦。肅雍以訓。慷慨而道。雖敬姜之教。文伯。崔母之誨。元暉。以今況之。不是過也。楷遠之官。十有餘年。雷封報最。露布論勳。百年榆檟。邦人能誦先猷。九重絲綸。天子親書。上考。晉擢方州。寵榮將母。受茲介福。光於前甯。豈惟絳紗傳學。賜號宣文。繡幃旌庸。封之節鉞。而宜人悼喪元子。劬悴厥躬。疾患彌留。神明殞歿。風電相摧。婺輝不朗。嗚呼哀哉。哀子楷遠。銜恤罔極。增感氣傷。視含視斂。永闕其誠。附身附棺。弗親其事。酸鼻痛骨。陟霜屺以何從。踟地踏天。嗟王事之靡盬。知我如此。不如無生。泣血椎心。不克自宥。嗚呼哀哉。據狀宜人。生於乾隆二年七月二十一日。以嘉慶二十年九月二十三日卒於里舍。享年七十有九。勅封孺人。晉封宜人。子四人。長棣遠。山東濱州吏目。先卒。次楷遠。廣西甯明州知州。次桂遠。椿遠。女四人。皆適士族。孫十四人。以一人嗣於嫡子之長。爲小宗。嫡孫。曾孫四人。將以丙子冬葬。宜人於城東天花菴之原。近於祖塋。棣遠祈焉。禮也。隧道恐闕。幽域將成。牛眠之下。風樹愴悽。馬鬣之封。神光離合。擗踊聖室。悲棘人之纒纒。定省隴中。望伯昆兮。渺渺哀窮念極。存想音容。思撰純誠。書於阡兆。某與次君。同官較密。心契獨深。愴孤禽於海角。感春露於寒泉。懼聖善之弗彰也。爰不敢辭。而爲墓道之表。庶幾勒此青珉。永昭淑慎。禮宗之憲。猗與彤史。載徵窈窕。德象之儀云爾。

葉鶴巢越雪集詩序

夫言爲心聲。心因境遷。詩本緣情。情以識域。集苑枯而飛鳴異者。歉乎勢也。適陰陽而舒慘別者。撓乎氣。

也是以朔颺厲則燕鷗舞。暑薰和則越鳥翔。魏儲論徐生之文。嗤其齊氣。宣武聞郝生之詠。晒其蠻語。若夫鄒衍居寒谷。而有回春之律。謝鯤生永嘉。而有正始之音。君子安雅。復乎尚矣。葉君鶴巢。修能內茂。道實外沖。吟咏緼袍。翺翔林澤。沈博之藝。研於蓬樞。清麗之思。聞於州里。其所居也。乃沔瀟湘之源。極牂牁之委。柳山峩峩。附於九嶷。象林盤盤。媿於六管。幽人所棲。僻壤何陋。狎雲景而不言。餐沆瀣而自樂。晨眺東溟。浴乎扶桑。夕臥北窗。乃弄南斗。釀菊泉之醴。開荔子之樽。景與蒞郡。就摧前聞。子厚謫州。猶考近業。中都大邑之士。縉紳先生之徒。咸握清風。爭趨高躅。閉戶而長者轍深。啓關而問字車集。於是誦顏氏之箴。歌原憲之襟。履潛思所至。則醴甌可登。麗藻所營。則廁室皆滿。詞鮮近韻。書多古懷。凡厥抗心。皆臻絕詣。短章振宣城之範。長言挾拾遺之精。淡雅以陶韋爲宗。沈寂以郊島爲尚。玉徽金銑。方奪穎於毫鋒。秋實春華。不求合於跬步。又或刻中訪戴。洛下依劉。驅山川於腕底。譜松篁於筆端。撫塵康樂。洞庭帝子之遊。解帶霽均。薜蘿山鬼之曲。蓋其蕩志也潔。故取物也芳。其儲素也恬。故履規也峻。馳念天雲之際。躡神虛妙之巔。琅玕碧風。甯戀巢枝。瑤海青虬。莫垂佳餌。南方靡曼之音。湘中紆鬱之調。未嘗滯其靈機。潛其雄翰。余所以讀越雪集三卷。而不禁有伏膺之嘆也。余嘗慕交粵之川。巒思荆楚之令士。遂緣省宦。得肆遐心。近自始安。迄於比景。於山則探衡岳。於水則涉邕灘。每謂桂峯玉筍。若隱元豹之姿。合浦明珠。易結騷人之魄。許文休流宕之餘。徒存月旦。虞仲翔屯遷之後。雅尙風流。欲倚蒹葭。緝其蘭茝。而鶴巢狂希。伯子雜引流波。歡託平原。定交爾汝。賞音之誼。益友之誠。嶺海以南。一人而已。又復盡寫瓊篇。獨探元味。

輓槃不飾。桓譚詔爲至文。雌霓連辭。玉筍詡其能讀。誣諉弁首。逡巡久要。冰雪鏤心。非浮波可衍。瓊瑰滿目。非鑰石可冠。聊析微言。扶輪大雅。藉銘遙契。兼誌游蹤。

越西江行竹枝詞序

江行竹枝詞者。元和宋楷遠。大輿方履。錢南徽紀游之作也。夫左徒九歌。降神君於雲中。平子四愁。翹美人於湘沚。東南具浸之墟。天地埋憂之所。登山臨水。日暮不歸。思婦勞人。吞聲而泣。時則春晝乍陰。麗景將謝。亂雲生壑。落花滿川。望孤嶼之縈洄。感蒼波之無極。客以三月之望。新漲乍起。瀧濤怒卷。間以奔泉。舟楫橫浮。高於古樹。左挹灘水。弔二妃之咸從。右望蒼梧。問重華之不復。徑指交川。屈伏波之銅柱。途出句漏。訪葛洪之丹井。繫葦而宿。棧石爲家。肆目修原。動駭心魄。幽鳥則背葉南飛。窮猿則抱蘿北嘯。共傷懷而發涕。不自知其泫然也。於是鳴笳盡咽。朔管徐吹。晨露未晞。暝煙忽破。清謳滿江。人聲在水。舟子一唱。越女再答。青樓大道之歌。黃竹成箱之怨。征夫西舫。有雉朝飛。少婦東鄰。采藍盈掬。鷓鴣和而迴波。興游魚聽而殘月下。此一境也。豈不爾思。慨其嘆矣。若二人者。或道州問政。重入九嶷。或高卿覲宦。辭歸三楚。弭節行路。觸緒離襟。芳草千里。若迎歧路之悲。清風一來。不待雍門之感。迺復揄流波。雜杜若。興言彼美。駘蕩余心。猗靡贈芍之章。慷慨雞鳴之什。庶可代萱樹背。聊慰飛蓬。載酒屬車。同消愁氣。至於組織鄉謠。編采蠻俗。鼓名記里。舟號指南。述山陽之歡宴。追憶平生。詠渤海之循猷。能書家乘。詞雖不類。無外言情耳。楷詩自桂林至太平。凡三十首。錢詩自太平至桂林。亦得三十首。共六十首爲一卷。其所以合轍而


分馳者。亦以見川陸之紆遲。嗟我行之良永也。是則激浦僮徊。舫船擊汰。朝攀薜荔。夕采芙蓉。思巫峽之
女郎。悅同舟之王子。行吟澤畔。誰招漢珮之人。攜手河梁。試奏巴歛之曲。




3
4
2533

萬善花室文稿

二





成集書叢

編初

者編主
五雲王

行發館書印務商



稿文室花善萬

(二)



3 0646 3766 7

撰藝履方

萬善花室文稿卷四

歐陽文忠公畫像贊并序

乾隆中侍郎裴公曰修奉命典學安徽蒞試滁州得宋歐陽公遺象一幀歸獻之朝高宗純皇帝親灑宸翰題其軸首仍賜裴氏裴公弗敢私也鈎勒上石而以此卷藏於滁州醉翁亭令主僧守之嘉慶二十有二年草莽小臣有山澤之游假道於滁獲視斯象式名賢之容範闕天章之煥美慨然有動於中曰嗚呼遇有盛而未邵道有蘊而必宣何則器廣則難充聲積則易永腰褻千里聘之以九同而尙屯扶搖一搏陵之于萬仞而不拍故程力以膏時者仁人之達願也媿修以聞後者志士之歎衷也而懷才卒無濟美之諧覽昔而有不並世之感則誠可嗟矣廬陵先生契聖於旣往肩道於將墜粹學入孔顏之室名世應伊周之期雄文擇荀揚之精論史軼遷固之躅寶峻極所特鍾人倫之水鏡也以王佐之英生邗隆之運早擢鼎科遂參名幄出典符守入隆台司主上信其忠審天下欽爲碩望揆厥遭逢不可謂不昌矣然而登龍之譽重則謗毀輒隨批鱗之疏上則譏間亦乘楊叔節之執政以直見疏陳仲舉之立朝被黨獲罪身歷四君仕逾三黜誣及於牀闥聲逮於宦侍又何異夫元髮之驟改白首之終勞也借使得君有專任之權建議無羣邪之沮發嘉謨之洪鬯進儒術之冲和因百年之盛而革其舛陋綜三代之要而復其典常有宋之治雖與先王同風可也而徒以有盡之年流播內外特出之才升降終世休烈顯而



39499

083
112
2534

未宏。嘉會不可再。遭斯實天爲之哉。彼用之者亦任其咎而已。若我純皇帝之御宇也。九服承鈞。七曜遵度。殫古先之哲后。罔克抗仁。羅書契之元輔。蔑假陳範。秩能昵賢。庸勳序績。炎之如日。函之如春。至於文思蔚炳。瑤簡琳琅。著雍勺之歌。陋射汾之句。美未易蒐。義鮮由繹。卽斯一圖之詠。一篇之麗。往復前儒。慨念逸軌。結韻百言。去天三尺。昔殷王求鰭植之形。徒傳夢寐。唐宗思鳶肩之貌。虛若靈風。未有拂此巾裳。榮以藻翰。垂美不湮。若此之茂者也。夫以極天之崇。撫空存之迹。尙爲攬物懷人。因容慕德。惜良宰之不我臣。幾欲借才於異代。則涵濡之倫。委贄於聖世者。豈復有毛翮之用。隱而不呈。矇眊之詞。貢而不納。如歐公之讜言宏說。聞於今日。功效何可窮數。豈僅什百於彼哉。尺素之摹。勞神皇以延佇。九重之願。曠列紀而難追。雖欲鎔金而鑄范。蠶染墨而贊宣尼。何如俞咈於堂階。延澤於來禊乎。惟聖人不圖近以遺遠。惟賢者不枉尺以直尋。臣旣不敏。竊嘗聞斯義矣。迺作贊曰。

偉矣歐公。體道純固。金玉其姿。鸞皇其度。受命自天。弼棗宋隆。任與志緝。用弗我充。一縑之貽。千載是寶。圓祇護持。靈頰式耀。耀之云何。爰覲聖皇。穆穆端儀。煌煌帝章。醴泉之濱。滌山之麓。昔宴華樽。今闕瑤積。耳白騰聲。齒露召謗。譽毀不期。失均皮相。丹采闕然。有爽其觀。抱日襟空。臨風帶懸。虛佇靈素。往而曷追。明明如月。逝者不歸。嗟我懷人。寘彼周行。天網欲該。威鳳已翔。世不歎才。士不詭遇。山中久遲。惟君之故。龍文何跼。金冶何成。將膏吾輻。卒從先生。

東流故彭澤鄉也。城東有洲，故老相傳爲陶淵明種菊之所。後人葺亭其間，故名之曰菊江亭。排磻遠駕，飛觀虛峙，憑乎陂陀，乃搆絳渺，長川百折，怒濤已回，曲激十尋，沖波相抱，登亭之巔，則納彭蠡於左襟，巢皖口於右睫，鳴颺在鐸，鐘簧一音，晴日上厲，金碧異彩，不獨撫此松菊，留連遺風，而江山之美，亦可以遠託矣。嘉慶二十三年仲春之杪，余薄游江上，憩於東流，適吾友李君申者，張君彥惟，皆應邑人之聘，來修方志，浮雲共翔，轉蓬相繫，奇蹤旣覲，離緒畢申，遂復載酒命屐，造於亭下。於時春潮初起，荑柳已青，同挹曉華，各藉芳草，坐帆影於中流，飲蘿樽於遙嶂，此送一咏，和風徐來，彼酬一嘯，明霞久駐，選日之樂，逸興未窮，舉觴而起，欲酬陶君，飄塵入帷，不可彷彿，然後知遯志之士，遐暢其生，寄跡一往，尙無所追，矧乎遂巡浮萍之中，跼藉榮辱之事者哉！夫淵明在官不及百旬，秫田早植，秋花並茂，良其高意自足，快然忘時，所遇偶適，契焉終老，故得進不羈俗，退以娛生也。今吾與二君，未能戢鱗翼而游，擇藁蕪而處，野馬足以縛其身，鹽車足以廢其志，結覽之願，動輒相違，若茲斗酒在前，心交俱集，延瞰萬里，俯仰一世，不啻吸橫江御閔風，而立於滄溟之表，下視棲息，瞬於蜉蝣，亦聊以展其物外之思，殫其賞心之悟而已。千載之後，甯與古人異乎？言有所蘊，乃涉筆而爲之記。

陸祁生宣南話舊圖序

僕於哲人正交之道，嘗識之矣。儒行曰：合志同方，營道同術。孔子曰：卒遇故人，曾無舊言，則吾鄙之。是知鳥隰魚沫，匿就其儕，白羽素絲，投於所習，草蟲旣躍，聲氣相求，風馬雖殊，標榜緣達，故有披襟暫面，望塵

寄懷。示以丹心。悅其華藻。神魂繫乎千里。愉戚同於畢生。盍簪則秀榦敷妍。惜逝則寒叢零葉。尙論古人。未知所裁。惟我友生。實符斯願。於是陸君祁生。言念古歡。悵然遐日。感曜靈之急馭。知陳迹之易迷。迺伸毫約楮。設境寓情。屬盛君大士。代作宣南話舊圖。而命同人系之詩以記焉。時則霜颺乍警。清陰滿空。砌藥朝飛。庭果宵墜。都館蒙密。層牖閒敞。虞翻別榻。奇書盡陳。管甯藜牀。坐客恆滿。哈笑旣作。狂歌相答。各謀樽酒。爭浮瓜李。六博彈棊。間以絲竹。主賓相忘。樂不可竟。至於晨燈未闌。宵月當午。輒復留連。促膝述往傷懷。思南皮之勝游。悲山陽之逝侶。涼露有聲。鳴烏夜起。不知攜手。何以泫然。嗟乎。一士之生。別於傭保。百年之內。促於修名。欲與結授。天關高議。雲臺奏禮。千卷立功。萬里招拔。類之友。不世出之才。進揖皋龍。退晒枚馬。斯其上也。否則列館西河。講學東淹。纂組絕業。自名一家。弦誦六藝。鄂郭百氏。守先聖之遺緒。求至道之大經。抑其次也。下之亦欲蟄影窮谷。韜光重淵。製芰相酬。採藥以贈。具茅容之雞黍。呼龐公之妻子。同爲農夫。長謝世網。致足樂矣。而獨俯仰失時。牽率喪志。鉛刀不藏。燕石空眩。束纏加肘。逼壤側足。戚戚嗟嗟。致於沒齒。秋風一來。奔走四海。骨肉之愛。去若斷絲。心膺之契。傷如脫箬。死生契闊之怨。羈旅淪薄之思。靡日不臻。何人能免。雖使怡衍良辰。逍遙讌飲。晨夢易寤。瞬息已非。豈足消大噫之氣。飫屬車之愁乎。入斯圖者。凡二十有八人。皆以特立獨行。厚節勤類。擅文章之譽。得狂狷之名。而所企不過一尺之階。所患不過一簞之食。仰息者高於虹霓。紆體者卑於渤澥。登降殊軌。搯亢難鳴。慷慨而起。可勝道哉。人之志慮。悔不早立。僕也。愧南州之高士。從洛陽之少年。徇名未甘。遁俗已晚。行當葺宇幽岫。爲人外

之游耳。昔琅琊王秀之。慕宗測之高風。輒繪其形。與己相對。他日懷舊之作。君倘有意於此乎。若夫歌十畝之詩。寫白檀之扇。並耕終年。臥游狹室。如嗣宗之遇蘇門。長康之畫幼輿。使知之者著於泉石之中。求之者晤於行障之上。則斯圖不廢。宜爲先聲。恐亦非僕之所敢期也。聊以記之云爾。

陸母林太孺人家傳

母姓林氏。諱桂。福建閩縣人。早喪父母。依族姑以居。十德之門。判乎單祚。九真之望。獨振衰宗。徽華夙茂。端操有則。程纂組之麗。閑德象之規。年十五。嬪於陸氏。爲恭城君諱廣霖之籓室。時女君謝祿室有虛位。寢闈之政。總筭而修。恭城君數宰遐陬。著廉平之治。三去其官。再黜而起。心勞公職。家復多故。凡先廟魚菽之祀。威姑饘醢之養。婉孌雜佩之章。綢繆遠道之問。事無洪纖。咸咨惠姑。是能肅禮不忒。承志毋違。虔箴盥而忘勤。撤揄狄而畏僭。至恭城君歸老於鄉。則有親雅之宴游。少峻之疏附。未嘗不潔脯以進。斗酒爲歡。及其亡也。搢膺入幃。輟泣告殯。謀附身之事。正朝章之服。勿使有愆。以虧先德。雖李媛之供客。具柳姜之正衾。裘況乎今昔。蔑以逾矣。恭城君有子五人。母所生者二。曰繼裴。才而早夭。曰繼輅。生六歲而孤。母嘗曰。吾丁不辰。髻鬣失育。未能沐慈父之訓。聞母師之教。年始成立。執箕箒於陸氏。侍先公者二十餘年矣。見其奉上長民。明哲而惠。敬親睦宗。恪誠以和。瞑目之會。家無儻石。繼輅之生。值父暮年。庭誥罕聞。遺命有託。才也則爲慶之餘。不才也則爲殃之象。悠悠之口。豈復有所底哉。恆恐繼輅墮節敗行。負玷逝者。吾所以曉夜憂思。求督誘之方。且鷺子可以常勒。羈軼才難以庸範。御故縱使博覽典籍。延接英彥。冀獲

勝己之益。以繼尙友之功。若夫懿文德。揚先聲。進而不怠。斯亦未亡人忍死之效也。記曰。寡婦之子。非有見焉。勿與爲友。嗟乎。孤者失天。又窮於人。苟非自勵。將爲唾餘。甯不傷耶。聞其言者。莫不爲之揮涕。仰其卓識焉。於是繼輅焯掌劬業。虛懷納善。學深奧。隨文爲詞宗。初選茂才。復舉孝廉。繼襲之子。耀適亦少有盛名。時論借重。同里張惠言。莊曾儀。惲敬。洪飴孫等十許人。並當世名賢。負人倫之鑒。皆與撫塵定契。展席拜親。然後知通雋之器。本於式穀。義方之美。挹乎古人。其子之才。成於其母之賢。高朗典法。爲近禩所希觀矣。若其瘁念戶內。周支饗殮。自脫瑱環。饋給嫗鄙。蓋自恭城君之亡。訖乎母身之存。咬興晚處。體任手操。春桑浴絲。秋菹薦簋。未嘗一日而不兢兢。一事而非黽勉。心圖其大。慮該乎微。碩宗不墜。繫於斯人而已。母以嘉慶十五年卒。年七十有五。著家誡若干言。子繼輅述年譜一卷。四方能文之士。爲作銘誌哀誄。集爲二卷。藏於家。論曰。昔范媿勉求令名。而孟博齊聲。李杜劉母。不受虛譽。而真長比德。苟粲見其成仁。則身就阼而不悔。灼其宏才。則詣日進而未允。懷義知人。本於毛裏。恹恹相誡。以底於道。若下此榮利之事。甯有冀焉。嗟乎。民質不淳。俗尙日靡。奢佚之美。根於性。人爵之倖。成於教。子之初立。父提師誨。皆謀戈獲。同於穿窬。不復知有奇偉之節。仁義之軌。見有矯潔好古之士。反譁然嗤之。引以爲戒。冠冕者皆然。遑論夫閨闈哉。如陸母之垂誠。不以祿位爲貴。深居重帟。而知天下之士。置子於賢人之林。勛子以不朽之業。美言尊行。踵於耳目。卒使其子若孫。爲世通德。豪俊長者。屈膝起居。敬慕不已。視若己親。何其曠識明知。若斯之負越乎。雖媿之范劉。曷有愧焉。論著爲經。義足以風。欲求高世之行。不泯乎遠。闇淺之習。聞

而稍悟。故擬中壘列女之篇。爲之傳而申論之。以備史氏之採擇。
贊曰。恪次心。噶殫思。蓬麻樹息。良藪鬱德。維華標尙。曠世端禮。柔家敢陳。女史徽音。嗣遐。

清歡堂詩集序 代永康公作

夫至人之行。天倪之和。時累所不能淫。物險所不能入。其視窮宙之推移。若寒燠之襲治。方宇之創覆。如晝晦之遞經。怵而吟。枯而忘。寂乎無聞。冷乎其善也。又有卷許之論。務涓之儔。畏塵塏之撓形。視乘服而若浼。其志則淵潛爲高。其言以蟬蛻爲潔。至於默台遠蹇。楚國偕逝。拔躬千仞之上。殉名百世之下。一介之義。天樞植焉。一辭之感。庶氣興焉。蓋士生不恆。代有相嬗。其或厄元二之會。丁陽九之辰。鼎社載遷。元黃改兆。雖有至仁之君。與民更始。而新故之際。人情難堪。是以填海之願。久而未泯。當車之怒。踵而易生。惟有識之士。澹然意解。動則憫亂。退以達節。乃自放其身。求外於世。游處崖僻。長爲逸民。不特無詭激之論。怨誹之言。卽采薇之歌。麥秀之嘆。皆調以希聲。息以深蘊。曠悅木石之間。泮渙江海之涘。撰思太初。合搆淡漠。如元醴之初陳。蕢鼓之發韻。睢睢乎。盱盱乎。上德之至文也。宜與呂松壑先生。標識通尙。修名淑郵。值明衰季。盤桓謝危。迄乎易姓。陸沈砥志。采藥鹿門之屺。結友馬牧之儕。藜藿不供。而意佚乎方丈。陋巷夙閉。而神竦於岱嶺。斯所謂見素抱樸。深根甯極者矣。暇嘗泛茗。觀曲江。迹松子於瀛海。步重華於廣野。境之所涉。懷不能已。輒宣之詩。茲清歡堂集二卷者。亦皆避世之作也。觀其宅義忘端。沈思入祕。去曼衍之詞。而包孕無類。削綈槩之跡。而縝雅可宗。故文約則旨微。韻高則味簡。春雲忽起。澹如遠山。秋空

自澄照失纖翳。飛花空谷之外。幽藹難招。蘭芷被徑之時。芳馨欲斂。論者謂足以頡頏靖節。陵轢昭諫。衡格則方羅爲超。選詣則比陶而亞。斯言三復。信乎有徵。先生五世孫榮。懼手集之。或湮。簪校以彙。某之與榮。有同官之契。申以婚媾之雅。獲從編次。命序不辭。原夫憑軾風詩。探源騷辨。離黍慨嘆。香草抒貞。託興旣遙。如往而復。以意逆志。是爲得之。若其混哀樂於一致。平汙隆於片言。抱膝窮機。解心天械。求獨至之崇邈。固久釋而莫窮。庶來哲可俟。亦非瑣材之能述已。

祭董母莊太宜人文

曰。嗚呼。聖善之質。福祥所臻。胡爲降鑿。遽闕芳塵。金帷掩書。玉珮辭春。徽容雖遠。彤史如新。惟太宜人。延陵右族。楚令垂芬。漢侯啓籙。世載名德。內鍾靈淑。婉婉環瑱。孳孳篤牘。宜室之歲。嬪於廣川。棄華尙素。克存稱賢。自範德耀。以儷鮑宣。恪恭蘋藻。黽勉豆籩。曰維往時。外家多故。蒸蒸日上。奉雲荒戍。金城日寒。玉關歲暮。獨客不歸。交親誰助。威姑饋醢。婦職所供。遠道笥篋。手繭所逢。春啓兒塾。截髡以充。秋薦禰嘗。嚮齋以豐。習苦自甘。居貧若喜。云胡忍言。以傷游子。茹蓼中年。抱辛十祀。克迓福善。獲從祿仕。毛義居官。不求顯名。孔奮至孝。復矢潔清。室無瓊珥。案有藜羹。勤爾蠶織。依然布荆。又厄元枵。慈庭廢養。秦隴羈棲。江城遙望。衰髯蕭條。歸心悽愴。人生幾何。劬勞難狀。雙雛嶷起。士衡士龍。畸文驚世。上第連蹤。乃進丹授。華映鄉宗。乃撰鳩杖。就養畿封。人子求祿。幸逮親存。翳予同里。雖無要津。庶幾萊綵。同仰慈雲。尤欣具慶。實惟德門。御陌花開。江杭酒熟。各奉板輿。歡陳鄉曲。悃悃禮範。雍雍端肅。咨嗟曩事。咸知芳躅。五鼎之養。曷

謝母勞。百年之祐。曷副母操。中庭有木。秋風蕭蕭。天乎不憫。悲鳥夜號。仁焉而悴。德焉而隕。並杖神傷。聞風涕隕。愴絕居廬。聲瘖色殫。擗踊何追。春暉遽盡。嗚呼哀哉。昔日登堂。珈笄委佗。今茲芻奠。悽愴蒿歌。猶陳象服。虛佇龍梭。魚燈泉室。蟻結山何。仲舉醇交。伯符心契。仇杼親聞。柳九夙記。旣感哀榮。共嗟淳懿。勛采蜚英。純孝彌摯。厚嘏來享。垂裕無涯。靈儀在天。盼蠻厥家。蘭漿孔潔。蕙肴載加。是歆是格。德音匪遐。

懷知圖序

夫引鏡寓形。媿妍易察。程才待遇。顯晦難期。何則藏乎中者。修約不炫於自見。聽乎物者。卑抗不可以概求。神體始導。同於混混之泉。嘉穗含生。翳於蔚蔚之卉。阜樞之駿。非孫陽則不顧。幽壑之桐。舍雍門而誰拂。士之生也。建形不異於衆。植躬不殊乎類。茂德雅度。蘊以淵深。夙智奇能。闢於造次。閉戶懷感。行年自傷。或憔悴以終貧。嘆睢盱而無耦。乃有藻識之賢。合志之士。桑落有願。擁篲爭前。榆蔭不移。解瑗相答。吐一言則玩咏不忘。奏一藝則咨嗟終旦。扶風長者。刷其羽毛。淮陽君公。賜以咳唾。北海造席。接賞讌於當時。西安不來。謂煩憂之難遣。至於藁蘭香湛。漸久能親。露木風榮。臨年共悅。千里命駕。而撫臆論心。四方合軫。而望塵請友。析義於經籍之廣。砥行於道德之華。不必並位齊齒。列閉同游。而陶陶永夕。銜樽酒之歡。悵悵畢生。懷國士之遇。是故古之君子。明死生之分。挈去就之義。而盼睐之飾。殉以不貲之身。氣類之通。敵於生我之愛。人之相知。固如是乎。伯生先生。學闡九奧。德鍾三懿。守青箱之祕經。起黃中之高譽。騁詞之會交。讚賢以輔志。蓋嘗載笈周秦之域。曠覽并翫之區。在位通流。處散名雋。得意者捧手。投分者斂

襟展君卿之脣舌。當子春之旗鼓。潁川荀淑。有師表之稱。汝南袁公。致分坐之禮。樓東初日。或重清裁。團扇桃根。亦吟佳什。逮乎發軌清途。影組東國。政道風流。化行草偃。廉節上達。表乎百城。循治所敷。潤乎九里。若夫晨燈夜燭。時賦懷人。朗日清風。翹瞻遠道。恤楊恭之屏嗣。憶張堪之片言。十年封篋。猶有遺文。三步迴車。爲營薄醜。明明如月。河梁執手之時。靄靄停雲。京洛緇塵之會。未嘗不顧形而增思。停觴而太息也。暇乃綜其梗概。誌其勝游。或寫形於杵臼之間。或寄懷於巖壑之內。爲懷知圖八幀以記之。嗟乎。寒蟬清露。一葉之所容身。鴻毛順風。飛蓬之所託迹。縣縣葛藟之野。達人過之而沾衿。萋萋芳草之章。志士聞之而隕涕。千載而下。甯復相知。九泉可興。吾將誰託。是獨卞和於邑。冀良璞之終明。朱穆貞孤。見斷金之不易。翳何人哉。翳何人哉。觀斯圖者。亦可知詘申之所感矣。錢也。顓訥之質。願滿身而無由。瓠落之行。雖淪時而不惜。先生假之以光華。篤之以藝業。仲宣始謁。輒付藏書。次道相逢。頻傾家釀。遂使鞅碣石而自驚。振蕤蕤而欲舞。丹鉛可抱。先陳執義之門。白雲雖遙。終有酬知之地。其將有光於斯圖歟。抑終愧之也。先生命爲之序。故敢綴言其情焉。

徐仲平原學六篇序

夫陳力之效有殊。而致道之功則一。惟其燭幽昧者。非揚輝無以明。擇良材者。非鑿括無以正。是以賢哲之士。惜陰程業。究典略之奧。而忘饑渴之患。證傳記之文。而息榮顯之志。迨其用之。則又事必師古。言則稱昔。繁舉博引。執矩尋繩。無獨是之見。鮮悖道之行。雖龍蹲之聖。猶著三絕之勤。鴻飛之宰。尙取百篇之

益才不逮是。而曰不學而能。則未之敢許也。世之與才。若形神之相附。而庸闇代增。睿識日寡。豈不以逞己者衆。而驚學者少乎。受性於天。各有所限。求知於學。探之益深。而後世之彥。詮性道則以穎悟爲能。好詞賦則以剽取爲法。言當務則舍案牘而未由。炫才用則肆臆論而不愧。試以天下之大要。衆人之所疑。非柄鑿而難行。卽睢盱而無策。豈今昔之異途。實學術之不立也。吾友徐君仲平。夙質多通。好尙不惑。鑽堅研微。實事求是。少受師友之誨。長切爲學之方。蓋懷之素衷。四十餘載。然後增益舊聞。游泳新得。涉筆著論。爲原學六篇。斯文也。去糟粕之繁。絕曼漉之失。極其精。以窺往聖之指。抉其要。以誘後至之心。識廣而意周。言近而道遠。可以啓千載之祕。不獨成一家之言也。桓譚讀太元。謂爲軼代之書。沈約見雕龍。許其不刊之作。余於此文。亦有至賞。研尋反覆。日不能忘。仲平屬爲之序。自以無中郎之譽。元晏之筆。慙而不敢作者。又一周矣。將自遠別。輒加論究。且於仲平之說。將有進焉。夫爲學者。體有三尙。一曰遺俗。二曰審時。三曰定志。夫持卷之士。多罹貧悴。故必有忘得失。輕富貴之致。使朝披竹簡。已覬馘冕之華。夕解鞢繩。乃羨金穴之厚。紫標黃榜。有識所嗤。斗酒隻雞。於義不足。言旣無徵。道同塗說。其蔽一也。先聖後聖。文質不齊。安越安楚。流風斯易。必欲舍琴瑟而陳黃鼓。驅棟宇而就營巢。效周官者。或至阡危。摹大誥者。遂同傀儡。此同師古之悞。實由於師心。信書之過。不如其無書也。其蔽二也。知二之質。鄰於庶幾。已百之功。廢於造次。無樂恢閉。廬精誦之勤。而有朱生博通。衆藝之志。簞食瓢飲。苦終歲之資。編蒲緝柳。非一蹴之力。閒而輒怠。好而不專。其蔽三也。嗟乎。讀書之遇。已逾古人。天賦之英。多在同輩。而使悠悠歲月。遽馳於

寢興巖巖意氣終淪於草木不能絕人間之酬答希至道之闡域屈指以計遂無一賢束書而嘆坐慚千古余於仲平各有所蔽知而不改夫將誰尤來者可畏其終有冀乎

汪母董孺人靈表

孺人姓董氏江蘇陽湖人適同里汪君名某國子監學正華星先生之女也母曰謝孺人世爲儒族著於南邦孺人膺上善之質體季蘭之操淑慎持衷婉孌在室學正君早謝仕籍好讀異書守仲舒之故惟有鄴炎之心疾母謝孺人復以積疴淹久不闕戶庭若夫三時浴桑上日奉藥逆蕃釐於中雷備饋問於嫺鄙勤劬之職萃於淑媛迨乎冰泮陳儀釋衿儷德表肅雍之禮推諧穆之稱京陵家內盡式鍾型扶風集中遂傳班志時則德門殷盛宗屬實繁道南道北不無潤匱之殊東眷西眷或分戚疏之序孺人履豐而不溢保險而克寬朝修榛栗乃庶雜佩之章夕解杼機爰恤無衣之族述威姑之誠以勸閨闈佐夫子之誠以供滌滄誨導諸子肅若嚴君幼授禮經長就外傅去環瑱以爲資飭衣幘而後見楹書在手垂訓不忘庭誥因心勸學尤摯是以先後洽其惠和少長感其慈篤徽音之頌繁女師之道立矣嘗以母氏羸老寡祚無依迎養起居暮齒不怠及其將逝以屬諸孤是則蒸蒸之愛迄於畢生惺惺之情銘於幽壤弱蘿千尺相倚而有生卷施一心抽之而未死純孝之美過於古人不特金盈剗永思之文馬芝作申情之賦也愷悌哲慈庶集休祐疾患彌留終不可復以嘉慶二十五年七月卒年六十有七哀子某等切怛罔極悼心失圖僭春暉之不延感秋霜之泫落佳城旣卜安宅尙遙苦席寢坐几筵上食思述先行以申悲懷

願惟昔人有靈表之作。所以昭列總帷。鑄諸珉琬。乃搆斯表。繫以辭曰。翳賢女之顯緒。降明德兮在躬。箴
盥事而華茂。筭總備而禮崇。繩槩獲以不愆。格至孝以冥通。卻織縠而弗服。徹兼珍以惠窮。用有成兮家
室。撫四子兮丕立。金辭髮兮給餐。丹濡指兮勤織。念劬勞之未答。奉偏慈兮繞膝。母藉子兮壽康。女背親
兮夜室。嗟百年兮何遠。神一往兮莫攀。惟子道之無盡。願摧心以剝肝。林風動而晨號。泉源浚而夜寒。忽
日月之易往。歷霜露之濟濟。尋存時之景徽。載彤管兮惟休。望明器兮近陳。瞻遺烈以焉求。託斯文以闡
德。佐彰著兮旌旒。峴去桁兮痛長。靈不可以久留。

祭亡友文并序

道光元年冬。同學諸友。各歸於室。明年正月。觴酒歌吟。清會既闌。感吾生之寡聚。痛師友之先零。爲位東
郊。取酒以祭。其辭曰。

嗚呼。絃覆不移。皋陸可踐。含氣易化。沈憂難遣。歡促悲遙。情同迹舛。抱此咄喏。通於幽顯。顯旣無慕。幽亦
何傷。莫往莫來。忽若有亡。駸駸霜露。宿草所藏。元精炯發。日月迴翔。翳惟明德。實鍾靈粹。秀挺千族。氣空
萬類。金采玉相。鳳停鸞蔚。共勛清猷。熟恤顛頓。偉哉前烈。純茂躬行。含經味道。絕累遺榮。辭如河瀉。業若
山成。闡繼絕學。導啓後生。亦有達士。宅心元奧。清機妙理。高絃絕調。文傳酒德。詩言琴道。性情所至。冰淵
可蹈。悠悠身世。感歎飛蓬。焜燭爾名。屯蹇爾躬。神氣內促。年命不融。彼蒼何心。吾道終窮。松風夜起。嘯鶴
不聞。十步五步。寒煙逼人。苑陵之土。今無薄醴。杳杳長暮。斂茲素魂。憶昔周旋。比於倫紀。交非一端。意出

同軌宵燭長燈。繡牀斐几。考藝程過。宣譽掩毀。春日未晞。秋雲始高。牽襖相從。我歌子謠。鏤膺續骨。投水成膠。霏霏蘭蕙。以蔚崇朝。同此百年。庶幾歡宴。死生契闊。不我能見。風雨墜翼。山河隔面。娛情寡方。涉目多怨。時序易改。積悲益深。往途不復。去轍相尋。薤露之曲。時霑我襟。天日蒼莽。藏憂至今。今日始作。步出東郭。春氣奮發。游魂安樂。高堂廣筵。旨酒清酌。明輿鏘鏘。雲旗爍爍。素裾博帶。君之故人。淺學深羈。君之夙欣。魂其來歸。言笑殷殷。勿以殊類。謂予不聞。長歌忼慨。惟君能顧。高懷磊落。惟君所慕。魂其來歸。歡然道故。勿以藏形。謂予不覩。千載雖遠。一瞬已空。真氣所注。大化無功。偉文碩行。寰宇襲崇。敢慰靈修。勿愴勿恫。良執未忘。典型如在。問學各勤。殖志毋怠。精爽既接。愈於夢寐。敢慰靈修。勿思勿懟。尙饗。

李氏三忠家廟碑銘

原夫三五邈德。元黃易象。天眷攸寄。人謀與同。而湯谷填石。冤禽之志未忘。廣宇息風。孤蓬之心獨轉。蒼土未覆。猶望灰然。餘息暫存。甘同瓦裂。是見則難。至節見植。躬之所大期。傾宗殉主。烈士之所必蹈。奮乎百世。何其禕也。明兵部侍郎。肇高廉雷瓊羅巡撫。武舟李公。秉貞厲之操。好綜博之學。荐名叔世。奉檄溟疆。君黃持節。已聞漢祚之傾。道茂守官。更受湘東之任。祗承孱主。顛沛偏朝。身膺危難。則與存與亡。正色樞庭。則不苟不吐。迄乎旄鉞電臨。樓船鱗下。裹瘡疾戰。奮臂難支。既亡牛渚之軍。竟紹汨羅之軌。長溝之瘠。遽化青燐。故壘之旌。都凝碧血。可謂映秋霜而愈皎。抗夏霆而不辭者矣。公弟監軍道我貽公。馳聲二陸。勵志兩虞。拭玉藩封。枕戈國恥。時掩涕於獨臥。亟奔命於重圍。王僧惜之精誠。楊仲炎之抗守。飲丹矢

石之中。追爽泉臺之側。又公從祖。江西道監察御史。贈副都御史。遯實公。從宦而入交州。事君而遷滇海。感佩綏之義。懷鷹鷂之心。密詔旣頒。私謀驛泄。漢獻遘屯。朱儁被李傕之禍。魏莊畏逼。辛雄膺高氏之誅。慷慨賦詩。從容授命。蓋三公之效也。歲不一稔。地亦殊方。而腐髮弊齒。屹若邱山。支解寸斷。安於莞篲。社稷爲重。執戈之衛爭先。朝廷雖小。毀冕之防必肅。皆得狼暉之死所。不負馬援之壯懷。求仁得仁。蔑以加矣。當夫勝國祚窮。寰區鼎覆。高光遺孽。輒就繫囚。暴骨孤蹤。愁存島嶼。黑子之疆。曰蹙。赤符之運。全銷。異議之臣。坐焰薪而黷貨。擁兵之帥。比蝟虎以養威。江陵可保。並無蕭管之君。晉陽卽摧。尙有長鸞之黨。此實朽柱難扶。崩城莫挽。虞淵之日。固非天之所能迴。尾閭之波。亦豈地之所可滴。兩鐸倚堂之夢。舍智士而能占。七重圍軫之雲。亦羣黎所知懼。若三公者。幾成先見。識逾恆流。豈忘魚爛之期。更冀龍興之日。而乃崎嶇蕩宇。契闊危邦。夸父植杖。渴死而未悔。愚公荷鍤。盡室以相從。凶門早鑿。鬼錄俱登。憤悒而履鋌。矛談笑而棲鼎俎。誠以天經有常。臣質無二。茫茫日月。剛氣所充。悠悠江河。迴瀾欲障。陵谷可遷。而我心匪石。風雨如晦。而雞鳴不已。朱厲附之趨禍。勇激人心。夙沙釐之從君。道貫金石。雖百身其焉惜。縱九死而奚辭。嗚呼。寒霜易零。勁草不植。淪胥滄海。何地埋憂。飄泊東南。傷心日暮。勃蘇頓顛。無可泣之秦庭。雍門刎首。非易驚之越甲。木鶴初達。知君素之已亡。玉馬不歸。稔微子之未去。三百年之王氣。沈絕苴蘭。一二士之英魂。散游嶺嶠。濟陽昆季之壯。但紀鄉歲。長沙族祖之名。惟傳家乘。憑弔之倫。能勿涕洟而興嘆哉。我朝振宣名義。含宏聖謨。追恤頑民。並頒美諡。而河陰之難。不聞范紹之旌。睢陽之封。竟無許遠之傳。

得無喋血已往。愧受榮褒。毅魄自藏。終甘湮沒乎。何以易名。四百輩。獨闕隴西之宗。題墓十八人。又改柏臺之氏也。泯焉不彰。非所知矣。武舟公五世孫慶來。愴述家風。遠承孤裔。感年世之速。質冀先烈之常昭。甄逢得元稹之書。欲貽史館。卞彬乞任昉之啓。未奉朝章。乃復函營崇宇。並列三忠。敬斲貞珉。遙垂千祀。夷叔單楹。蕨水之籩未徹。武梁畫壁。魚腸之劍猶腥。鶴歸可識。不殊宗會之圖。蟲篆新刊。如見靈旗之耀。乃作銘曰。

猗歟三公。克挺貞毅。並節殊猷。營道同義。天之所壞。固不可支。唯君是殉。否塞何知。翟泉竊冥。蒼雲掩藹。雨溼黃旗。霞飛青蓋。易水悲風。涔陽落木。悽愴孤臣。蕭條部曲。登陴夕嘯。墮壘朝呼。衣冠不辨。城郭爲墟。偉哉侍郎。自沈止水。赤綬晨浮。丹心夜起。申徒憤激。正則愁吟。駸駸霜露。淼淼江潯。哲弟監軍。致命鋒鏑。何處歸元。終焉銷骨。侍御尊行。橐籥衛君。主辱臣死。顯忠成仁。孰後孰先。或推或挽。懿鑠一門。魂招不返。人之云亡。邦國殄瘁。闡著遺蹤。恩隆昭代。如何純節。竟闕潛徽。搜採未達。守土所遺。王經有阡。伍胥忘號。蒼涼猿鶴。無人赴弔。遐肖愴思。世德載揚。榘桷俎豆。以奉蒸嘗。令狐舊族。奕奕青簡。顏公先廟。峩峩瑤銑。行邁霄漢。氣補坤乾。頑廉懦立。孰敢不虔。名遜士龍。文慙子厚。鑄頌奇芬。庶昭不朽。

李公用楫。字若濟。崇禎十六年進士。授瓊州推官。明亡。永明王立於粵。擢至兵部侍郎。巡撫五府一州。順治九年。大兵入粵。相持敗走。自沈於勞氏池。年三十六。弟來。字我貽。隨兄瓊州。歷官監軍道。順治十年。肇慶失守。奉命監李定國軍。圖恢復。敗死。年三十三。族祖頤。字廷實。亦偕至廣東。歷官江西道監

察御史王在安隆。受制於孫可望。吳貞毓等謀救李定國入衛。願預其謀。事泄被害。

趙收菴先生二學圖記

收菴先生取蘇子瞻氏有酒學仙。無酒學佛之言。作二學圖。而命方履錢爲之記曰。世有至人。抱德煬和。神凝氣御。滿之則沖。挹之則注。浴太始之冷風。超增城之縣圃。托逍遙以獨往。躡元吉而不驚。當其養天。裘寄地隱。滑靈府。修內景。抱樽而居。承槽而飲。玉色旣醲。蘭情斯騁。視燠寒之一節。笑趣舍之異境。澹兮若浮。曠兮遠游。飄颻四連。翺翔八陬。追松子於大漠。揖桂父於炎洲。朮精夕採。雲母朝流。駘籍壺公之市。億個姑射之邱。饜瑤鼎之元鬯。引沈珠於碧瀉。及其寤也。杜德機而游方外。澡練靡前。常狎寡累。開東安之議林。作祗洎之寶偈。七覺表其真。五明闡其昧。文摯之所未察。列生之所心醉。乃有元君之史。濡管而造焉。隱几相對。言笑旣接。殫精眇思。揣容觀色。蓋近取之眉睫之間。而遠求其神穎之合。恍然自以爲至矣。乃僅得其被飾。左則霓冠垂帶。鹿裘持杖。童顏映曜。逸格頽放。右則松屨留雲。氎巾臨風。含章隱璞。禪悅所宗。睨之而神斯異。酬之而意斯通。有待於緹帷者。退而問余曰。夫湛汰者。汗迹之倫。守一者。韜鱗之士。幽寂者。遺世之人。今先生斧藻珪璋。懸符矩薙。極筆墨之林。總名教之藪。壯節離疏。譽冠上京。出守青淄。惠化洽聞。晚乃貞疾。施誨家邦。偃息於仁義之途。恬淡於浩然之域。疾不弛敬。言必正律。典文盈篋。束帶終日。而茲之耽五齋。慕二氏。易簪佩。彰圖畫者。誠芒淺之未釋也。得無致阮瞻之譏。來嵇含之諷乎。余應之曰。子徒窺光於窾奧。而不覩其昭曠之景也。先生神禪博饗。鞠躬履方。進不獵名。而名隨之。退不眩

道而道自隆。紆體衡門。海內希風。孳孳白首。讚述益明。故能祛形役之蔽。亢泰壹之遲。忘歧息之患。棲元九之英。浮糝不能擾其慮。歷隙不足感其情。於是舉琴按絃。秋雲在堂。嘯咏閒作。奉以瑤觴。脩乎遽乎。莫知其鄉。永年廣樂。春煦載揚。是豈聲聞之所能屈。而何羨乎蒙莊。先生拔而詔之曰。爲鳩晒於搶榆者。識之限也。蠅蜓守於尺壑者。性之殊也。夫生不可遣。道不可名。子將決方寸之涔。而發層霄之橐乎。迨巡忘答。從登前墀。操卮執觚。立醖其醕。醇醪而返。順物之羈。感忽悠闊。貢其儻辭。

清故江西廣信府知府誥贈朝議大夫兵部車駕司郎中晉贈振威將軍兵部侍郎廉都察院右副

都御史安徽巡撫兼提督軍務康公神道碑

蓋聞長河一曲。所以養其溶流。層阜四成。所以植其崇巘。是以駿哲挺生。秉彝元淑。景靈渥曜。閎網韜延。其偉績之所敷。醇質之所蘊。必能建盛業於當世。貽崇廕於義久。振民育德。固仁者之宏規。積惠重厚。乃隆家之懋祚。五際遷運。君子之澤常存。八柱通維。達人之功不泯。若今之卓然可徵者。其惟我康公平公諱基淵。字靜溪。號南圃。山西興縣人也。遼裔難詳。先牒丕敘。東土命氏。則康叔啓宗。西域入朝。則康居衍胃。豫章精舍。共希處士之風。扶風雜編。傳自中郎之使。曾祖太雍。祖萬方。並以潛曜棲音。未華纓紱。父惇。邑庠生。贈資政大夫。體道而盤。劬學自勵。閭黨受其甄誨。士倫憚其嚴修。卜築初就。四楹列同產之居。擔石無儲。千金償故人之責。裴楷別宅。以讓兄。朱儁貨繒。以解友。篤行備於門內。義聲達於邊隅。遐紀未臻。翼謀斯峻。公應靈雷。泉降和太極。表精暉之朗。凝器範之穹。先是公仲兄。江南河道總督。茂園公之生也。

母王夫人夢雙鶴翔舞。其一先下。次年誕公。復夢前鶴馴集。旁有緇流告曰。此君家之瑞也。魏肇飛雀之詳。興宗已兆。徐陵集鳳之感。秀異所鍾。毀齒之年。卽罹孤瘁。沖弱而痛貫黃墟。敬養而潔徵朱萼。一言一行。敦穆於閨庭。靡愆靡悔。肅邕於矩步。借茂園公潛心研求。銳意講誦。約繩之際。七業俱興。斫屨之餘。十經並授。嘿吟終旦。而慈母不聞。屬筆逾旬。而里師驚咋。惡臥則含冰喫面。忍寒則徹火移牀。於是義府辭鋒。標於百仞。言泉文律。該於九流。王僧謙之圖籍。共慰殷憂。童漢文之高名。先膺辟召。公年二十一。舉於鄉。二十二。成進士。歸班。銓授河南嵩縣知縣。緇衣懷玉。純錦製帽。人惜士元之才。民訝子奇之少。公厲冬冰之潔。沛春露之滋。不僻其鄉。不陋其俗。提耳申訓。擢顏勤名。暴虎化而爲狸。陽鱗退而辭餌。嚴刑凜於閭室。煦愛比於所生。笠緇僅存。見褚珍之節。釜窺不設。知何紹之廉。嵩土燒墻。而伊水環複。茨防旣廢。陂瀆就湮。旱浸不時。黎元重困。公乃疏地絡之崇庫。遏水門之衝要。烏鹵可植。不損魚捕之饒。漑溢日增。無俟龍骨之見。凡通故渠十有一道。鑿新渠二十有五。而歲於是乎始稔。又以壤不宜稻。耕者鮮穫。公乃辨稠種之性。橋墳墮之功。稽五物於周官。疏六宜於鴻烈。使農專務黍麥。繼以麻藍。而財於是乎始阜。蠶織未繁。民艱於服。公乃督之棧櫬。導以杼機。師襲遂口種之規。同元淑代春之效。使民植桑柘萬株。間以木棉之種。而用於是乎始裕。嵩邑界接宛朐。舊貢百合。吏課於野。民擾於閭。公乃採閒田。假丁力。上不闕其所共。下不責其所乏。創爲百合園亭四十畝。而患於是乎始消。生業有制。逸游是虞。公乃判鄉井。立橫舍。賓禮俊雅。開悟蒙穉。鄉飲揖讓。諷誦有程。凡建社學三十四所。而教於是乎始洽。然後黛耜朝舉。丹軸宵

鳴黃髮含哺。青衿釋奠。春日起條桑之詠。秋田賡刈藍之章。阡陌之上。芬若椒蘭。庭戶之間。甘於芝醴。空衢懸寶。鄭宏之政初成。足下生鼈。岑君之民何樂。漁陽千頃。未足比其仁。潁川四長。無以求其匹。范甯交州之石。新樂成行。許楊鴻卻之陂。澄波若練。鏘鏘乎。款款乎。古之循惠。不是過也。偉績已彰。屢書上考。民既奔走。顛留公亦請竟其事。在嵩九年。治乃大備。高宗純皇帝聞而嘉之。下詔褒美。敍勳進秩。一等之加。祭彤見賞於漢祖。百城之表。樂藹荷寵於梁君。公膺斯祐。當世榮之。無何。丁王太夫人艱。過毀忘譏。死孝貽慮。翠柏之枝驟改。白兔之足頻游。服除。銓授甘肅鎮原縣知縣。姑臧之市。未潤脂膏。黽池之碑。獨名祥異。歷遷甯夏。平番。皋蘭三縣。所居民富。所去見思。邑中黃犢。望畫幡而輒留。道上青泥。偕珍藥而俱至。吳郡聽統如之鼓。會稽有待選之錢。未幾。擢肅州知州。飭躬則惟飲桑柘。勤務則常含瓦石。摘獄則嗤鉤距之煩。徵賦則削單虛之籍。肅州古稱酒泉。地鄰戈壁。苦泛濫之災。乏薪樵之用。惟公精思必達。心計無垠。度其荒原。但課十圍之柳。因其舊瀘。以決萬仞之泉。鷓鳥未鳴。先資播種。鴉音已徙。更布醲和。碩士盈庭。餘糧棲畝。春入玉關之塞。風移雪巔之陽。回羯肆暴。殲伐逾時。遺衆數千。負嶠乞降。窮谷幽險。狡情難測。公請以單騎深入。遂造其壘。震以名德。申以威信。渠帥涕泣而自係。校聯歌舞而凱還。衆奮直前。奇功乃奏。此則張綱廣陵之勇。趙烹簡陽之志也。既又擢任江西廣信府知府。其始至也。如祥鸞之振枯。其漸漬也。如神河之潤遠。日南雙雁。棲於垂箔之前。淮陽二鹿。隨於輕輪之側。溺女之俗。江右爲盛。公聞而懲之。卽爲設嚴禁。宣明教。延誘髦耄。調養貧弱。未及朞月。釐然更悔。女囚之壑。忘曠曠之陰。珠娘之稱。保呱呱。

之愛。以賈父之所生。借鄭公而爲字。慈育之化。其有涯乎。方欲銷鑊石於累旬。變枳棘於中野。銀艾有十要之慶。金螭加三最之榮。景命不融。薨期倏及。以乾隆四十九年某月終於官舍。年五十有六。嗚呼。愷悌在躬。利澤及物。回斗極之命者。億祿難窮。留棠陰之頌者。千齡無歇。廬江白馬。尸祝起於生前。荆郢素冠。哀咽沸於歸路。徒使冥冥日月。呼九關以無從。切切絃歌。痛百身之莫贖。而公遂以魂招而不復也。公風神清邃。雅韻淹流。參東籜之貞。等南金之照。杜宏治之盛德標鮮。王文度之志力彊正。學通綈裘。而不守章句之專。文聘飛豪。而不以浮藻炫衆。虛懷以納善。博施以逮下。祿入則壽其九族。宦久而家無一椽。公嘗游山陽。愛其風土。買田花洞。未遂生平。歸旆芒山。竟占佳域。營陽舊產。未開千橘之園。河內新阡。詎擇萬桑之利。以嘉慶三年葬於濟源縣劉楊村之麓。禮也。公有子六人。長曰儀鈞。舉人。內閣中書。次曰綸鈞。進士。通政司參議。出嗣於茂園公。三曰文鐸。舉人。候選教諭。四曰綜鈺。兩淮鹽庫大使。候選運同。五曰紹鏞。進士。禮部侍郎。六曰維錦。舉人。山東信陽場鹽大使。皆以光耀珪璋。聲華軒冕。承慶雲之徵烈。著英風以象賢。社照神光。應氏之宗方顯。門多畫戟。馮揚之緒尤昌。迨公歿後十餘年。通政始官吏曹。恭逢慶典。地贈公爲朝議大夫。吏部考功司郎中。又後十年。侍郎開府皖中。復遇覃恩。晉贈公爲振威將軍。兵部侍郎。安徽巡撫。兼提督銜。淑配同郡孫氏。繼配王氏。皆地贈恭人。晉贈一品夫人。繼配江蘇顧氏。地封太恭人。晉封一品太夫人。煒矣哉。赫然寵榮。賁於後嗣。然後知寢邱邁種之長。潼亭清德之永也。又其後五年。運同侍郎。俱以遭顧太夫人憂。解職歸葬。載瞻松檟。益愴先型。循覽岡原。莫追遺範。懼循猷之或佚。思盛

美之宜彰。爰是擧其貞珉。列諸神隧。不揆空薄。命譏菲詞。履錢弱年侍宦。曾歷金城。壯歲驅車。遂登嵩嶽。見陸公配食之社。酌酒未乾。過張君爲政之邦。歌音相續。每欲抒揚。讓行讚述。清芬故敢忘其名齒之卑。效其文詞之踏。託之元石。以識不刊。樊惠渠之頌。勒景鐘而無慚。陳太邱之碑。編史籍而不改。乃作銘曰。王屋岌岌。沈流泱泱。我公幽城。峙於其陽。惟公之生。資氣清剛。思心精敏。綜物茂良。克岐克嶷。爰孝爰友。揚聲紫微。出綰青綬。害馬除菑。飲羊洗垢。灑沈旣安。羸瘠旣阜。析其湍流。沃於甘壤。千耦同歡。萬鍾斯享。男執晨經。女操夜紡。攝齋升堂。乃誘乃獎。天地之利。公式啓之。父母之慈。公式畀之。公之所屆。春臺熙熙。公之所違。饗祀丕丕。百里小宰。仰紆帝眷。璽書寵賚。循勞彪煥。洊歷雄州。旋膺方面。節猶日峻。政同前善。榦量未究。台輔未崇。寒氛忽至。仁賢道窮。珠林委露。玉樹摧風。湘泉幽咽。孰訴蒼穹。蓮嗇厥身。祐蓄爾胄。符策九百。金庭所授。八龍五鳳。英英競茂。慶靈下賁。瑰琦克構。實惟季嗣。爲國重臣。內典三禮。外撫四垠。追奉貴秩。徽卓顯尊。魂爽攸荷。懷此秘芬。灑淚之原。下馬之壠。鶴蓋松欹。龜趺花擁。陵谷罔賀。桓表俱聳。眎此先德。百祿是總。

黃氏息圃記

少陽之域。句章是雄。軫假滄湄。區絡甬越。隕則鱗渚。鈔潯山。則鱗堂鳳室。積幽競秀。蘊靈彙和。震歐治之烈。而慕赤堇之英。誦士龍之牋。而豔鄒士之盛。是以俊詰迭軌。名勝煥聞。依岫滌心。築雲增逸。斯實東南之殷阜。棲託之樂郊也。東井先生。四明卓蹤。百代鼎閥。根道核藝。飾經莅政。初宰義安。有羸糧之繫。擢佐

南甯重題與之名。悃悃旣彰。精良益著。兼總羣曹。行守數郡。伐枳棘而不驚。乘單舫而問俗。方將騁驥。足舒幹翮。而先生遽投板請休。抽簪高蹈。未始足晉平之山資。乞宣城之糧藥。遂以歸泛茗溪。載瞻衡宇。清規恬尚。世所希觀。雖韋孟之退征。敬宏之粹範。無以過也。舊居西隣。有故元袁清容學士之宅。陞在焉。袁氏自宋迄元。軒冕相襲。通德之里。庭榭修美。學士又能賓師碩彥。好樂人倫。輜輶溢門。帷館成列。吳會一時。通儒茂士。如王厚齋。舒閔風諸先生。皆與有撫塵之契。而胡梅圃先生主之最久。所注通鑑。實成於此。今則瓴甌俱移。松竹盡廢。惟梅圃貯藁石室。頽然獨存。葛廬博望。苔礎全荒。般濟精龜。流泉自繞。過湘州之廨。但撫石牀。登龍望之原。猶探書窟。蓋其人已往。固閱五百有餘歲矣。先生構基植椽。結椽因巖。奇壘之立。巒岒爭豪。椅櫨之華。糾紛異勢。其有間出叢卉。東連故桷者。凡三薨。命之曰傳經館。以貯圖史。館西浚池數畝。芰荷納露。夫容沁霞。環池樹梅二十本。虬榦交擎。瓊蕊發郁。當夫初春。氤如玉帛。池西建樓五楹。顏曰今是。則取陶徵士之旨矣。池南疊石爲小山。築亭其巔。篁翠入櫺。松颺拂座。迤右而下。復得三楹。是爲歸泊舫。賓侶之所讌游也。將離白朮之藪。枿欄檉柏之蔚。蕭蕭十尋。猗靡千芟。昔作手滋。皆已蒙密。周隈崇篠。旁通曲湖。蔽虧城闔。掩靄人外。名以息圃。亦符退士之義也。先生修齡鬯和。悅豫婉澤。負手平麓。諷詩內階。寓遠意於春禽。蓄深情於芳茝。逸友相過。觴鬪徐行。從容延賞。已逾十載。夫脫祿仕之羈。返躬耕之初服。其爲怡曠。固超物表。况乎席神皋。鏡靈壑。雜花啓幌。微雲集裾。筵清虛之心。養松喬之祐。咨故實於軼聞。企昔賢之遐躅。可以攬挹風標。輝映先後者哉。宋玉故宅。容蘭成之誅茅。楊憑舊里。待樂

天而疏沼。虞玩之之散髮。實近海隅。賀季真之羽裳。爰歸剡曲。雅迹所寄。有足神往者焉。履錢以通家年少。爲舊治僑民。樂廣之立名較晚。裴瑜之捧穀無從。嗣與先生季子支山孝廉同客山陽。屬爲此記。式懷景行。不敢固辭。他日倘能繫擢鮎亭之下。撰杖鑑湖之側。呈何君瑞室之頌。題沈侯齋壁之章。當以茲文爲贊焉。先生其亦許之乎。

答陳伯游書

孤子方履錢。頓首伯游先生足下。夫求履憲者貴乎因迹。聆曲度者冀其同聲。而今時綴學之流。抱藝蓬室之下。獨噓寡和。顧影鮮儔。咏北風以增悽。思南金而抗首。豈不以地密者情殊。誼親者軫阻。營道有同異。趨術有後先哉。孤子蹇資易竭。鄙概難宏。幸生文義之鄉。得企英賢之軌。入門見賞。曾荷宗慈。對案忘餐。非無尹敏。加以孟陽侍宦。逾劍閣之千尋。子長好游。浮沅湘之九曲。凡玉振江表。龍躍雲津。縞帶可貽。清襟是託。過蒲亭而師季智。至陳國則親仲弓。屢聞啓誨之言。恆抱合離之感。昔在皖濱。側聞足下。貞亮爲行。清麗善思。吞文石而攄奇。夢繡囊而溢彩。王充之論德盛文明。班固之徒名香文美。惟懷虛眷。未展慊忱。嗣得邠生來問。言足下愛玩疵篇。願爲良介。及與哲弟言晤。又知足下盱衡小善。時發寤思。爲北海之所知。能無驚喜。得休文而嘆咏。已屬改觀。方欲投刺寫心。執弦代贊。而孤子毀結三塗。災窮六極。蜴虺含毒。難求宏覆之人。草木有心。終無可植之土。魂爽崩裂。生慮俱空。文實交頽。強顏何自。是以閉藏憊息。墮廢神交。終歲蹉跎。寸疏遲闊。詎意足下勤恤舊誼。惠賁新詞。博喻篇章。比子桓之典論。獎飾譎陋。洵元

規之過言。至其天機茂闡。神韻遐超。采不掩情。質能立範。積玉元圃。無非夜光。伐材鄧林。皆成奇木。自足軼永明之躅。嗣正始之音。若孤子者。墜崖顛愚。面墻矇惑。偶懷鉛槧。徒悅帆罄。孔璋武庫之雄。已消神氣。子雲雕蟲之悔。但賦牢愁。豈能揚挖流風。周咨大雅。然竊窺文奧。追溯前塵。每謂奇偶相生。大圓所以啓運。元黃成采。睿哲所以含章。故繼經有作。必開屈宋之宗。逮漢以還。遂建曹劉之幟。此實體變之繇。抑乃化機之理。雖云六代。同尙華腴。究其百年。屢經翦汰。元風久扇。始革乎仲文。麗格方逾。獨摧於子野。所謂若無新變。不能代雄。推此一言。律夫千古。苟有作者。罔不同情。夫意以文宣。文以氣植。精采煥越。非疋羸之是求。神思淵通。豈枯槁之能化。運藏舟於大力。百儻何傷。滯棘軸於方穿。單辭爲梗。是知濡毫雖終。如草靡秋。染翰長存。披沙見寶。然則沈詩任筆。豈皆玉山之頽。北庾南徐。孰非金鼓之振。退之之作。誠可起衰。隋紀以前。猶當其盛。足下片言乍剖。已探象罔之懷。四科若分。必入相如之室。孤子叩鐘響寂。能勿頽顏。躡屩途長。尤勤遠慕。佐公之賦。託明鏡於末光。孝穆之書。希雙環之俱見。春榮馳檄。秋水載賡。定厚契於斯文。貢深心於此日。君魚可仰。從受道而無辭。宗測難逢。願畫形而相對。自悲窮結。負辱年光。惟軫芳猷。懋宣時譽。因之感系。書不盡懷。

萬善花室文稿卷五

鄧完白先生墓表

先生字石如。號完白。安徽懷甯人也。初名某。後避仁宗皇帝御名。故遂以字行。先生秉九鴻之清則。鍾千禩之逸翥。德邃含樸。思敏通微。元猷洞深。朗詣峻拔。非蓬麻之生。無鏤雕之助。少罹孤悴。未專誦習。採摛入市。編荆爲床。顧歡之家。世旣寒。高允之擔笈。不怠。偶耽摹印。精別蟲書。蠅扁奇麗。雲霞迴互。遂乃考遺範於八體。稽變象於六文。思垂露之棲英。覽抉石之恢異。以爲蝌籀俱失。小篆乃尊。繁美旣衰。佐隸是尙。盡取當世所存古刻。上自鼎卣文識。下至陳倉石鼓。下至兩漢瓦額。六代諸碑。挹其神倪。研厥精魄。貫幽達顯。得意忘形。蓋嘗濡墨盈斗。束管如簞。申旦不寐。中昃忘餐。行履逆旅。手畫凝塵。抱膝賓廬。指穿側衽。懸帳以索其深。倚欄以窺其奧。收綜繹之要。明向背之宜。辨星緯之運行。察川畛之交錯。周人紀之和。選綴蠕化之動息。煙縕泱鬱。幼眇連卷。有觸斯應。無境不臻。而又有邁往不屑之韻。貞確難拔之情。進不徇俗。以買名。退不飾奇。以驚衆。豈志於是。四十餘年。然後其學粹然大成。竊考先生之書。實始於篆。由篆出隸。由隸出眞。由眞出行。故其意則同條共貫。其美則自葉流根。情質宣融。修短起伏。力不外傳。險必內含。肅乎若瑚連之陳。鏗乎若韶夏之和。奮乎若矛鋌之利。藹乎若麟鳳之儀。控之不可前。挽之不可後。因方而成規。卽圓而應矩。累千百之文。而氣無不洽。分鋒穎之細。而神無不全。至矣哉。洵盤孟之祕蘊。翰牘之

聖功其發於自然。擴於無際者。固不可得而言也。蓋自淳醜相判。損益日滋。史書亂於西京。俗體違於東晉。孟皇伯玉。已易前模。幼安元常。各標新致。典午之後。篆隸俱摧。雖如少溫之古。欽倚物。惟則之雁足印。沙客氣猶存。古韻漸失。自宋以來。杳無嗣響。學者不乏。操筆卽非。觚離躡駁。囚軋龍蒙。媵媵似優。鈍滯如桶。天乃愍絕學之永墜。惜先聖之茂典。蓄奇淳澤。久之又久而後發之於斯賢也。嗚呼。素書八角。得嵩山石室之傳。黃庭一經。感天台丈人之問。而鴻都無闐咽之車。雲臺缺懸絙之榜。湘東之館。輕善助之千言。上谷之峯。落次仲之二翻。雖有博達君子。揚扈休嘉。疑爲古人。詡其命世。其如曹昧已久。好尙實殊。見真龍而輒驚。守璞鼠而不悔。但師趙壹之非。豈識陳遵之妙。迨先生旣亡十餘年。而其道漸昌。至於寸楮片文。珍於和璧。遺簡零墨。罕如景星。覓於蠶紙之中。求之斐几之上。而曩之所貽者。固百不一二存焉。將與琅邪之碣。陳留之作。等其瓊寶矣。使後之願學者。慕而不覩。闇而未從。豈不惜哉。豈不惜哉。先生卒於嘉慶十年。年六十有七。有子曰尙璽。能世其學。余與先生雖年世相接。而齒晚道遐。未嘗奉光。塵侍屏席。竊有服膺之志。私艾之誠。削板則往紀難追。觀碑則十旬空返。乃與四方同志。綴述絕藝。昭表至行列之阡右。以闡光烈。其銘曰。

飛龍創製。天廩虬驚。百代迭變。弱媚充盈。蒼昊育德。哲士挺生。寶文異藻。瑞我聖清。於休純懿。靡師靡友。習與古會。獨啓闕牖。千五百載。荒途豁剖。點毫染素。光燭台斗。如珠集珮。如穀成醕。抽絲散水。顧盼自如。一波一偃。或疾或徐。左揖右讓。珮玉瓊琚。悒悒曖曖。父慈子孝。款款雍雍。君仁臣道。黻珽綬紳。典謨訓誥。

萬象以明。百采是耀。春卉秋雲。麗絕所思。枯藤幽澗。鳴鳥不知。壯士揮戈。天日慘悽。愁人怨婦。密霰輕霽。本末相順。終始相應。離之則傷。拘之則病。唐弓九合。不柔不勁。欬器半虛。惟中惟正。彩鳳在原。莫攬其輝。片羽僅存。衆目駸駸。奇跡千古。燦逾朝暉。吁嗟先生。宿草已萎。韋君之墓。豈藏筆勢。玉潤金相。究在當世。孰能有心。勿翦勿棄。後生趨効。典則已備。二三士友。愴懷宵冥。潺湲江水。繳固幽局。瑤臺碧月。丹檢元庭。曠念昔徽。眎此景銘。

鄧氏隸書贊并序

完白先生四體書。俱足絕世。而分隸尤美。寓奇於平。固巧於樸。因文以起意。信筆以賦形。左右不能易其位。初終不可改其步。體方而神圓。毫剛而墨柔。枯潤相生。精微莫測。有十盪十決之雄。兼一觴一詠之樂。陳之黼展。則貴若球刀。棲之巖壑。則馨踰蘭茝。先生自云。吾篆不追陽冰。而隸不減梁鵠。夫遜德少溫。乃其擡仰。比蹤孟皇。庶爲有徵。然梁書今所存者。惟受禪。上尊號。孔羨三碑。凝重有餘。而漢人雋逸之神。已不可見。若先生則孕篆之理。萃漢之華。萬狀千名。金聲玉振。以今擬古。殆猶過之。余愛尙獨深。師承有在。悲風微綃之詠。斯人已亡。落霞浮浦之文。明穹所祕。逝求妙墨。縣歷歲時。見有藏者。或乞覽觀。或資摹玩。故真翰之獲。雖希。經目之珍。不一。每以素縑鉤勒。留其模範。而吾友李君申者。實有同嗜。所蓄尤多。搜探偶得。輒相臨贈。今者客游場遠。良執在遙。但感索居。益荒素業。恐夫長康廚畫。易作飛仙。豐城劍氣。不光牛斗。鸞驚鷹跼。賞徒溢於寸心。槩板練裙。蹟尙散於寰表。暇時追憶諸書。分爲之贊。並記其字數。及所藏

之處。肩吾書品。欲永其傳。中郎隸勢。佇思其奧。庶幾求遺珠者。尙知赤水之津。窺積玉者。不虛元圃之望。葢山扇影。猶在人間。抱犢筆經。未歸壤室。斲輪祕蘊。雖非言象所宣。懸鵠中衢。先爲嚆矢之集。就正吾友。或無譙焉。

周易謙卦辭百幅。經文二百九字。附傳文二十九字。今藏陽湖左氏。

萬豪爭赴。單穎皆藏。貌和神肅。體抑氣揚。錯之鐘瑄。佩以瑤璫。座右旣列。君子是臧。

小字謙卦辭二幅。二百九字。今藏懷甯某氏。

竹簡久散。疑有慙遺。神理適謹。風格靈琦。緜叢之內。俯仰爲儀。跬步弗失。進於軒墀。

詩豳風七月章四幅。三百八十三字。今藏懷甯李氏。

行疏藻密。骨舒緒繁。柔桑猗那。春日始宣。豳人和樂。載笑載言。書亦象之。如登周原。

堯箴一幅。十七字。今藏陽湖李氏。

壘塊正骨。盤礴大氣。霆激電射。驚魘走魅。哀樂至感。百端交萃。驅遣神筆。風雨來會。

節書荀子勸學篇四幅。一百四十字。今藏陽湖李氏。

洪海巨浪。蛟螭晝舞。龍庭歛開。斂髻戢距。直洞九關。平迴萬弩。見此偉力。怛焉氣沮。

漢章帝詔一冊。八十五字。今藏懷甯某氏。

昆吾劔玉。發刃流英。廉方勁折。山立時行。筆情不蓄。牋力能迎。心手旣暢。完如金城。

仲長公理樂志論二幅二百五字今藏懷甯某氏

棲奇麗古。嵯峨連蹇。無意求妍。有機可轉。斜簪散帶。仰睇俛眄。神仙中人。土苴軒冕。

節書魏文帝典論一册六十一字今藏懷甯某氏

金盞秋澄。肉芝朝茂。神用內充。腴色外富。畫如綬垂。點若山覆。黃初三絕。千載重觀。

節書曹子建洛神賦一册百八十六字今藏懷甯某氏

偏裾輾袖。作態低昂。蜂腰花重。蛾繭露黃。顛倒偃側。皆有容光。引而申之。翩然欲翔。

節書梁劉焯傳一幅三十三字今藏大興方氏

開美之度。黃流在中。軒軒霞舉。人倫所宗。春林初月。秋澗冷風。角巾徐步。時聞歸鴻。

節書水經注泮水章十二幅一百八十六字今藏懷甯天花菴

嶰谷嶮嶮。碧霧蒼鬱。我坐其下。心如槁木。羣真忽至。手授寶籙。雲華九會。披染靈壑。

節書水經注溫水章六幅三百七十五字今藏懷甯楊氏

芒角特起。偃波迴映。絕代姿神。目眩心泳。青琴出匣。紅蕖臨鏡。娟娟新月。片雲俱淨。

又節書水經注一册九十二字今藏陽湖李氏

元紉黼裳。雍容中節。祛練神明。融澡冰雪。道勝則肥。性高斯潔。潤珠在握。芳腴自擷。

廬山記六幅百六十八字今藏興縣康氏

上如紐藤。下若委薤。去墨皆孚。歸毫必鍛。龍舉之蹤。分此巨派。約之扱之。勿致靈怪。

惠遠法師傳八幅。失首幅。存者百一字。今藏懷甯地藏禪林。

破穎疾入。四維已滿。斜鋒微帶。百情相款。蔡君飛白。遺跡尤罕。素榦冰解。妙理嗣續。

唐韋續書評十幅。百八十一字。今藏陽湖李氏。

取徑最直。指迷易遵。其容磊落。其骨嶙峋。以柯伐柯。賓友古人。花雨滿坐。不著爾身。

唐李文饒文箴一幅。五十六字。今藏涇縣包氏。

丹蘂被澤。綠蘂盈階。清氣駘蕩。足散人懷。由彼純詣。剛柔始諧。魯相二石。比肩同儕。

宋周子太極圖說一册。二百六十三字。今藏懷甯某氏。

農皇鞭藥。成陽之山。鳳腦龍脯。得之駐顏。不如換骨。有此神丹。世無真識。不可妄搏。

宋程子四箴六幅。百七十七字。今藏興縣康氏。

均如玉律。重猶銑枳。檢度有常。運行相接。茗柯實理。滋漉沾洽。華嶽燼碑。秘境能涉。

宋敖器之詩評十幅。四百七十五字。今藏陽湖李氏。

斷山巖巖。懸溜百丈。蜿蜒繆戾。嶽奇矯抗。出幽入顯。背馳面向。煙飛竹舞。天地昭曠。

明人擬古善哉行六幅。百七十二字。今藏大興方氏。

泥金百楮。鏤珉千楮。奇豔欲奪。古香時吐。庇其宇下。幾忘寒暑。何以易之。名都十五。

明人駢語一幅二十八字今藏懷甯天花菴

螺髻盈斛。寸管盡漑。沈入八幽。猛穿七鎧。蘿壁日午。重陰掩曖。飛鳥翕翼。蛟螭拄喙。

酒經一册三百十二字今藏懷甯某氏

方寸含納。杼軸胚渾。逆鋒平距。損益無痕。容止韶秀。蘭和玉溫。元鶴二八。集於廊門。

自書律詩二章一幅百十二字今藏甯臨江寺

瞿唐急峽。舟人爭渡。篙沒石罅。將拔復注。忽焉疾下。千里如鶩。因難爲奇。奪險成趣。

康蘭皋侍郎行年圖序

蓋開介邱之元雲。必興曜乎層泉。合契乎巖石。而後濩澤九宇者。其蘊邃也。丹穴之神鳥。必濯羽於弱水。翔集於廣都。而後振音六呂者。其德備也。是以通偉之才。不限於器。卓朗之識。不役於時。而豐約之途。莫摧履道之坦。俯仰之迹。易縈達士之懷。豈不以物與候遷。功隨運茂乎。魯邈之量。斯可闕矣。蘭皋先生。醇資名世。崇軌殊倫。穎解天弢。機同河注。典墳勦業。園集重常。至行潛通。庭滋舜草。休源抗問。準則後生。文季立朝。激昂讜議。內轄樞機之密。出膺干鍼之隆。旣已德惠翔洽。聲華融布。鏤元珪之盛。錫金鼓之榮。安石之道濟蒼生。卓茂之名冠天下。奮庸日粹。駿烈載申。乃復山公讌賞。羊傅登臨。置酒言懷。援琴道故。湖奇蹤於寰海。追良遇於昔期。延長康之筆端。繪鄭公之列幃。共爲幘二十有三。命之曰行年圖。凡家國盛事。倫黨逸情。無不賅焉。觀其綺歲陳經。黃中表德。吳季英之侍宦。竹簡還青。傅別成之逢憂。苴裳染碧。鶴

首則瞿塘水壯。鹿車則彭城露寒。元始卜筮。遂守洛陽之命。公超成市。竟依梁邑之旁。於是樹蔭致養。受丹字之書。附萼同華。比烏衣之彥。君文傳舞陰之學。僧虔登太保之堂。倚杵而友公沙。含菽而親周黨。冬原射獵。弓若鷓鳴。春澗課耕。笠歆鸞社。探紫乳於幽壑。挹丹光於遠林。內觀外游。天養神悅。此則仲長樂志。呼吸精和。江總修心。憑棲水月。斯時之境。永言勿諼矣。旣而鱗角先覲。鴻儀獨竊。括羽驚其奇文。垂虹映其異彩。分鷓鳩之職。自握芬蘭。登鳳皇之池。不言溫樹。靈臺侍直。藥崧枕社之勤。詔獄廉寃。寒朗振冠之對。扈玉蚪於東圃。爭先七萃之雄。從天駟於南陽。方獻四巡之頌。若夫上交有抗志之節。退處無矯俗之行。平當論議。不廢其通經。朱邑公誠。猶敦乎故舊。金爐薰罷。郎署初歸。蠟屐成時。花間遲步。襄成袖上。偶題芍藥之章。贊公房中。如在水精之域。想見繡衣之丰度。不無玉塵之清譚。則雅量之宏。殆有所寄者乎。然而丹慊上達。則一歲頻遷。素望遐孚。則百城皆肅。藩條旣總。方任初專。賦饘粥於都亭。置樓犁於水陌。擁旄皖國。寬銜轡而人和。移鎮廣州。酌貪泉而自勵。陶士行武昌之柳。大已十圍。王仲通芍水之碑。誦傳萬口。時則離瑜煜燭。愛日冲瀾。霞舞青樽。花迎綠髻。輕軒旣駕。脫帽而扶。奉八座之起居。備百珍之燕喜。馮勤有母。存問廬乎宸衷。崔寔臨民。惠愛本於慈訓。縑紵盡列。尙嚴庭誥之篇。旌節所臨。或賦停雲之什。南樓夕月。坐對廬峯。東閣官梅。移栽庾嶺。皆可爲人倫之藻鑑。藝苑之笙簧也。蓋先生抱瑰璋通博之器。多沈鬱澹雅之思。臨事不滯其流。處物必安其性。門內兼曾閔之德。爲政繼召杜之風。猶且曠若有疑。泊然自抑。愛寸陰而黽勉。感佳日而留連。韜繩夕解。每掩卷以興嗟。弦韋晨懸。亦撫躬而遠念。卽古人惴

款之誼。詰士往復之情。言所不宣。人安能識。故斯圖也。每於君上之篤眷。庭闈之宴怡。三致意焉。至於東山之操。系結生平。南浦之離。增思契闊。寫幼輿於巖壑。作少文之臥游。是有會心。猶其末也。而或謂陳龐藻。述顯榮。範此清標。留爲家乘。雖斯圖之所重。抑豈先生之意哉。錢才慙狂狷。質近輕桀。荆和無三獻之誠。鄭璞辱一言之重。命觀鉅冊。授簡暇時。自恨小文。莫抒壯概。竊於燕談之久。微窺涯涘之深。以爲叔則之形。三毫易益。季野之氣。四序難宣。覽斯圖者。其亦超悟於物表焉。庶有得也。

刑部主事康君妻王宜人墓表

宜人姓王氏。陝西神木人。甘肅甯夏府知府壹齋先生之季女。署禮部侍郎康蘭皋先生之子婦。而刑部主事吾友竹吾之淑配也。臨沂名德。曾鍾女師。京陵架度。遂成家範。宜人稟靈和之源。肇瑛瑤之質。懸悅賁章。弱笄耀采。婉孌象於圖史。敬愛發於天情。爲嚴庭之所珍。擇俊才而後字。皇駁之乘。來自秦川。鞶帶之施。言歸京邑。時侍郎公。方以九列之羽儀。備三番之更直。太常邸第。但存奉母之興。東門候舍。肅若嚴君之典。宜人則出戶而調琬珮之音。上堂而薦敦牟之饌。侍威姑以佐餽。得大母之歡心。步趨勿越。共察其誠。影響相依。焉能不賞。是以三日舉樂。卽賀祥女之入門。七族承和。咸知禮宗之在闈。雍穆之節。始見之矣。少君資送。或有組璣。南郡垂憐。雜陳筐篚。宜人獻而後藏。緘而勿御。重闈稱壽。乃貢衿纓。宛若初逢。分貽釵鈿。听夕盥饋。未煩假手之人。祇敬杖屨。絕無惰容之見。受尊章之慰勞。則側衽以辭。覩婢從之過差。則閉帷自咎。皆其惠敏之行。迴越常倫者也。至若鏡合鸞光。飛同鷓翼。蘭開室香。寫玉臺之韻。桃殷春

日。酬錦幔之書。孝睦共勵其修。靜好不弛其敬。蓋外有敦懃之固。內有勸勉之貞焉。竹吾體羸。就誦少慕榮名。宜人嘗誡之曰。子秉清逸之姿。而習進趨之行。將無實其實。以枯其心乎。若能庇身親舍。逍遙經史。飫藜藿之餐。養松喬之福。則蒙山之陽。織畚而處。東海之野。曳柴而返。吾能甘之。不足靳也。孺仲賢妻之言。德曜相從之樂。邈世良匹。豈易得哉。恆晷不居。晞露將謝。鳩鵲之夢先兆。長離之翻遽分。以嘉慶十九年八月。遭疾卒於京師。年二十有一。子二。曾齡。丙齡。丙齡早殤。女一字張氏。竹吾神摧寶瑟。欲與俱僵。秋入羅紈。怒焉如擣。失中閨之知己。誅德無窮。聞闔寢之悲思。餘芬未化。乃至新縑在手。猶覓殘絲。嬌女入懷。忽循遺挂。頽息逾於九禩。嗚咽起於重宵。或以爲奉倩之過情。而不知柔嘉之則有以永之也。茲以道光二年十月。葬宜人於濟源縣某鄉之某原。德宮旣遠。草生埋玉之墟。深窆初封。石待生金之字。履篋先人。與壹齋先生同官隴坂。交誼最深。而予與竹吾。又適有墳簾之契。總角後堂之拜。咏絮親聞。傷心釋服之詩。開牋欲泣。遂乃述珩璫之清徽。表松楸之靈域。荆臺掩隧。結冷霧於青駟。沈水迴波。映幽泉之彤管。列斯淳懿。庶昭不刊云爾。

與李申耆書

申耆先生足下。遑離耀蔭。將歷暄寒。企詠之深。軫勞靡釋。比因塗潦漸解。連奉九夏。手畢五通。珞華黎綠。疊彩層英。仲復咨嗟。快同促膝。藉承沖襟。怡樂理尙休和。勤志服知。規文凝道。發綈表之珍錄。乞祕閣之副藏。精覈校尋。略無餘刻。將以啓迪晚進。寫定禮堂。至心盛業。令人驚羨。昔邵子行年五十。而惇學彌固。

曹曾見天下名書。皆手自刊正。擬迹三古。有以踰之。吾兄軌量曠融。識慮醇妙。窮文盡義。無微不綜。摘秘
抒華。所謂皆絕。璣鏡照而益瑩。玉府潤而不涸。又能早投吏幘。遽遂初衣。江都去位。發藻儒林。元晏抽簪。
專務著述。實辭宗之華岱。爲黨類之龍鸞。履錢奉教君子。已逾十年。依遲有道。近於百里。旣獲撫塵之雅。
謬邀拂席之知。契德斯殷。吐言見賞。苟爽之崇元禮。自比過庭。杜真之友子超。敬同兄事。雖隳栝柱材。取
資衆善。而輸側心。臆實在所天。徒以質限輪椎。時牽物役。白羽之所染無恆。撮囊之爲積日寡。十寒一暴。
往詰垂嗟。三秋暫面。能無頽廢。今復羸膝遠旅。寥閱遐居。矐目苦思。疑曼漉而莫析。引喉長嘯。意怫鬱而
不伸。強涉篇章。自憎形影。卽欲寄晤言於夢轂。馳素抱於郵籤。所謂疢疾彌歲。而期以一九銷之。安可得
乎。此方膏沃澤通。竹柏茂美。北枕太行。南臨邛洛。接畛山陽。嵇阮之所泳游也。河內殷阜。古稱名都。仁智
傲深。豈獨山水。而停轄以來。景候未察。螟懸霖集。不卹兼旬。朝蓑暮裘。易滋寒效。榴實具繁。剖之則中蠹。
瓜蔓盈隴。抱之而空歸。望舒不曜。琴樽誰從。沕壤塞衢。杖策焉往。豈曩昔之固然。亦遭值之偶異耳。夫蘊
蓄丹水。不思江海之流。餐飮赤梁。遑慕秔稻之粒。此則安土之所以自珍。而非託迹者之能遣也。暑緯易
遷。才體並拙。凌雲振翼。久絕予心。乘堅策良。差無鄙願。猶望東臬數畝。南郭一廛。滌蘭有資。鮭菜可具。追
隨步履。翱翔林原。理伯子之徵絃。傳衛宏之漆簡。正陶陰之譌畫。諮靈寶之奧方。然後竭其偏智。纂爲小
言。冀附旄端。勿乖壇宇。非敢類傲。夙志然也。企溯末由。將成疾首。惠子知我。當爲慨然。金商布律。冰繭依
霜。元覽之暇。尤希珍衛。附呈近文數紙。以佐嗚嘯。倘能裁削。庶慰調餓。履錢頓首。

榕陰消暑圖贊并序

康子竹吾。侍宦南粵。趨庭輔政。既有暇辰。乃得啓精廬。展綈裘。究心師法。游藝良儕。探經旨之壺奧。悅風詩之蔚和。日南故多奇木。而榕尤菴藹。清齋之側。曲榦盤挈。碧蔭翳空。明颺納牖。延憩誦覽。鬱蒸自消。既逾二載。而境異事遷。欲以紀遠遊之勝。追譚讌之樂。乃繪其景物。傳之詠歌。此榕陰消暑圖之所由作也。夫投跡塵埃。隨候而殊。譬繩景之改暄。如條風之時麗。至若絳趺幽薄。磨錯方殷。舊騎春衫。文華獨茂。善長之游海岱。不乏憑衿。孝若之歷平原。猶能涉筆。齒愔愔而轉稚。日醺醺以方舒。斯時之歡。是有真契。求之遐抱。不能暫忘。況以竹吾之稟潤瓊璠。凝神璣鏡。勵白屋之操。重青箱之業。攬衣趨講。則景問綢繆。提琴命侶。則虛懷曠遠。情賞所寄。已軼羣流。標映之華。皆堪命世者哉。觀其荷檻花寒。桃茵冰泮。觴羈徐進。異果雜陳。撫手割之琳腴。誌睫間之海乘。披暉而眎。尤足令人神往矣。迺爲之贊曰。磊砢千尺。氣奪炎洲。瑤露淡瀉。珠煙翠浮。睠思之子。卓犖鮮儔。負手移陰。執簡攀樛。語鳥入戶。鮮荔擎甌。嘯咏未間。清言轉逾。涉境已改。敷毫欲留。英情天逸。永此清修。君歸湘浦。我夢丹邱。芳醕旣酌。聊以忘憂。明月初吐。飛霞夕流。相從巖壑。願言已酬。

贈李靜菴序代闕亭中丞作

夫稟氣淳穆。植生爲難。分形兆族。立名斯貴。而駿激之倫。竭顛踵而不悛。凝寂之士。葆神息而自珍。固其端尚不一。抑亦境會有殊也。若夫沐浴元化。淳蘊太和。履孝悌之性。苞文質之度。不惰勞以拘物。不孤蹇

以離類。醇粹而處。清虛是游。漆園氏所謂使之和豫。通而不失於兌。使日夜無卻。而與物爲春者。悠悠斯世。其庶幾一遇之乎。余於敦牂之歲。奉諱北歸。循王屋之陽。奠券堂之事。維時秋暮。風淒山寒。木落屏營。幽悒無與。晤言既而。流覽岡麓。耦蹠耒之民。顧瞻墟里。訪棲逸之侶。乃與李君靜菴。結佩於椒蓋之隈。款襟汎檻於之側。理懷恬約。器宇簡沖。蓄高情以直上。引物蹤而自遠。有成回恭己之雅。兼季次獨行之操。卽之而確乎其不痺也。泳之而肫乎其愈篤也。使余澹曠而若忘。怡順而有得心。旣與契。游日益親。自以爲裴徽之友。公明謝客之僭。敬宏不是過也。君夙秉英醇。早罹難厄。戴仲若之憂傷。長膺羸患。王思遠之荼苦。遂消仕心。卓犖之姿。驚其長老。絢麗之文。冠於鬢舍。嘗承慈教。出應鄉賦。涉河將返。秋濤乍興。洪波漾天。孤帆入壑。雖免文考之災。已犯陽候之怒。君乃喟然曰。名爲實賓。吾豈徇名以墮實乎。且吾門衰祚單。偏親待養。非拔萃之才。鮮諧俗之慮。而欲奉其不貲之身。習於罔測之地。何如退守東岡。息影南畝。勤絜膳羞。長養雛稚。植杖平石。坐而橫經。懸瓠瘞柯。掇以飲水。固可懌疏志。全靈真也。於是韜鱗掩藻。奔顯遺榮。隱不違親。貞不絕俗。丹朮滌於北澗。降跌馨於南陔。迄乎金護告萎。玉樹成立。而君亦已逾中歲矣。子將之問。入者屏其車騎。彥方之鄉。行者守其遺劍。卹獨振困。媿葉陽之仁。謹行齊風。師繆彤之義。指困沛於歉期。挾册誨於侗子。孝乎惟孝。施于有政。斯之謂乎。余自志學之初。博涉載籍。進趣之後。盍簪賢豪。嘗慕夫含納上德。味樂清塵。如漢之申屠蟠。晉之郭原平。沈思宏道。白首無悶。廉頑立懦。葺屋於式。上足以光耀泰階之邗治。次亦以裨輔絃歌之不逮。導育輿蒙。涵濡雅澤。善人國紀。所益良多。士之潛顯。各有

其宜。豈必佩紱綬以爲榮。建幢蓋而後尊哉。故余獲見君。而不禁渙然意消也。五十之年。君爲始至。方將越天壇。款析城。南浮江淮。北攬恆岱。以申其磊落瓌璋之志。以娛其留連宴賞之情。蒸嘗有所嗣。隴宅有所授。而探石髓。茹神芝。以永其生澤。其躬焉。有乞余言以爲君壽者。余方與君解天弢而登閔風之表。其復何以滋君松喬之祐也。

嵩山啓母廟碑

蓋聞玉臺儲祉。儷富媪以含囊。金燧宣桃。合常儀而懸燭。通維二氣。運幽奧之機緘。連極四星。佐鴻濛之鑄鑰。爰自淳清始判。挺埴初宏。方寓之內。咸歸鼓舞於丹宸。圓顛之民。共戴氤氳於絳闕。得一乘乾之主。恍若神明。握文協慶之妃。迴殊凡俗。是以地精出耀。旣仇驥首之皇。電繞流光。乃育兌頤之聖。蘿圖雲握。變搏土於承匡。華渚璇宮。孕純金於滎澤。寄長孺之舍。食赤烝而忘饑。升姚氏之墟。望青虹而有象。遠稽帝系。感生之理。宜徵參仰。坤輿奇闕之蹤。尤著。至於夏后氏之會紀也。胸墨懷璣。骨星映斗。受巨靈之綠字。獲溟海之碧圭。拯濡溺之魚民。宅於豐壤。反蕩襄之澤國。奠以平原。振威於顯。則萬辟臚誠。布令於幽。則百祇請命。童律狂章之侶。趨決湍流。奇肱窮髮之倫。伏膺記載。聲律身度。潛山表羊璧之虔。左矩右繩。淮峽建鳶。橦之盛。鎔紫金以爲鼎。克禦神姦。披黑玉以呈書。莫逢魍魎。歷縣安邑。千秋擅瓌璋之稱。瑞毓如戎。盡室列真。霧之位。則有羽淵旣入。猶祭黃熊。石紐曾游。遂依赤舄。帝女進五齊之醞。不廢仙經。嗣王隱三載之神。永昭德饗。凡茲異迹。並耀中區。至若太室名祠。中峯巍號。實離明之降祉。爲文命之中釐。徽

蠶蘊於初基。英爽流於素久。當其青泥乍印。丹粟方馳。胼爪胝脛。肥水見長人之日。瘵形剝慮。緝巖聞和女之嗟。恐嘉禮之後時。冀令儀之來淑。於是吉占五服。符叶九陽。白狐至而慶語成。素雁暉而休徵著。併乘台桑之野。我造彼昌。褰帷渝嶺之旁。隆家應祚。江淮昏禮。尙沿癸甲之期。河海程功。已促庚辰之令。八年春築。足未窺門。十月育賢。孩方在抱。惟后忘室家之念。呱泣無聞。惟神播懿哲之風。訓詞益摯。揖殊仁於氣母。道變九圍。衍靈派於昭回。光榮八遠。同心濟院。輔高密之功。獨教勤名。蔭鈞臺之化。靜處而晤幾元朗。稔永繫其天暉。達義而執履明勳。允襲承其弗祿。比之中山帝姬。徒貽歸詎之儲。湘水神妃。未協溫恭之嗣。宮庭嬉舞。竟爲讓國之賓。天下謳謠。獨戴吾君之子。雖穹況之攸屬。尤慈誨之聿宣。量德比蹤。此焉丕茂。所以楚臣哀怨。天問能詳。呂覽恢張。祕文可錄。世本之書。后繹。景耀全敷。連山之載。女攸。徽音遠絕。曹子建之贊美。劉夫人之頌思。莫不溯積慶於瑤臺。詠芳塵於璇室。昔者陽城陵側。羽儀衛鶴。蓋之陰。巴穴祠中。琮幣奉鸞。旂之綵。而輶轅之石。舊所馮依。嵩嶽之雲。時增掩靄。翩翾飛雉。闕銘之篆。猶存。宵宵空桑。鴻烈之言。無爽。考輿地而知顧氏之疏。誦山經而信景純之博。蓋穎芬連理。叢生降蹟之濱。銀榜瓊膏。是曰棲真之館。漢武之千乘方轂。就謁隆階。周王之八駿揚鬣。來尋宿草。眈明禋於列代。知樂願於茲邱。若嵩山者。固填星之鍾氣。乾寶之分支也。騷賦爲質。聳四鎮以開巖。峯嶸標形。立三臺而稱峻。石牀銅銚。餐朝景而入僊庭。甘露頽霞。臥秋颺而驂上馭。惟悅惟惚。繡衣夢太乙之君。或往或來。紫袖見浮邱之客。枕太行而瞰伊闕。招廣武而揖青城。北臨恆碣。猶若攢沙。南俯荆衡。財同覆篑。日躔流馥。金壺有未泐。

之篇。月陸凝馨。玉鏡乃長生之籍。吹笙童子。昨乘鸞歸。負局先生。偶呼鹿駕。遙昇閣道。遠睇層岡。多隱霧之羽人。琳宮寥廓。或御風之姹女。貝檻玲瓏。杖端九節。明嫺咽日之鄉。錦暈千行。玉婧搗絲之處。中天聖后。爲二室之主賓。西浦少姨。乃一家之眷屬。惟神陰陽沕穆。紫府晨開。福祿駢蕃。元都夕映。仰企徘徊之地。定邀盼嚮之誠。故敢鑿翠危巖。染朱崇構。公輸秉臬。般爾陳圭。蕙榜照洛澗之源。珠閣接緱峯之首。琉璃挂戶。青童至而愁攀。翡翠籠幃。素女窺而不入。天容如在。穆穆煌煌。月範疑生。洞洞屬屬。絳栴百尺。似聞鳳管之聲。綺柱十圍。忽現螺書之字。芝葉與椒漿並綠。竹花共蘭楮齊香。乃復遵世室之規。樹綏旌之制。山壘琰屏。龍勺雞彝。冠裳則袞鞅牟追。飾具則枻鞞瑤簋。明水奠於楹左。蒲醴酌於豆間。懸鞞振鐸。設五器以歌五聲。秉翳執環。進九韶而舞九伐。貴夫賢子。一朝之祀典。長垂壽母令妻。萬紀之尊儀。是飭豈止成陽黃屋。有菟蘆元礫之祥。沉激紫壇。奏薜荔汀洲之曲。西陵皇嬪。未足比此凝巖。南岳夫人。自然遜其詭麗。想見殊禎。頻沛冥契。潛通吹乙巳之蘭芬。迓紺妃於蓮井。列甲申之瓊石。邀王母於桃池。眞侶集而華雨飛。幽宴諧而祥氛起。斯則上求感致。託諸蘋藻之微。下鑒芬和。報以倉箱之祐。閩陽播氣。飛沈皆沐其深仁。甄曜垂熙。毫稚盡歸於燾庇。敬擇螭腸之石。用鑄鳳首之文。鉅鹿仲球。表清涼之壇墀。潁川朱寵。銘福記於山隅。粉合珠光。宛委之圖。開四壁。旗迎春色。嬋媛之會。接三門。乃爲銘曰。

中天挺育。億類含和。瑞圖括象。遁甲橫螺。絡雲孕雨。束岱襟河。嶂嶮銜銜。蟲彼嶸峨。其一司直之駐。關成靈藪。三十六峯。洞啓金牖。鸞舞臨風。虬驂載酒。具多瑤草。紛郁陵阜。其二煙霞拱護。神宮綺縟。明神伊何。塗山

茂躅。白帝倪耦。元圭兆績。生贊皇綸。終膺法籙。三其猗猗候人。歌發南音。塔鄉濠右。嘉夷盍簪。叶茲窈窕。乃
觀辛壬。度功弗子。內教克任。四其比道無競。凝暉不測。應物撫機。自家刑國。帝建呱呱。長化母德。御龍飛升。
景命四百。五其誕辭荒眇。云鑿轅陽。熊舒幻跡。石剖元良。安闕聖奧。恐黷神皇。年稭悠邈。幽祕莫詳。六其黼黻
敢塗。實近斯嶠。繡黝瓊珩。眷游雅眺。黃庭仙室。丹楹寢廟。日新累熹。惠優文耀。七其爰因展體。途接靈居。歷
祀縣遐。故棟凋疏。更安珠敦。重開玉虛。方依翠壁。敬勒丹書。八其璫匣宵燄。晶簾晝捲。煙縷繽紛。雲衣連蹇。
鼓名三足。案陳四連。閭閻芳祇。鑒臨遙顯。九其中黃素嫵。太微少君。不言不辭。若往若存。碩巾蓮綻。羅帶蘭
薰。左侍右衛。煜矣其羣。十其將子勿譁。神絃鏗爾。夏聲初戛。巫步徐起。珮琯鳴璆。珉編彤史。荐於聖母。式是
燕喜。十一其有齋兮季女。藉茅兮三脊。蓀脯兮挂酌。鵝蘂兮蟾液。玉燭調兮物昌。金莖潤兮時洽。神載格兮
享飴。于胥樂兮罔極。十二其

董方立誄并序

維道光三年七月。董君方立卒於京師。嗚呼哀哉。疾甚落眉。難拯仲宣之厄。夢驚書髮。竟兆元伯之亡。冉
冉鉗丙。無及於東隅。濛濛上圓。不徼於南斗。嗚呼哀哉。君諱祐誠。字方立。一字蘭石。江蘇陽湖人也。胄煒
騰編。代著通籍。風標秀舉。耀於初儀。志氣貞立。揚於術序。珍寂以躋其道。守素以鞏其操。侍宦汧雍。所歷
遐僻。既乏師資。亦鮮勝侶。戴宏承舍。莫聞其誦聲。羊欣練裘。未邀夫佳翰。二難相誨。七業俱興。恭丕則閉
門講藝。機雲則分廡。摛華蓋已。騁驥長途。而一日千里矣。年十有九。始偕兄基誠。歸試郡邑。疊冠其曹。遂

領發俊。由是聲譽聿隆。輝映江左。東南之寶。復見褚生。平輿之龍。爭推許劭。室靡藜藿。養資莖飴。爰斂修豪。出綰遊履。名卿改席於清塵。茂宰傾衿於盛美。雖洛陽年少。吳公之薦未伸。而安定書生。皇甫之迎恐後。俄而哲昆騫舉。典職農曹。君乃返自關中。來依日下。擬班超之入洛。同謝淪之游荆。鑽研益峻。覽照無遺。辨白題之名。釋紫荷之棗。時宗之所推挹。有識之所深嘆。二十八舉京兆試。趙典對策。爲諸儒之表。劉熾充秀。有得人之稱。方謂吐聲中朝。濯秀陽谷。而迺三應禮科。兩就雜試。奧渫未升。容刃屢脫。年始踰於顏子。齒僅逮乎賈生。癘疫是膺。虞淵遽迫。嗚呼哀哉。傷金鎔之乍掩。悼玉樹之長埋。杜栢風韻。竟損其遐齡。桓彬行業。終湮於斯世。以是論悲。濟焉何極。君器寓冲劭。神鋒標映。九皋絕迹。百行斯融。庭幃盡其蒸。圭璧貞其翫。言無玷而愈見其嘿。氣自抑而衆莫不驚。其爲學也。采珍於羣流。窺微於至奧。涉目則誦。借手以書。爰在始冠。勤於屬辭。激蕩驚芬。造次卽發。調鐘韻瑄。鏗鏘便奏。擅碧雞之儁妙。兼雌霓之新奇。不自綜括。多就散佚。今所存者。止駢體文一卷。詞一卷。雅好周髀。尤明歷象。八會五羅之篇。九宮一算之術。究今昔之隱。通中西之法。守根據窮。披浮索蘊。潛思以致。叡鈎蹟以達明。聞祕籍而輒求。廢人事而推測。足以補季長未合之理。詮子雲摹倨之文。迺界句繩之曲直。陳桑棗之多寡。取徑度於中星。勒斜絃於黃道。所著有割圓連比例術圖解三卷。橢圓求周術一卷。斜弧三邊求角補術一卷。堆垛求積術一卷。三統術衍補一卷。又嘗考輿地之記。箋桑鄠之詳。爲水經注疏證成三卷。而病作不竟其業。又譔長安縣志三十卷。則代人之作也。嗚呼。君以開敏貞固之姿。濟其幾密瑰璋之學。使造物有心。假之中壽。則膏腴

流於康時。華曜明於竹帛。彌綸古訓。經緯先民。其所造詣。疇克媿之。而竟萎幹於未霜之辰。踰足於中冀之野。塵尾轉而自傷。麟角成而何裨。豈不惜哉。豈不惜哉。德公上書。期於何日。延之作誄。輒復經年。蓋悼痛之深。非可託之豪素。英華既墜。安能招以旒旗也。隙陰易逝。悲緒稍申。懼其音徽之就沫。元慮之莫察。懷不能已。是用敍哀。其辭曰。

芳藹維蔚。植於幽陔。馥烈弗彰。繁霜是摧。我有俊民。道藝胥該。蓄彼絢素。荐以瓊瑰。猗歟方立。攀倚儷古。黃中涵照。元風絜矩。亭亭物表。軒軒霞舉。孝敬淳深。則篤其祐。積志委正。如暘赴蔭。隼翮百盤。丹霄誰禁。錦組初搆。雲漢爲紉。洞包典籍。究心緯識。闡茲麗則。玉質金相。碑傳桐柏。賦嗣靈光。登軌絕蹈。內學斯彰。錙銖甘石。糝粹郎襄。志學求友。吾實知子。晝憩宵盤。三墳百氏。屬文心競。執鞭爭駛。牽課跛牂。追隨驟駢。以疑相校。以名相砥。無摘不瑕。有揚必美。絕塵斯達。醇修日起。吾見其進。未見其止。學優而仕。謂有常經。印須我友。出應弓旌。一辭蘿薜。終縛塵纓。豈期巨壑。竟阻長鯨。困敦之紀。射策初罷。蕭穆京館。淒清永夜。維予與汝。影形相藉。搜奇訪碣。耽吟成社。子實慨慷。推枕起語。念茲榮墜。曷欣曷沮。庶幾述作。兼資雅詁。致思天人。道在吾侶。予雖疏陋。允聆斯言。陶陶卒歲。單衾忘寒。亦越三載。始振羽翰。齊名秋賦。相得彌歡。子之妙譽。當塗爭賞。子之逸藻。士流無兩。霜銑一鳴。不聞嗣響。卓蹤九閩。營魂遂往。嗚呼哀哉。上才育世。混焉末施。瑣瑣人爵。天旣恡之。又蹴其生。俾隕厥奇。忍矣何極。不我愁遺。靈憲一卷。洞歷十篇。寸管所俶。毫末罔愆。張蒼膺仕。卓茂永年。曰能斯駕。曰遇則懸。嗚呼哀哉。別子燕市。悠悠四稔。豈不爾思。積懷誰諗。

亦有晨風相貽尺錦。研質古義。諮詢詳審。來析既承。往告復達。子已彌留。猶勤攬察。我方延首。怨此契闊。忽奉悼書。臆脅如割。嗚呼哀哉。疇昔共期。身歿名存。子齒雖少。精詣已陳。祿固未逮。垂篆令聞。懷和長畢。堪慰潛魂。嗟予荒廢。譬彼痍木。括羽云亡。蒙心安勸。廿載初衷。杳杳誰屬。英爽有知。亦將悲哭。文行終始。悉吾所瞻。欲表其德。短筆是慙。隱痛彌深。遺輝恐淹。爲子竭思。吾復何嫌。淚調元馨。色黯細縑。歌同薤露。泣告西崦。

蘭石齋駢體文遺藁序

嗚呼。此吾亡友董君方立之遺文也。寒谷曦沈。霞綺絢乎天半。洄溪泉咽。滋漉達於重埃。吐腸之夢。已讖生前。銖肝之言。猶存斯世。蓋賊年損壽。職此之由。而浮煙斷竹。將以託命也。誦偉長之中論。鬼錄難追。答劉沼之遺書。宿草已別。淪亡痛惜。可復道哉。吾始羈卯。煙君伯仲。縱獵道藝。研推元史。難膏熒熒。繼於朝旭。拱室寂寂。幾忘足音。旣欣同志。俱好纂組。遂欲發蘭臺之奧府。奪陳留之重席。上析潘陸。下綜任劉。勤身奮志。顯光氣於寰中。瓌詞綺章。操雅麗之絕格。清樽互賞。連襟偕游。噓靄生雲。飛藻如雨。揚颯高詠。仰屋苦思。對影竟日。爲歡彌年。而君尤以天授逸才。筆多奇彩。公明洞識。乃雲龍之精。仲舒屬翰。比烏獲之勇。華情驟展。驚辭橫溢。初攬豪素。春花滿堂。舉映睫端。秋露染翠。彥龍似有宿構。蘭成疑其復生。不特吾之庸瞽。無以匹之。卽二三友生。及君之賢孟。皆有拔俗之妙蘊。軼羣之麗篆。亦自以爲瞠乎其後也。蹉跎塵勞。歲逾十稔。鳴轂華阜之陽。振裙京輦之下。人事牽迫。雜憂紛撓。而修學益勤。沈思獨往。食鱸餽以求

咫間坐繩牀而參祕義。窮化機神。探蹟衆妙。九部五時。苦指諸掌。百帙千名。必穿其脅。治積矩之經。則黃鏡應律。考地訓之志。則赤壤陳圖。信都覃慮。不聞雷霆。張衡制作。欲侔造化。此則阮咸孤詣。爲荀勗之所深折。羊殖屢變。非成搏之所能知矣。吾嘗謂君曰。樸學者畢生之遐功。文章者不朽之盛事。以子雋異之知。潛心微妙之際。艷文茂記。投閒而作。豔柯繁穎。柢實相宣。足以寫盪性靈。荻露膏澤。勿謂鴻儒優於文人。而輕棄其照乘也。君瞿然曰。吾將挾昔人之隱。以祛鄙衷之惑。擴其識。絜其志。摠其指歸。明其象數。然後發皇經緯。洗洋適己。以副於文。庶有成乎。子雲篆刻。非敢有悔。戢子良箴。子其待之。嗚呼。舊說始定。郭路有絕脈之傷。講授不休。鄭灼無鎖心之物。桐根半死。無假烈飈。駟隙一馳。遂成永夜。蓋靜氣旣動。而魂魄易幽。元理盡剖。而文采亦終闕矣。凡所撰述四十三卷。皆足刊摘冥奧。討濬學源。而吾之偏嗜。尤在斯文。冀速彰其微言。以少酬夫夙願。迺求遺藁。屬諸梓人。嗟乎。此特安石之碎金。相如之玉屑耳。南都一賦。豈盡生平。北海萬言。未陳梗概。覓三旬之餘響。郢歌已遙。覽千仞之德輝。鳳飛不復。然而杼軸物表。氣韻天成。雋不害窕。縟而有則。袁陽源鸚鵡之篇。推爲獨秀。王元禮芍藥之賦。傳於少時。不可見其洪輝之未泯。超步之難蹤乎。吾久墮落。文質靡歸。斷金往契。咸罹貧瘁。卓爾之志將廢。斐然之作無聞。校崔生海岱之記。差類徐寅。述衛恆汲冢之書。慙非束皙。潁川斗酒。微聞十字之吟。蜀郡元文。聊證千秋之業。輟斤絕軫。輒復自傷。執簡悲來。泫然而已。

小琅玕館雅集詩序

蓋聞道通霧臺。可謝絃章之贊。義申麗澤。自叶琴笙之和。藉款睇以言歡。歷今昔其如一。然而脂輪暫動。輒感星文。綺薦偶陳。遂貽勝迹。良以賢達之契。曠代難期。幽軫之合。塵勞希覲。古人所爲欣整得之。遇貴物外之游也。前河東觀察劉松嵐先生。文德耆英。元風勝業。威鳳一羽。愷澤浹乎民謠。霜鶴九秋。直言書於惇史。留冀州之畫象。爲河朔之逸人。式啓精廬。聿興講授。栖道無悶。十有餘年。今河南督學吳巢松先生。稟玉府之華。持繡衣之節。水鏡人倫。斧藻士固。平臺逸響。已振流颿。東觀雅裁。卽然緯俗。遂乃行式問之禮。致擁篲之誠。鄭公通德。特表其一鄉。任君夙望。敬修乎四海。縞紵旣洽。燕享宜殷。蘿薜方開。騶騎是屏。泉明載酒。無煩半道之要。山傅倒羅。乃得高陽之館。所偕賓友。吳君亞白等七人。並以詞宗穎達。旅屐遐臻。而河內邑宰袁君蘭村。又適以文猷惠績。遷莅茲邦。或參地主之儀。或應折柬之召。各紆簪佩。同泛觴壘。俊賞煙霏。名流川泳。賁此盛事。軼乎前修矣。時則梅衣始御。鵲扇輕揮。含櫻浮丹。新桐衍碧。風弱而驚花驟下。日暄而殘絮平飛。瀨泉潰薄。繞華廣之山池。太行嵐翠。拂幽人之屏几。縹囊赤軸。啓老氏之藏。玉篆銀書。擬陳倉之鼓。於是紫蘭盡調。綠醅徐進。一酬再詠。參立孤行。主客相忘。鋒辨互起。攬清光以橫袂。發豪翰以滿堂。興若遠而未闌。情由澹而彌永。咸以爲蹤緒不恆。雅樂難繼。矚靈之景。非華燭可駐。愜心之晤。豈染彩所宣。夫躡浮霄而增寥廓之思。睠翔雲而寄懸解之蘊者。惟藉英辭。綜其元覽而已。況乎寰海懿哲。不期而萃。林皋茂美。釋之靡窮。足以輝映當時。炳耀載乘者哉。分授簡端。遞揚筆妙。凡會者十人。共得詩若干首。錢也。凡翻久淪。孤蓬獨轉。東陽寄跡。非江惇之隱居。南皮勝游。無吳質之曠抱。登龍

譽重則自慚暴鱗。倚馬才雄而益形踈足。命爲短引。未敢固辭。聊竭剖瓠之資。以伸執鞭之慕。青雲麗藻。潤金石以永傳。白社狂人。比荃蓀而失類。後之覽者。當有擇焉。

答吳巢松督學少司成書


巢松先生閣下。輕伏山陬。人事尠通。邇日始聞閣下榮拜少司成之命。虎闥重望。教典攸先。蛾學成材。師資是仰。代稽往牒。粵崇有道之稱。治在右文。益慎儒宗之選。合以名德標準。矩範均庠。擅張縉之風流。繼陽城之端雅。鴻都耀采。青領瑩思。忤結鄙忱。佇修箋賀。復於袁河內處。頒奉教疏。翰落碎金。詞翊明穀。喜躍循覽。至再至三。辱承盼睐之深。忘其獎誘之溢。又蒙精疊前韻。惠贈華篇。體韻本乎天成。藻律由於神悟。厭飮膏澤。則士衡改顏。調暢笙簧。則叔源失步。但以荆璧抵鵠。用寶已輕。函鼎烹雞。採鮮過小。晨燈之勛。雖感任昉之知。墜石之文。尙愧王筠之誦。咀味滋美。顧影增羞。咨咏之情。彌旬未竭。比日黃蘆萌重。方兆暑中。復育蛻新。已迎秋氣。伏想履祺清善。葆攝冲和。瓜環鎖心。猶勤文史。蓮筩吸酒。分勝賓僚。傾首薰颺。惟殷眷企。閣下以含章天挺之才。守扶微嚴道之學。發川流霞蔚之文。爲金鼎玉鉉之業。昂昂八表。若辨麒麟之蹤。汪汪萬頃。時煥螭蚪之彩。抽殘竹於石室。頌寶璽於璇臺。所以溥海英偉。投贊爭先。江國藝流。襲裾恐暮。寶章崔瑗之篇籍。殷浩王濛之虛遠。莫不宗讓模楷。讚述元言。賦鶴鶴而知王佐之才。咏枏榴而推文章之伯。今果潤色鴻猷。冠冕時望。出爲鳳舉之使。內掌鹿鳴之詩。識輶軒之職者。惟有林閭。丐丹青之染者。爭歸虞溥。一士未化而若饑。千里不言而斯應。光名之達。豈不盛哉。履錢稟質。駸訥。約悵悵。

恫。少未以章句爲通。長而昧揣摩之術。學有三費。而見聞日疏。行慚九徵。而顛躓相續。顧嘗偏嗜篆刻。愛好纂組。刳心於建安之初。斷目於仁壽之後。師平原之宏放。則骨弛而不收。摹蘭成之婉秀。則氣茶而難振。鑽鑿乎江沈。剽取乎任劉。始則神離。繼乃貌失。自稔賦分有定。括羽徒勞。然而蓄流涓澮。本無向若之期。致飾椎輪。豈慕歸風之價。候蟲鼓味。亦積噫所容。雜卉吐藪。爲廣阜所置。雖足招晒。諒無訛也。且竊有庸慮。爲閣下陳之。蓋以爲生同險樹。遇若溷茵。名不可以外干。業不可以內廢。道以文昭。文以辭萃。斯爲不朽之盛事。緯世之顯謨。而儕俗之倫。略之已甚。中智畢力。但營帖括之功。高才涉觀。并棄制科之學。弋得則束卷不視。而自詡其能。俛失則敗帙皆亡。而不以爲媿。至於紆纓紱。畫輪蓋。臨高秩。提鈞衡者。未嘗索特達之英。求辨論之侶。揖前除以考藝。掃右室而待賢。於是曠識自修。好古不怠之士。皆滔滯難進。蜷局堅藏。畏逢按劍之噴。末伸緣鵠之想。而善忌者尙詬其浮囂。抱陋者更疑其殊類。結縉不解。領顛多傷。蔽鋼已深。膏盲安起。惟閣下德高而文積。官尊而交繁。知卓遙希有之材。察豐辭茂記之用。將爲人倫元禮。當代彥昇。如下走之於閣下。猶壤蚓之去高鵠。蕢土之比介邱也。而尙延之以禮意。申之以手畢。大槐客舍。獨別林宗。柴車草屣。不遺元叔。乃知閣下盼採之念篤矣。虛襟之量宏矣。夫埏埴之巧。必昆吾之所陶。騏駼之良。非皋歟而孰覩。今欲提挈筆墨之林。淬厲干鏌之穎者。舍閣下其誰仰哉。狂疹忽作。瞽言雜陳。曲針見礪石而躍。腐芥望頓牟而興。固物情之恆。亦有以導之也。幸加恕察。聊佐軒渠。遲枉誨言。慰其惴慄。履錢頓首。

和簡勤公讀易匯參序

蓋聞蒼牙啓容。彌綸已周。翠媿効靈。苞籥斯剖。戴九履一。導精氣之先。七備八用。昭圓方之敍。故周孔之道。非神不能爲。坤乾之義。惟聖可以視。至於西河傳十翼之旨。淮南徵九師之說。田丁施孟。以訓故爲筮。箕馬鄭荀。劉闡微言於杓斗。虞仲翔之探蹟。猶契義心。王輔嗣之論經。遂亡漢學。魏晉風尙。咸解虛無。趙宋諸儒。始標理蘊。夫考象者。覩璇星於清都。衍極者。求元珠於赤水。察數者。循環明於標幟。言感者。響應比於山鐘。雖易之爲道。物無不該。衆說騁辭。義各有得。然而金鏡在抱。則妍媸易明。青萍舉握。則榛蕪自闕。後三古而作。校五子之編。其必挈裘領。調徽絃。而後可以綜剛柔之體。彰幽顯之情也乎。宮保和簡勤公。秉乾鑿之英。值泰交之運。中正不倚。文武是經。膺腹心於三朝。建幢鉞於萬里。立功立德。宸史之所特書。公望公才。人倫之所共仰。薛宣多密靜之思。裴楷著清通之美。嘉猷入而彤廷有耀。大節樹而絳宇未知。若乃包洞典籍。刊摘沈秘。百篇朝讀。七藝夕陳。輜軒初駕。細素已披。幕府暫移。殺青未竟。紀蹟縣度之域。題頌維常之皮。研精軌道。逾於白屋之儒。競景照輝。勵其丹鉛之業。煒哉不朽。蔚矣其文。公生平碩學。尤邃韋編。開金版之圖。發漆書之蘊。照哲人之淵海。遊嘉論之林藪。假年有嘆。耆齒不衰。於是析元達微。類情通德。思炯既往。神鑒將來。會聖心於毫芒。識天樞於雲物。以爲趙賓巧慧。欲更箕子之文。何晏雋疏。未達老生之論。儒林師說。支葉繁滋。曲學諛聞。陰陽踳互。乃通介於漢宋之籬。宗詣於程朱之室。博採異同。精別醜駁。運之以星歷。緝之以緯候。辨之以人事。叶之以秭算。證之以羣史。擴之以雜家。戢高庫表。衍

蟠息變動之端。以質健順剝復之數。罔不從焉。哀古今治亂枉直失得之統。以麗吉凶貞悔之原。罔不協焉。油素緹筆。蓄之卅年。枕篋屋梁。勤如三絕。然後成書十六卷。名曰讀易匯參。是則先天後天之體用。可以挹而明也。先聖後聖之表矩。可以遙而見也。八索不能窮。太極無以隱。迷途舉燭。智慮悉朗。平衡量水。輕重以分。洵乎三爻之靈授。千駟所不易也。設公歷亨衢於盛世。勵錯節於遐方。高令君敦心於六經。班叔皮斟酌於前史。率辭揆方。本隱之顯。寒泉冽井。皇極信其剛中。甘雨盈缶。蒼生渥其惠澤。馬脛雁聲之種。感若豚魚。鯨鐘蟬冕之榮。慎於虎尾。惟發揮乎易理。以寅亮於天工。豈徒嶽嶽談議之雄。區區章句之末哉。公之長嗣。榆村太守。繼先烈而宣猷。寶遺經而飾治。鼎銘斯茂。手澤永懷。謀授梓工。聿宣來學。履錢獲與按讐之役。得窺爻繫之全。三復鑿胸。十旬卒業。李鼎祚之集傳。安知統要。注子王之通義。自遜研深。鴻教不刊。邁商瞿三十五家之說。驪淵是萃。爲我朝百八十載之書。






33
4
2534

萬善花室文稿

三





叢書集成

初編

主編者
王雲五

商務印書館發行



稿文室花善萬

(三)



撰箋履方

萬善花室文稿卷六

東流縣志敘錄代作

昔在先王。奠壤析原。經土定民。分命重黎。北正司地。故有綠圖呈瑞。中經兆記。納賦作貢。肇詳誦訓。列於周官。惟我夫子。取百二十國之寶書。以成春秋。是知三代以上。九州之廣。家有其乘。國有其史。疆理天下。若指諸掌。秦漢代降。典籍放失。至班氏始志地理。而陳壽始分三國。下此則華陽國志。獨限方隅。太康地志。初標元號。後世所傳。數體略具。若一邑成編。求其善本。惟景定建康之籍。宋氏長安之纂。記載詳漏。得失相參。蓋志之體裁。實符乎史。封域陵谷。建置興廢。災祥政事之紀。忠誼偉節。循吏名賢。孝子弟。貞婦淑女之行。風俗徭賦。版籍齋祀之數。祠墓遺蹟。詩文謠咏之傳。所以彰勸萬民。咸和庶政者。罔不該備。是以國家著之憲典。命其守土。舉偏修墜。弗敢荒棄。而東流瀕於大江。右襟豫章。左系皖口。亦四達之邑也。某以承乏。來尹是邦。咨攷載乘。多所闕遺。乃討論故實。求其原始。邑之有志。實始於明正德十五年。知縣李渾所輯。而教諭謝明為之序。其序略云云。閱五十五年。為萬曆二年。知縣陳春議修之。而聘邑人汪文為撰定其序略云云。又閱七十八年。為國朝順治九年。知縣蘇宏謨復創修之。其序略云云。又閱百有六年。為乾隆二十三年。知縣蔣綬又增修之。其序略云云。時國學教習邑人汪君迥。實綜其文。方之前志。搜討略備。然其為書泛而不該。糅而無當。繪列虛景。反疏疆域之圖。條舉細端。乃失表志之例。好

083
1124
2:2535

萬善花室文稿 卷六

一一一

39500



緣飾而不雅。標論議而不文。考文獻者。能無遺憾也哉。且志之停修。已六十年。及今勿輯。後將何觀。某乃集議重纂。商核名例。詢於耆長。僉維余同。經始於嘉慶二十有二年。秋九月。至二十三年夏五月。而志成。補偏救亡。闡幽彰顯。治禁所繫。雖微必書。懲誘無從。雖鉅則削。經緯潤澤。殫於厥心。夫東流之民。敦龐執愿。不以豪侈相高。服田力疇。愛其長上。而地隘人疏。戶少儲峙。冠蓋風流。亞於他邑。某之固陋。與民相習。思以朝夕噢咻。漸摩而化。如其禮樂。以俟君子。若茲志者。亦絲叢之所由。損益之所鏡也。凡爲圖五。爲表三。爲志十。有二。爲傳十。有二。其序曰。

聖孕函夏。錯陳井封。南陬綺壘。規茲一同。畫壤標原。陌絡阡通。四竟是治。勉奏爾庸。述縣竟圖第一。崇墉翼翼。枕乎江流。塵肆所藏。衣冠所游。環繪百雉。比屋康衢。興仁交讓。爲君子都。述城郭圖第二。鳴柝可聞。修睦相庇。里舍攸繁。分綜則易。碁羅星布。各知其鄉。以告遂人。以安我氓。述鄉鎮圖第三。我瞻宮牆。蒼廢載新。几筵初布。俎豆孔陳。禮堂寫範。享室明禋。敬摹棊枴。式起彬彬。述學宮圖第四。重簾可設。荻幃匪陋。開閣延賓。躋堂稱壽。聽政是憩。退食是趨。仰此庭廡。職思其居。述縣署圖第五。南唐始名。溯梁僑置。經以編年。緯以大事。閱千百載。沿革可識。述紀事沿革表第一。紆紱佩綬。爲百族師。僉曰予良。行則委蛇。亦有哲人。勞心蹇蹇。綜緝雖同。優絀自顯。布武將登。能勿黽勉。述職官表第二。

珍球輝谷。明珠媚川。桑梓之華。俊乂高騫。聖皇側席。野無遺賢。櫛比鄉達。以開爾先。述選舉表第三。

登彼中阿。誕望藩垣。湛湛江水。膺膺周原。爾有坂田。黍既實之。爾有沮洳。穀亦殖之。疆理名物。與衆析之。述疆理志第一。

匪巖何時。匪澤何渟。一邱一壑。山經海經。密峯若屏。中江如帶。盤紆地軸。靈秀所萃。述山川志第二。

郵亭官寺。郭郭津堤。經始有日。繕葺有期。後有作者。毋荒三時。述營建志第三。

人浮於田。三贏其一。計粟納算。以供賦役。蠲租予復。皇仁贍卹。牧長徵調。疇敢煩急。述賦役志第四。

鴻都雅化。膠序成林。園橋之士。皮弁橫琴。文翁巴蜀。延壽淮陰。灑掃儒肆。悠悠我心。述學校志第五。

豐年丕登。倉廩既盈。亦有凶荒。以佐餼糧。蓋藏敗蝕。典守是責。述倉儲志第六。

聖以德馭。不禁五兵。警衛夙設。斥堠綦明。烽泥集燕。角帳巢鶯。有備無患。斯焉永甯。述兵防志第七。

練時涓日。饗德報功。清管合鬯。潔饗和彤。典祀有常。明馨爲主。羣黎百姓。咸格來祐。述祠祀志第八。

提關水門。灌漑沃野。督以塢流。誨之堂下。吏不明農。古人所羞。城名召伯。渠曰賈侯。述溝洫志第九。

五行占兆。術廢已久。災祥違政。如響斯叩。樞機雖隘。貞悔所誘。述五行志第十。

娜嬛典籍。渺不可覩。樂石吉金。沆寥亡補。乃覲篇名。乃求斷章。附采詠歌。擷華彙芬。述藝文志第十一。

元亮菊畦。青蓮書榭。江上風來。遺蹤心寫。覽古稽今。諸馮歷山。爰疏彭蠡。征鴻未還。述古蹟志第十二。

澤在一時。報已千秋。神君神父。何德不酬。春社豆觴。伏臘鼓舞。善政可循。往昔是與。述循吏傳第一。

釋屣而仕。宣猷四方。幅巾華轂。乃歸故鄉。聲聞雖遙。莫察匪邇。里閭峻游。實知君子。述仕宦傳第二。

伏軾以趨。鄭公之居。束修自治。化懋宗閭。純德款款。禮意蒸蒸。藜藿不採。實有所憑。述鄉賢傳第三。
準仁軌義。靡骨不悔。正氣盤礴。精貫宇內。魂兮來歸。歆享靈輝。廉頑立懦。爲邦家徽。述忠節傳第四。
佩瑋事親。辟珥敬長。孜孜庭戶。藹藹嫺黨。書之象闕。行道所仰。述孝友傳第五。

經經緯史。英聲淵識。人握隋璣。家傳荆璧。倘遇邱生。錦已餘尺。枏榴一賦。遂爲雄伯。述文學傳第六。
任卹之誼。陰德之源。貸鍾拯患。推食爲恩。麟之收幣。君雲削券。此有嗣音。旨哉芳善。述義行傳第七。
頤游草澤。志或有在。身不可親。名不可晦。述隱逸傳第八。

維清緝熙。躋世仁壽。煌煌高宗。集宴千叟。茲鄉三老。登陞而侑。引養引恬。進揖台者。醜我醇醢。滌我大斗。
憲言成福。保艾爾後。述耆壽傳第九。

樂著房中。教始闔闔。貞珉不移。德音來括。漆室未啓。霜鏡已灰。皞皞日月。懷清之臺。述列女傳第十。
有客有客。亦旣戾止。皎皎白駒。亦旣維止。爾宅爾田。無不宜之。爾饑爾渴。吐哺食之。述流寓傳第十一。
色無色界。是生因緣。緣之所滅。萬境無前。振錫何之。祇垣何基。轉識理性。仙釋同歸。元之又元。性何所依。
述釋道傳第十二。

嗟予諛聞。敢曰精研。入省舊史。出咨名賢。廣覽博徵。集益繩愆。載籍滲漏。援引未專。釐正雅俗。或有得焉。
闕疑存信。略具簡編。來詰糾匡。願爲執鞭。述敘錄第十三。

大矩既兆。形束壤制。臬陸紛布。廣輪周達。其土有堅壚偃瀦之異。其氣有暑寒陵衍之殊。凡民之生。剛柔燥溼。各安其性。言語嗜慾。皆應其類。是以莅政施教。必因時順宜。以利導之。察陰陽向背。候序遲速之度。循原隰水澤。肥墪高下之宜。因其所喜。以勸善。因其所惡。以禁姦。勿繩之以所不安。勿恫之以所不知。夫楫雖利。不可以逾嶺。輻雖廣。不可以濟川。權衡準繩。異形而皆施。丹青膠漆。不同而皆用。勢各有適。物各有當。此爲治之軌。不可替也。昔者文命之聖。區別九州。定其山川。分其圻界。條其物產。辨其貢賦。降及姬宗。六官分職。司書掌邦中之板。土地之圖。司徒以土均之法。齊天下之政。通訓道方志。以詔觀事。道方慝以知地俗。司險達道路。保章辨封域。皆總於冢宰。以成六典之治。周之中葉。典籍未亡。故我夫子。取百二十國之寶書。以成春秋。漢時計書。旣上太史。郡國地志。固亦在焉。劉向略言地域。張禹使屬朱贛。條記風俗。班固因之作地理志。晉摯虞作畿服經。其州郡及縣分野封略。事業國邑。山陵水泉。鄉亭城郭。道里土田。民物風俗。先賢舊好。靡不具悉。其書已亡。後之學者。但宗班氏而已。若陸澄之所纂。任昉之所增。唐李吉甫元和之編。宋樂史太平之紀。皆總括寰瀛。儷於國史。下此如潘岳之述關中。王範之錄交廣。雷次宗獨詳於豫章。顧啓期遂傳夫妻地。江源士女雅行可書。扶南風物殊聞咸紀。雖偏採方隅。雜陳簿錄。皆足以達情諭道。辨物類名。詮動植之詳。喻勸懲之旨。使夫遐陬單壤。彙厥嘉產。登之冊府。揚於天下。而履其鄉者。緇帙啓疏。殫察利疚。如闕櫛比之中。而通其苛憊怡愉之意。於以惇禮而拯性。頒憲而糾俗。執其臬守其經。以求砥于大同。胥繇是矣。我朝聖緒丕承。煒燦淳懿。元鈞駿模。乾奠坤謚。餐化羣倫。迪蘇臚祐。擊

拱大常。覃泊虜。四垠九荒。岡閔沈墨。稷慎大麀。莎車挹婁。舉厥駢踵之倫。靡弗昌樂。肉飛。蓋蹈首向。王會之圖。重譯之紀。僉陳於職方。惟聖天子設象。以爲民紀。罇本肇末。比綴以度。尤令區夏。一意同欲。連屬其情。秩之軌物。故憲典昭著。命守土之吏。典修方志。以時罔怠。所以齊統服。並質。劑法至美也。河內之爲縣。延袤雖僅百里。而介於河朔。地近宅中。首絡太行。澤潞之所控也。扼河陽。倚溫原。南臨邙洛。東延鄴魏。沁丹以爲洫。白陘以爲隘。風候和敵。土澤膏茂。輳轍四達。沃野平曠。自漢以來。世治則爲殷阜之區。有事則爲據衝之會。故多往跡遺址。載於羣史者。尙可考見。其民敦愿以謹。率義向方。碩儒文人。遺風未泯。鄉曲之閒。孝友廉讓。貞苦卓立之輩。不待間世而生。不可謂非雅邑也。某以虛薄之才。忝焉承乏。振轂平臬之右。襄帷武德之原。矚山澤之雄秀。喜閭井之蕃滋。振裘挈領。莫知其端。敗駕傷錦。默而思懼。是用稽前誥。求訓典。揆今以觀古。由邇以度遠。而故乘荒蕪。遺聞散佚。舊所存者。非有闕駟之精博。賈耽之勤蒐。漏所應詳。登所宜汰。援引鮮據。舛互非一。況時逾百年。未經復修。月成歲會。久而無徵。潛德幽光。湮而莫舉。遂使文獻之域。同於叢陋。老成旣謝。典刑蔑如。是可慨也。某以先務是急。不敢違其疏愚。竊有修輯之志。迺歷考史籍。以定其規。廣覽篇冊。以求其備。搜碑碣。以辨其異同。取公牒。以證其蓋革。延邑人之耆俊。俾陳先德之所述。進都鄙之耆長。使達悖獨之行。積之朞月。舊章差集。然後授簡於友人。方君履錢。吳君育。削繁摘要。斂華賁實。經之以事。緯之以文。適前河東觀察劉松嵐先生。懸車養逸。主講懷州。因得就正有道。加之刪訂。乃有成書。通謹按河內之志。創於明萬曆二十五年。知縣洪洞盧君夢麟。而邑人王方伯所用。

時始舉孝廉。實佐其事。盧君爲之序。略曰。世無不志之邑。無志者獨河內。彼爲其附郡郭。凡當志。郡志總之矣。然則他外屬非總於郡乎。無志是無河內。以是緝邑者深思之。而前令解州侯公。實勸爲之。考索故典。網羅逸聞。屬孝廉王君次第其書。適侯以故去役。遂中輟。不佞至此。逾二年而始討舊事。以終盛舉。更期年而脫草。剗剛畢役。河內於是乎有志。志成於是乎有河內矣。夫不佞非敢爲志也。仍前政之舊。以成其美。無亦爲侯公與余同意氣哉。睹河內枕山扼河。據孟津之上。節俠孝義。代不乏人。皇代建制。規模宏遠。諸城堡官師戎政。負絕前代。文學繁興。簡帙增輝。而區區所僭陳於搢紳先生。及父老子弟者。則惟曰風俗其自今敦好。尙景行前休。使此地人文。視昔有加。以鳴國家之盛。以無空斯志。則不佞與王君之所大幸也。志今已佚。但求得其序如右。越六十一年。爲國朝順治十五年。知縣大興孫君灝。奉中丞賈公命修輯。延邑明經王君玉汝。爲之屬筆。王君卽方伯所用子也。未竣而孫君去任。繼之者晉江林君環昌。復與邑人刑部郎中蕭君家芝。參訂授梓。時順治十七年也。又閱三十年。爲康熙二十九年。巡撫閩公興邦。檄修邑志。時知縣事者。爲南海李君標。亦延邑人戶部員外郎蕭君家蕙。歲貢生史君連。廩生蕭君健。同庀其事。至康熙三十二年。功始竟。又閱一百三十年。爲龍飛道光之三年。其夏四月。知縣袁通。始自汝陽遷劇河內。明年正月。志事始舉。而歲而畢。卽捐廉俸。付之梓人。至五年三月。其工亦竣。凡爲書三十六卷。嗚呼。通之先人。以魁偉絕特之才。彌綸經術。錯綜藝文。早膺特徵。繼擢甲第。入校祕書。出宰上邑。播德宣惠。異政洽聞。初莅建康。歎其志乘之疏廢。乃覃思抒藻。纂若干卷。刊藏官曹。以爲彼邑之典式。通無似。不

克守先人之學。而幸竊微祿。從事此邦。尋繹緹素。編采故實。亦獲與賢士大夫。共觀厥成。小子何足以知此。其亦猶先人之志也。夫。其亦猶先人之志也。夫。乃爲之敍曰。

文德鴻昭。天章雲會。月山梵勝。寵邀玉軌。魏君御射。唐宗新誠。孰與聖謨。炳煥百代。臣通謹述聖製第一。中區豐壤。綰河鑰山。野王故都。衛角所安。漢稱巨都。宛潞是環。唐始置邑。昔名未刊。二郡五縣。遷易旣繁。或綴或屬。隸於郊原。是爲浩穰。星絡綺連。竹柏妙遠。黍禾滋蕃。開方計里。呈於簡端。述縣境圖第一。附路之精。孕彼峻嶒。峨峨懸隘。權輿八陘。竦嶂含蕤。複岫舒屏。天井旣闢。地肺載疑。述縣境諸山圖第二。銅鞮觴濫。脅穿太行。石門始啓。灌漑千里。遏堰疏渠。丕均上腴。述沁河圖第三。

源源之水。來丹林。沙麓九派。澌碧潄。二十五泉。衍其襟。滋漉的達。珍如金。慎勿泛溢。愁黎黔。述丹河圖第四。

沈有東支。乃潤我懷。仁瀆恬流。涓涓潛潛。穴郭通脈。澄源鏡開。述濟河圖第五。

崇墉匪廣。河朔襟喉。名山枕堞。平渠決露。雲氣晻靄。衣冠所游。劫之鞏之。以奠爾陬。述縣城圖第六。勿謂傳舍。夙夜思虔。無以莅之。荻障猶愆。阮生曠朗。朱穆貞堅。景行克仰。孰與媿肩。述衙署圖第七。

璧水環林。清穆是崇。懷經登降。束修禮容。述學宮圖第八。

區昔壤。續史事。繫以表。罔不備。羅百代。誠簡易。附沿革。規往志。述紀事沿革表第一。位惟鄰民。如絃貞直。哲人宣勞。彝典罔斲。惟彼不諛。俾民大棘。野王建治。歷珩嘉德。厥惠勿諉。名乃永植。

官師之錄。俊庸並列。後有君子。是懲是則。述職官表第二。

周武之穆。始啓邗封。溯漢泊宋。或王或公。元君斥居。入紹大宗。鄭藩在明。九傳乃窮。述爵封表第三。
韞價藪澤。充秀邦閭。鴻毛順風。揚袖九衢。子禮顯經。遂舉高第。先達可懷。醇修允繼。既貴名騫。又思德副。由庚在詠。勛哉衿冑。述選舉表第四。

營室東映。井竿億臻。爲絺爲鄂。翳古名存。分畫保圻。以諭途人。述疆域志第一。

太行幹麓。傑儼千疊。東委金傘。西起蛟脊。漢泉徐衍。如津貫岷。經山緯川。比於桑鄆。述山川志第二。

晉風褊嗇。衛俗纖儉。酌和安雅。禮教相染。珍藥盈畦。良禾萬鍾。爾田爾宅。土物土風。于于敦愿。以洽大同。述風土志第三。

五行淑慝。偏鍾一隅。休徵咎徵。時與地殊。於鑠聖代。羣麻合符。頌呈瑞麥。歌集康衢。述祥異志第四。
肥壤萬頃。水田十三。明季倍征。罔顧民暑。皇朝均賦。農食始厭。計粟納算。以養以恬。歎則蠲恤。惠澤益覃。述田賦志第五。

懷有神令。時惟袁公。疏巨浸。修曲防。奪彼斥鹵。生之稻粱。達闕畜流。毋怠厥功。述水利志第六。

明禋舉矣。嘉薦饗矣。爾主百神。亦職有常矣。棗盛芳醴。敢曰惟馨。何以格之。時和歲成。述祠祀志第七。
魯齋雅化。膠序如林。釋耒以趨。束帶橫琴。河朔剛氣。冶爲南金。詩書之澤。蘊而彌深。述學校志第八。
公家之役。民力是征。今茲建葺。皆上所營。三時弗擾。百堵以興。補完治敝。毋墮厥成。述營建志第九。

光武帝業峙此而雄。形勝之域。戎穀蔽衝。塢壁設屯。三十三所。何如寇公。居若臥虎。乾宇晏安。武備亶修。靡嚴玉帳。坐奠金甌。述兵防志第十。

坂曰羊腸。臺名射犬。古人不作。遺蹤未翦。窅窅仙觀。闕闕梵庭。駕言出游。據我幽情。述古蹟志第十一。中郎入吳。適得詩細。茲求鄉戾。往册多翳。採輯經論。雜錄傳記。甲乙篇目。編以世次。述經籍志第十二。河朔片石。珍瓊琅。驚龍妙畫。開奇疆。抉幽欲起。韋仲將。歸山金累。呈瑤光。誰與祕此。雲錦章。述金石志第十三。

玉溪麗藻。振轡今古。餘膏賸馥。揚鱗刷羽。燦然高詠。緬爾元矩。屬辭比事。軼文咸舉。述文詞志第十四。安仁孝若。尊風賞流。惟袁鳳翔。實勤大猷。才克禦亂。子房最優。尸祝奉嘗。春社秋媵。式諮雅範。願企前修。述循政傳第一。

肩道援溺。嗟許與何。銀管可鏤。白圭不磨。藹藹粉榆。子子蓬麻。百步懷香。十室忠信。幽燬具昭。植躬宜峻。述先賢傳第二。

孝爲文本。義乃穆行。所居心化。如響斯應。沁水之陽。獨楓之里。實產丁郭。肫肫素履。幽顯能格。百世奮起。述孝義傳第三。

志膽在躬。天地改色。齋命蹈義。若饑就食。習珍登陴。易雄馳檄。一節慷慨。百代廉立。述忠節傳第四。霜條空谷。貞禽不擾。士有遐心。蟄居塵表。名隨迹削。氣爲身寶。羣驚羽人。野王二老。述隱逸傳第五。

運期遠游。文若避地。樂土可遷。是焉僑寄。述流寓傳第六。

技進乎道。貴爲世用。棘猴恥織。木鳶徒控。甘石俞跗。精傳孰貽。機神獨蘊。遂炫魁畸。述藝術傳第七。
中闕之操。達於紫閣。冰井夜朗。漆帷晝昏。孤鷗翔雲。女貞在原。過閭則軾。有祀必騰。述列女傳第八。
鹿野勝囚。龍嶠靈族。俱空萬有。自守真獨。太行石髓。挹之盈掬。元鑰可探。塵跡誰屬。述釋老傳第九。
析謏聞。麗簡末。列宄行。寓屏黜。述志餘第十。

藝文胥該。典物差究。民生勤窳。山澤延袤。實事求是。闡徽章舊。懲勸必詳。考見或囿。大雅嗣音。匡厥譴陋。述敘傳第十一。

武陟縣志敘錄代作

夫郡邑之籍乎志乘者。所以端臬疆索。臚析川原。闡人事之紀。究土物之宜。昭俊民之行。網遺逸之聞。使咸秩而弗晦。以範居人之性。而通其情。其稽往證來。則與信史相爲表綴。故懼其誦訓之失職也。則有私家之述載。又恐其謾衍軼矩也。故司牧者及時修輯。以仰承夫令甲。然而不得其人。使宄贅渙。同於胥吏之籍。爲學士大夫之所棄。蕪散既久。而文獻寢亡。於是嫩惡無所徵。政教無所塾。如幽夜而去其燭火之明。芻芻忒忒。卽於荒殆。是可感也。武陟之志始於明李日茂。其書已佚。國朝康熙二十九年。邑令甘國垓修之。擇焉不精。語焉不詳。再修於乾隆二十一年。邑令查開。秉筆未竟。繼其職者王靖始續成之。簡核頗當。惜板冊皆廢。今存者獨甘志耳。蒙也以閭閻陋才。受糈斯邑。亟求舊章。庶有師程。旣弗副於厥懷。慙

備以慄。乃詢耆碩之士。博採於鄉。歲野諺。覈其見聞。汰其異說。以授簡於友人。方君履錢。精志刪採。再葺而成。凡得書三十六卷。有圖有表。有志有傳。而冠之以聖製。聖製篇者。顯慶雲之鴻藻。敷睿治之丕烈。煦諭元元。使處於葑屋之下。得諗覆幬之穹厚。燭如九陽。潤如時霖。靡幽不屆。靡生不育。小臣雖無載筆之職。而樂與一邑黎首。渥斯寵榮。是以鼓舞。亶陳於首章也。圖之目十。有縣境圖。有沁河圖。有丹河圖。有縣城圖。有里鎮圖。有公署圖。有學宮圖。有書院圖。有武廟圖。有嘉應觀圖。表之目三。有紀事沿革表。有職官表。有選舉表。志之目十五。有疆域志。有山川志。有風俗志。有物產志。有祥異志。有田賦志。有河防志。有建置志。有學校志。有祠祀志。有兵防志。有古蹟志。有經籍志。有碑碣志。有文詞志。傳之目十一。有名宦傳。有先賢傳。有耆舊傳。有孝友傳。有義行傳。有忠節傳。有隱逸傳。有流寓傳。有藝術傳。有列女傳。有釋道傳。凡諸圖者。規畫區域。模列畛畦。陵麓不易其方。郭郭不愆其度。因近以綴遠。託小以著大。綺錯星離。舒指布掌。受政之位形焉。侑神之宮象焉。使人守迹周覽。如鑒於澄水。而無漠愒之患。入其疆。則知四陬之延袤。遊其都。則知衢舍之偕向。登其庭。則知簿領進退之所由。賓僚宴息之所處。若是者。皆得之於寸簡。而不差夫毫黍者也。是放準循繩。而無不當者也。紀事沿革表者。所以鏡往紀之治亂。辨封圻之析合。惟昔覃懷。以領州治。既遷既剖。乃爲屬邑。安昌更於隋。武陟肇於唐。端緒以明。繁鉅不遺。比於史公之年表。而千載可稽也。綱舉條繁。畢見於是矣。職官表者。所以溯設職之初。典城佐治。各有攸責。居位之久暫。考最之黜陟。序厥爵里。而采善鉏醜之意寓焉。夫駿蹇在櫪。羈勒無以殊。松栲植野。菀枯無以異。知其材用。則淑

隱彰矣。故名之所存。實亦不能掩也。選舉表者。秀孝充賦之士。出爲時楨。居爲民表。惟三適之選。以貢於王廷。而茅茹之升。光於厥邦。自漢晉徵辟。唐宋科目。求賢之典。至我朝而克備。士有去與深而釋蹻者。其綴於是篇也。其彩爛然。若編貝矣。疆域志者。緝贏縮之壤。條衝塞之術。明比閭之法。聯里鄙之情。申望助之義。保唇齒之固。使夫萬家之邑。如就平準。而左撫右藉。不待下堂。而緝然莫紊者也。山川志者。舉其巖陔。甌錡之阜。鴻川滔漾之津。足以興雲雨。潤土膏。不童而用贍。不弊而養足者。究其支絡。通其源注。使人企焉挹焉。而知燥溼之宜。崇庳之數。不可惑以軌。不可隄以險也。風俗志者。考方辨名。端好祛惡。類民物之思。攬習尙之糅。務卽於聖道同風。而化其佻陋。厥有禮節奢儉之不齊者。循迹以書。且繫夫規誠之說。所以使人守樸補偏。而求隳括之益也。物產志者。所以覘寒燠之化。無形也。礪陋之植。相躋也。灌漑之滋。異長也。勤惰之農。殊穫也。布三務。序五種。君子諮於耒民。而能督教之。使先本而後末。賤貨而貴穀。至於珍藥之彙。茜菘之采。則以待四方之求焉。祥異志者。所以占五行之變。陳六沴之警。日星薄蝕。陵谷震盪。之咎。霜雹水旱。蝗蝻疾疫之災。是豈區區一同政令之所招弭。而眚戾所至。民命是繫。防患於微。宜慎思也。若夫室有鯢齒之老。陸有連穗之穎。嘉徵迪和。以瑞盛世。此尤不可略也。田賦志者。所以定則壤之經。析鍾釜之祿。春斂其庸。秋稅其畝。丁戶有籍。蠲恤有記。使民知耕鑿之樂。以效輸將之事。而沐仁澤於無涯也。使司勸課者。知勤以約之。勿有所逋責。以虧夫正供也。河防志者。前瞰大河。中澈沁水。流潦之環。形如埒邱。是在樹板分崖。密榘填淤。使隄有金石之堅。防無絲縷之罅。則腴田辭於瀉鹵。而黔首於以永謐。

也。明使之籌察。廟堂之碩畫。時廡於斯。況小宰之案行渠瀆。而敢忘夫澹菑之備乎。建置志者。垣墉與壇。境虔庠黌。設寺舍。備倉庾。啓杠梁。鞏命於司里。載葺載治。役三時而不害。作百堵而忘勞。蓋莅民陳教之次。尚乎整飭。而貲費固仰給於水衡也。以律乎斯邑。則湫隘廢闕之待新者。實繁且鉅矣。昔所措置。猶可得而詳也。學校志者。所以甄雋敏之材。使游詠於禮樂之庭。而範圍其逸志也。所以昭先聖之矩矱。闡四科之緒。以鑄陶天下。而納之於軌物也。所以贊時邕而隆文治。使有司得奉典禮。登降獻酢。佾舞雅歌。而奮興於鳧藻之化也。其棖桷之儀有所考。而干籥之事有所守也。祠祀志者。祈報之誠也。土發而社。納播而蒸。所以享先農也。釋奠釋菜。所爲敬先師也。賡縣浮沈。所以禱山川也。禮曰。失其義。陳其數。祝史之事也。故其數可陳也。其義難知也。俎豆犧醴黍醴。祝帛之數畢陳。而涓潔以思祭義。則存乎其人也。兵防志者。國家文武之制。以相鈐衛。郡縣之內。皆有戎政。下至亭墩。咸置卒伍。以望伺非常。察詰奸宄。上下統攝。威令自行。主客相倚。呼警罔怠。此雖用武之國。而恬熙已久。鳴鏑不開。遂若守禦之爲虛置也。然而奮銳訓練之不可一日忘也。古蹟志者。所以寄幽情於巖壑。蕩逸襟於池榭。問巨源之故里。訪子期之遺蹤。竹徑流連。沁園憑弔。至於梵隱祇洹。金庭丹室。客化鶴而未歸。鉢繞龍而應召。皆可追述遐風。聿傳名勝也。經籍志者。同傳元四部之論。擬班氏藝文之志。虛牟往哲。摺撫綿緇。條其篇目。撮其指意。雖一家之說。雜流之言。皆有取焉。所以使人博聞釋疑。抱殘守闕。求瓌璋之祕文。毋弁髦於緒論也。碑碣志者。搜采銘記之垂於貞珉者。以觀古人之遺跡。大者足以補史乘之漏。其斷石零墨。亦可徵軼事。表芳躅。昔人撰錄中州

金石茲邑獨鮮。故爲之別。蘇扶沙。以僅存其一二也。文詞志者。綜毫翰之洪輝。導英辭之緝旨。揚風醜流。殺仁服義。扞景物。詮品藻。然文豔而用寡者。猶多從乎逸篇。必也彰瘡有倫。典實所寄。擇其言之尤雅。使人知植德修辭之兼尚。則庶乎其可也。名宦傳者。爲夫墨綬之長。舉其良師也。蘊貞敏之性。識寬猛之宜。去其蠹而授之衽。解其劍而帶之笏。以儒化愿。以威克暴。不必遵古循茂之轍。而蚩蚩昔心。一首載。斯亦足以全功成名矣。先賢傳者。鴻儒偉德。生必問世。含山澤之淳英。標流俗之絕軌。昭於青簡。延於葉語。使人低徊瞻慕。懷景行而有願於執鞭也。餘風緒論之不泯者。必其鄉人始能詳之。或將有補斯編也。耆舊傳者。矩領方聞。束修厥躬。言則成文。動則成德。在邦家而必達。守壇宇而不移。使潔志者有所宗。躋馳者有所畏。在昔欽賢之長。所爲表通德之門。配縣社之食也。泐雅操於勿諼。而軾閭之敬申焉矣。孝友傳者。樹訓之本。必先於門庭。苟能無違色養。克恭天顯。殫洗腆之誠。敦角弓之誡。至和旣格。百行斯融。自使鸞陵之氣不興。肫厚之風日萃。其人在阡陌之上。而貴逾於魏闕之下。金管所述。斯其首乎。義行傳者。子思子之言曰。修善欲人知之譽之。是爲善有勸也。人莫知而受毀。此所不願而不可避者也。若夫滋滋爲善。而曰不欲人知。恐人之譽己者。非虛則愚也。及於後世賢知之過。律人以爲善而晦其名。是過夫趨義之心也。故兢兢於一端之懿行。由閭史以達其名。所以教任恤也。忠節傳者。當隆汗遞嬗之運。處疆場爭鬪之會。奮身以衛衆。糜骨而不悔。是可以與斯土共永者也。吾閱唐書而得一人焉。附以近世俠烈之士。以增舊乘之漏。隱逸傳者。嘉遯自放。不因世爲推移。彼實憚仕進之栖屑。慕林谷之恬和。默聲聞以養天倪。

所處不必幽邃。而脩然自遠者也。誠明其意。則可以消悔吝之衷。箴榮勢之汨。使人有安貧樂道。守志不辱之概。宏風教者所當重也。流寓傳者。聞莊舄之越吟。逢梁鴻於客廡。故都之懷已渺。遠游之樂自永。豈必擁腫與居。軼掌爲役。而後見畏壘大穰乎。是可援僑郡之篇。使人不忘其本也。藝術傳者。九九之技進。而桓公築臺。偃師之巧呈。而穆王虛乘。故曰人之無所能者。不能與之處也。至於蠡卜筮。箴風角鳥言。及處方決脈之良。皆有軼才精慮。以濟世用。其震名於一方也明矣。列女傳者。所以濯閨闈之仁。區風烈之嫩。女德所尙。固非一端。所謂哲婦隆家人之道。賢母篤義方之誨。皆足以煒管彤。隆世典。而柏舟之操。古所希觀。今則繩樞單婦。咸恥更適。非禮教修明之時。曷克臻此。所宜亟爲闡揚也。釋道傳者。其人率以遺得喪。一死生爲卓行。不謀世之稱耀。而好奇者。每喜舉其跡。以相詫說。中代國書。亦不廢焉。豈非空有兼遺。亦足以使人清心釋累乎。著此以見道之廣也。蓋欲察方員周而之象。藪澤經緯之詳。非圖無以瞭焉。欲稽世會屯亨之運。官常造士之階。非表無以差焉。欲知名物簿會之數。法度簡密之原。非志無以釋焉。欲聞黎彥姱節之芬。潔衷修能之履。非傳無以哀焉。四者既具。而復糾之以志餘。志餘者。所以補其不逮。充之以鴻衍之文。博而綜之。雖奇而不背於經。亦可以參互考覈焉。猶侏儒構榱之材。皆公輸之所取也。然後宣其要蹟。總其紀綱。引而伸之。不避複沓。以自明其意。使後之莅此者。求先典而秩如。激庶績而允釐。存者勿虧。來者可續。奠麗陳教。以飭民和。使百務條通而輻輳。如百川之貫於江河。無不滲漉。是則盡詩人周爰之善。游愚者發思之益。乃爲敘略一篇。以概夫三十六卷之杪焉。嗟乎。武陟之爲邑。千有餘載。

其典章謔訓之就湮者。不知凡幾。今乃因陋就簡。泐成此編。文不敢慕夫高潔也。惟求其賅博。辭不敢尙夫華縟也。惟取其徵信。事不敢專企夫雅峻也。惟重其足以敦勵浮俗。爰乃蘇援衆務。窮道本末。後有曠才哲士。知言之選。必能實事求是。以救余之疎舛。是所深幸也。夫服劍者。期於銛利。而不期於墨陽。莫邪。鼓琴者。期於鳴廉修瑩。而不期於濫脇號鍾。則余雖未能習是勝非。文質相副。亦諒其典實所存。出於研摩綜括。不以近而忽之也。

謁紫虛元君文

蓋聞雲軒甲帳。花氣掩乎幽峯。月戶庚郵。玉光通乎清靈。登芙蓉之嶽。初聽鸞音。入檉柏之巖。如逢鶴翼。惟神沈珠曜質。靈鏡澤胸。託體宅相之闈。應跡令君之宇。玉蘭仙媛。實平子之所生。太華神姑。爲貳師之良匹。遂乃資承丹錄。咀咏白琅。香嬰滿闕。羽姬下而相迎。笈帙啓堂。安妃來而徐步。樓中黛影。猶對青琴。匣裏素絲。微吟碧柝。抒九元之逸度。躡五辰之祕光。霈惠福於羣生。寫遺徽於孤麓。維茲沐澗。分派行山。林藿絲濛。巒波隱複。玉梁未駕。卽是真虛之宮。練石橫開。已見純青之字。風關歷歷。地隔三塵。霧縠蕭蕭。天留一綫。陳其錦褉。事宮霧照之媿。挹彼紫漿。西極婉姘之后。莫不欣覘妙構。假號洞冥。昭煒灼之清暉。駐儀璘之貞旆。危峰標韻。寒淙效深。庶有徵焉。豈其爽也。猥以糠粃下士。趨趯行尸。山陽聞笛。棲泊經年。洛浦浮煙。眷懷靡已。將欲牽翠薜。叩丹扃。澣濯塵容。憑陵秀巘。恭聞馨烈。實感恐誠。來過聖女之祠。欲奏通天之表。客非鄧郁。降瑤鶴以何時。室異蔡經。望明蚪之徒遠。雖人間長史。難授交梨。而太極僊侯。或傳

鍊桂。毋使鳴湍怒碣。截谷口之轅。飛轂嚴鷗。杜曲椒之屐。則鏐虹寶典。格夢寐而非遙。姑射冰姿。儻髣髴其可視。仰遲頽闕。俯鑒元文。

瑞麥頌并序

維道光四年。龍角耀彩。屬耒修職。河洛膏衍。澤陽罔魯。周袤千里。薏稜豐熾。三葉旣墮。百日待舖。稚罇耆銑。雲刈風緯。迺於野王之壤。覩兩歧之穎。五出之穗。石民羣迪。載懽載訝。歆之以首。擗之以絺。迺然歸美於其長。河內邑宰袁君蘭村君。以奕世名德。雋逸涵雅。蕞於從政。有阿鄭之化。迅於疏闕。達樊惠之渠。視事而歲。訟平人愉。爰致斯美。君竦抑而弗敢膺也。且曰。今天子運神鈞。布德象。稟印太和。誘納淳化。寶連平露之華。繁於囿。文騶吉黃之足。擾於原。而寰瀛庶隸。體聖沖虛。狎視爲恆。弗遑薦瑞。宸辰睠思。惟勤隴稼。精擇賢帥。惠收蒸元。故太儀篤祐。降殖嘉禾。以佐帝仁。飫民大澤。予小臣曷敢以壅。俾不上宣。乃盛以繡笥。屬其友方履錢。作啓一章。陳之長吏。請聞於朝。謹攷孝經援神契曰。王者德下至地。則嘉禾生。瑞應圖曰。瑞麥者。五穀之長。盛德之精也。生豫州中和之域。於以彰湛恩。漸被之隆。軼古震今。符於圖牒。昭鑠如此。昔鄭康成爲獻嘉禾者。代作表狀。又著頌一篇。履錢雖無北海之宏文。喜見漁陽之休應。竊願祖述醇儒。擬爲賦頌焉。辭曰。

聖皇承翼。提挈陰陽。時霖甘露。延美大光。靡騰不祛。靡秀不揚。凝旒兢業。晷隙無忘。銑瑤盈谷。帝曰非珍。寢興勞佇。實惟良臣。虬鸞應籙。帝命勿陳。寤言永懷。適在稷穎。蹇蹇碩輔。朱軒四馬。周咨鱗隰。底衛之野。

農舞夾穀。迓於桑社。我有神君。惠以天暇。鷓旦朝雛。穎粟含滋。芬馨橫逸。精曜紛披。畝逾一鍾。廩蓄萬黍。觀厥嘉質。合榦分歧。纍纍綻珠。離離垂綬。北里遜英。東土辭茂。禋祥斯孕。滲漉所覆。將登殿宇。可歆籩豆。良苗之植。天祚帝德。帝德如天。承在百辟。斷斷小宰。化理攸責。誘民孔易。如膚依岷。繫此河內。舊稱沃區。克享豐稔。循政早敷。禎采下答。選蔭一隅。寵秩優加。炳煥彰符。守榮以虛。保樂惟儉。古重蓋藏。思均盈歉。勿以歲成。遂令穀賤。儒吏勸警。逸風斯變。郁哉盛代。微卉懷仁。矧予烈士。餐挹清淳。讚述明良。纂組小文。規頌相成。敢告倉人。

天甯寺重修九蓮閣記

蓋自法蘭西邁。陳紉馬之儀。利利東皈。布青螺之教。摩尼慧影。雖照窮於濁水。祇樹勝域。實曜等於化城。但以空有難消。機寂莫悟。登葉之妙安求。鐵鏘之怖斯甚。五誠十力。必累劫而始通。六趣七橫。或崇飾而可造。是故天金天銀之闕。鐸語相聞。風輪火輪之界。幡枝密建。豈非能仁之廣筏。足濟浮囊。真諦之幽棲。卽爲醒境者哉。常州天甯寺者。菴羅舊苑。堅固貞林。溯創置於千齡。紀營修於歷禩。珍臺煥霄。擬天竺雞頭之刹。元堦駕空。如耆闍雕鷲之窟。婆樓蒂下。甘露潛生。律提鳥身。香花自洗。近五都之市。靜若穹巖。接四誓之衆。廣同梵海。企瑞相於飛雲。肅慈範於珂雪。珠裝帝釋。金杵神王。咸駐脂那。俱爲莊妙。洵使一瞻一禮。喜萬累之冰消。一讚一稱。見羣魔之霧捲。非止五官擅三絕之祕。陽水繞七級之巖。銑盤炫日。卽號神功。石鉢藏花。共傳仙穴而已也。其中之崇檐疊構。阿闍相承。桂廡森櫺。松楹竅窳。環以禪棲之室。輔以

講誦之堂。蓋數闔而焉窮。亦按圖而未究。若夫隱旃檀之座。譬忉利之宮。琉璃復起。銀龕俯臨。足以焜耀於此寺者。則又有九蓮閣焉。先是明宣德間。有沙門淨因。振錫來茲。感鵲尾之香煙。識槃鷗之石址。繁芳既薤。精舍肇闢。首建一樓。名以塵外。攝心於華藏之表。標指於高座之上。無假銅梁。非求綺綴。既而陰焰潛然。梨車示滅。復有文壁禪師。秉智燭之明。照寒灰之翳。勤資羣力。克還舊觀。至我朝順治之元。王塗載綱。法輪易轉。時惟香雪潤公。度水杯輕。插枝地狹。毗羅侍壁。億國獻檀。乃治煙增彩。更兆嘉名。雙峨之美。迄今遂閱百六十有餘載矣。鶴息留丹。虹飛疊翠。替辰聞於一同。曇摩馨乎四果。餘坵整啓。舍利珠垂。琅簡遠來。楞迦雲護。夏石則行僧膜首。映幢則輓粟爭供。登越城者。方覘異氣。棲魚山者。似聆聖音。然而亭亭芝幹。產斗拱而未凋。彤彤蓮葉。奉寶龕而將謝。蛸衣側胃於流蘇。鴿侶徑巢於罽網。金輝玉粹。八彩九苞。紫蘂初封。黠塵肆暈。莫不憫危棟之就裂。歎前修之誰嗣。緇素軫慮。頽仰彌嗟。今之首座恆瓊上人。粵東南海人也。具逸翮於夙生。礪銳衷於捨欲。出四門而慙行。廁鑒三惑而晒畫瓶。阿練之戒。轍精純。法秀之羣。經博貫。洞神荒蹟。超相香城。久雄法鼓之筵。屢冠重雲之講。屈知寺任。已逾十臘。顯芬馥若苾芻。譯荃微於萬孔。名流王范。挹敬風猷。同時支許。爭傳譚議。遂乃虔敷願海。宏設導師。餐減伊蒲。施餘磨勒。冀西林之誓。松化爲楠。欣沙伏之緣。珠能滿鏡。經始於道光甲申仲秋。至丙戌之春。厥功始竟。閣既就新。又壤其隙地。築樓十楹。及大悲閣。法界堂各三楹。偉哉。機以冥通。匠由神運。地肥默聳。天眷虛擎。金碧爲幟。淨業之勝。以生。鐵蓋成籬。大施之會。丕著。雖使林微尼園。昭四八之瑞。畢利父樹。展十種之光。青鸞立諦。

之林。白虎共居之所。未足喻斯無漏。例彼福因。夫文者道之寄也。言者理之筌也。故真丹訓則聲藻震中。品義宣則事靈梵表。滄瀆之浮維衛。爰泐穹珉。天水之頌佛龜。乃垂竹素。況功崇乎雀雝。敏儕乎印手。攬上郡之真游。補招提之妙迹。不有纂述。曷昭來許。錢也。學未綜夫十地。辨遑析於三乘。寶階立柱。親證師鳴。明鏡非臺。何勞蟲篆。屬當誣諉。聊識波旬。庶幾彥和銘像。不黏外道之竊。源賀投辭。堪作祇洹之偈。

呂子楸誄并序

呂子成懋者。余妻之姪也。字子楸。常州府學生。年始十九。以道光五年七月卒。幼稟瑰質。劬經不息。侍太邱於廨庭。有長文之佳譽。致歡恪勤。應機捷麗。駒齒未落。蛾術已富。乃偕諸兄。歸應夔選。英志暫伸。篤疴遽遭。摧厥弱挺。靡拯靡植。嗚呼哀哉。余以肺附之誼。異子於孩抱之日。外舅常笑謂余曰。試觀諸孫。孰爲穎秀。余以黃中之美。獨鍾斯人。撫其首以告曰。此佳器也。足以酬清德矣。相遠彌年。而妙才日闡。且時錄其篇章。薦余於千里之外。藻彩芬逸。嘉其有成。自詡公榮。知人之明。期以虛誕。同仕之雅。嗚呼。又安知子之戢華不曜也。子之姑曰。吾父宦海昌。其公舍鄰陽侯之宮。棟宇宏敞。像設嚴偉。姪未病時。輒夢羣神。招之舉酬賦詩。終夕乃退。又忽喜與諸昆季分席而坐。咄咄自語。或伸紙疾書。不令人見。詢之不答。又數自言。今歲必死。異哉。理旣通夫元冥。讖亦符乎知命。豈非青精童子。生有前因。蒼水使者。藏其慧魄。戴洋授籙。逾五日而不歸。周總宴游。諗數月之將屆乎。何以竟委茲叡質。而徒洽彼靈修也耶。逝者焉覲。愴兮奈何。乃誄之曰。

營邱之枿。實有淑姿。守性安雅。茹文蒼奇。稚髻克振。擢秀靈枝。孝恭匪誨。博悟匪師。奕奕大父。循風希古。州郡宣猷。海濱卽敍。仲子維賢。鍾美能輔。迺毓此才。允集休祐。羣從森起。或通或愿。子處其中。霞舉雲煥。黃琬雅對。張憑謫諫。貽厥之愛。粵鍾英幹。玉期善價。學企修名。鄉邑造士。子蜚厥聲。角巾初綰。鍼艾已呈。愈跼在室。診至莫營。玉樹湮埋。痛何能已。愴心啜泣。曰。怙與恃。於邑升堂。敬慰暮齒。悽悽重親。亦旣傷止。疇昔之歲。納采宏農。大義未申。卒遘閔凶。貞媛自誓。易經毀容。願謁喪廬。明此潔衷。幽咽寒泉。沈飄載揚。是繡是黼。將翺將翔。翳子淵朗。忍呼以殤。死耦秉操。撫嗣宜昌。婚媾之雅。婉孌初見。負劍相詔。披帙忘倦。視子猶父。中情益眷。稱以家寶。許爲時彥。嗟我勞人。久辭故閭。惠簡遠存。雄文起予。欣瞻特達。含芳勿渝。豈謂清神。驟匿荒墟。古人有言。道惟恍惚。壽爲欺魄。天爲曩歿。成寐遽覺。達觀則一。修促旣齊。顯晦胡別。之子倏儻。燭陰倏幽。生理先窮。真氣與游。神人合契。擬昔蔣侯。禺繇夜召。雲旂翠旂。塵域紛縉。往矣勿顧。生者襄悲。歲月馳驚。惜子令聞。思子雅度。託之繁豪。以永終譽。嗚呼哀哉。

史孝子贊并序

史君印曾。字綬紫。溧陽人。父汝杰。山西潞安府同知。母謝氏。在蒙色柔。體敬執玉。侍宦效季英之絜。宗親揚叔異之稱。年二十二。母遭疾疢。夙夜勤養。久廢餐寐。帶環自弛。寢闕不遠。求紫石而悸心。禱瓶花而雨涕。蓋已羸瘠忘乎厥躬。憂慕喪其神守矣。圓穹昧誠。慈靈驟蟄。搏顛飲血。形隨聲漸。升屋三號。退而隕絕。宗懷踣地。烏欲唁而未甦。崔約植杖。風始吹而卽倒。融融之樂。竟及於重泉。哀哀之詠。莫延於一息。恆星

爲之匿光。陽曦爲之易晦。淳情凝至。固如是乎。噫。爲人子者。感枯魚之銜索。怨駒陰之不留。天遠難呼。身代末由。使得委生殉亡。長侍壞室。斯亦鮮民之至願也。人道之窮。禮以厭之。毀不滅性。聖人愴乎其言之矣。若孝子者。瘁力於親瘵之時。悼心於閔凶之日。孱焉弱植。酷痛以摧。雖欲勝喪。豈暇念哉。命之不延。則百身之莫贖也。乃作贊曰。

濟濟春氣。孝德是充。洞業儲靈。毓於价宗。依倚庭闈。若將畢世。一旦失圖。裂衷永逝。齊民奔恤。長號氣折。坦之殞生。九祭未設。死孝可矜。逾乎昔賢。哀情崩決。如彼逝川。林秀異卉。波躍神魚。至行上格。百福所都。守白勿渝。茹丹勿悔。休烈播遐。永言錫類。

許烈婦贊并序

烈婦姓趙氏。江蘇婁縣人。詔儀祿采。淑令應圖。四典是究。七族咸譽。年二十一。歸同邑許惺之。修季蘭之操。釋京陵之矩。薦玉筐以柔桑。施瑤袞於繡葛。婉孌上堂。溫恭奉案。至於明鏡贈離。璇文寄遠。扇掩合歡。琴鳴斷軫。未嘗不勸樂羊之勤學。述大家之女誡。櫛縫旦修。饋醢夕治。矯敏之行。疎戚稱焉。薄祜卒遭。良偶見捐。白日西頽。商飈遐激。兩髦之誓。九天所聞。同穴之期。百年非促。庭幃侍養。有季息之可憑。形影子立。無遺孤之待哺。於是僭結自傷。從容告殉。事異韓樹總幕。牽以忘生。貞若荀采粉書。成而不迫。遂以道光六年某月日。就經於殯宮。距夫之亡。僅四十有九日也。未逝之初。厥衷夙勵。哀愉在色。朕兆已著。威姑拊心以曲導。閨侶攝蹤而罔懈。始則削哀弛防。繼乃蹈暇致命。確乎之志。終莫能奪。豈非誕正。濯靈濯懷。

霜雪凌暉禮宗超軌貞義足以彰丹青之飾致邑祀之騰者哉式企芳烈欽悼難紓爲之贊曰
趙有名媛刺笄返眞洪胄千葉克嗣令聞煜煜高行雲間播芬合禱於許端操曠倫命兮邈屯君子不祿
哀嚙中肝禮絕夜哭黃墟同游碧血如沐儼重邱山豈均溝瀆幽谷勁松霜濤自鳴宏綱既植眇躬匪輕
心皎日月氣挾雷霆秉順安常遺慮死生提提繡黼慄慄冰瑩彙彼管彤濇茲峻節皇鑒寒蕤王綸闡迹
煒哉煒哉榮賁壤室

重刊法苑珠林序代作

式仰駿迎首崇調御青蓮煥相之辰紫山寄莊之始髣湧百寶睫照四天吉祥之瓶廣納赤宙知慧之藥
俯接黔毗莫不因妙以立覺藉寂而探機設教止乎一慈建諦俟其頓悟上行所屆微言已伸復以三界
昏寢六賊攀緣鼠入角而焉通狼守齋而易毀於是轉意珠之朗揚慈水之瀾吐奧旨以拔迷根積雕談
而搯險樹芬逾薜葡夢發優曇雖四十九齡未拈般若之義而三十二士各示依趣之階無說無聞天花
早墮非堅非久蠟印自傳白馬創剎羽林之使初歸神龜肇年洛陽之求益備乃使九乘大典西辭乎流
沙八梵唄音東詹乎震旦自迦葉口誦之文菩薩淨行之品觀驪龍而豎指逢饑虎以施身請雨有經移
山著論至於辨意長者成貝字之篇善思童子效琅函之誥咸敷精業婉迪羣蒙加以前皇繡展喜闡勝
因儒生綺毫樂爲釋用梁帝重雲之講旣耀南區姚氏草堂之集實隆北學曇柯之所宣譯羅什之所發
明彥和燔髮編定林之經藏小山潔願獲開善之香匳由是綈裘繁臻金繩密約莊情束影之詞啓繆開

寶之制。足以躐靈飛之綠檢。抗聖籍之丹籤。列棟連甍。浮煙散竹。語夫博涉。從事斯難。索彼菁華。憤徒莫憶。乃有沙門釋道世者。植蹤唐代。應詔西明。學通內外。詣合教宗。擬彌天之道安。爲方袍之平叔。愍夫真如易晦。法匠難遭。遂乃綜覽義林。穴穿奧蹟。舉其綱紐。明其指歸。闢八藏之鍵。挈一裘之領。大乘小乘之別。幽顯俱詳。語業意業之關。源流可溯。如酥就熟。億轉不凝。如水散泡。千沫共見。百篇之目。旣析。四禪之用。皆純。若其敬攝旃檀。聿宣慧炬。日精入口。住白淨之宮。月愛舒光。孕青霄之座。鐵豬受矢。玉象扶輪。獨守心王。不離智食。富樓那之姓氏。標若星躔。波頭摩之劫壽。羅於紋掌。欲使維衛威神。感而卽應。尼乾邪計。望而輒摧。此則僧祇之本律。亦讚述之願海也。因以湔濯塵冥。解脫頑固。七珍勤表。五濁泛陳。以蓮舌爲振鐸。以紺素爲長桴。汲汲苦言。悵悵淒韻。逆風蕤熾。懲導慾之心。行廁畫瓶。泯惜身之念。四虵引於鼻耳。二鼠逼於腎腸。凡諸怖畏。足起信心。倘使鉢露能濡。自無酸醅。幡雲獲蔭。豈遇瘡煨。敲骨剔髓之誠。濟生非恡。掬土雇花之細。得報靡窮。巨障裂而空明生。深痾蠲而凡刼盡。此猶禦寒之設。諾拯渴之蘇。陀福利之階。斯爲最要。至若曲辨情靈。富該圖史。緝英彬蔚。麗篆紛綸。事多集於佚文。語每秀於天拔。鵲園異跡。香散驚精。馬苑餘輝。華飛纓絡。求黃縑於安慧。神漢浮來。夢白服於曇延。夜光照徹。與公銘頌。遜此芳塵。休文碑狀。愧其妍製。多聞親授。阿難爲之展輪。摠持強記。摩詰於焉避席。信可以梯航衆品。肴覈橫書。獵藻者珍比青箱。饋貧者非徒黑學。宜其千禩不刊。三教傳錄者也。世所行舊。槧本曾經。明人竄改。妄增百卷。爲百二十卷。以致簡葉違錯。文義晦離。點畫之間。更多脫誤。邢子才之一適。非可例觀。賈慧遠之五

論難期開合。披卷尋覽。能勿慨然。清信女士董昭。虞山蔣大令伯生之篋室也。生善女天。號仙人子。珉膏
飮齒。石黛修蛾。悅意馳稱。妙音作眷。懸金九十日。爭譽便娟。載車五百九。皆名歡喜。琉璃硯匣。不犯綺詞。
迷迭薰爐。潛持密教。因以梵夾。校證此書。始知今本之訛。迥非前人之失。丹鉛既久。緇論悉明。過發宏心。
謀資衆悅。同時名閨淑儀。大善知識。咸分華鬢。襄助錢梨。共得百人。費凡千鎰。募勒情密。考析澄嚴。曾未
卅歲。鐫訂訖功。福暨衆生。美冠諸蘊。阿育建塔。受夙世之慈緣。瞿夷獻花。遶閻浮之良匹。寶髻尊宿之前。
六門開示。優婆塞夷之侶。四諦顯揚。竟令佉樓半字。易旁行倒住之風。珠蘂全勝。播辨物類名之訓。成一
切種智。爲三界導師。具此淨因。超於戒垢。天銀闕下。鶴女無遇辜之經。水香園中。鹿母迎善見之律。十重
緹褶。偕慧日而齊暉。五色霞牋。垂法濤而愈永。興言褒讚。聊紱毗尼。心塵未離。空懷彤管。身田被潤。欲丐
青苔。雖來旨之勉酬。慙覺緣之終蔽。

東湖縣知縣洪祐甫碑

曰。清有直臣。編修洪北江先生。勤攬上操。根道核藝。端誼正辭。播烈中甸。載育元嗣。蹈騰餘蹤。綜述文猷。
惇宣雅行。於時承學景附之士。僉謂蓮勺經訓。仲師兼通。司隸風義。文泉益振。則惟我友東湖君。實膺其
譽焉。君諱飴孫。字孟慈。一字祐甫。先世爲宏氏。避唐孝敬皇帝諱。易姓曰洪。諫議大夫經綸。奠居於歙。遂
爲茂族。三十六傳。復遷陽湖。至北江先生。以僑籍通顯。故君遂爲陽湖人也。稟玉燭之真采。體蘭石之自
然。鬣鬚廣誦。闕幘砥躬。娛志重親。有子珪之篤。曜業都講。有君魚之敏。名理探乎九師。交贊迪於八顧。矜

氣翹節蓄縮是僧。堅中抱樸。櫛極弗尙。旣乃揚英西豪。侍游東觀。佐人倫之鑒。預元言之奧。斥中壘經術之殊。無子順異同之論。俊髦納履。君挹其奇。典冊盈案。君釋其緒。於是鴻辭鑠於藻林。脩名徹於京國。大小章句。學者所定。精良綜事。家督克任。爰值先公。卓建讜議。入繫請室。出戍伊吾。精誠動天。召歸田里。君徒跣求援。崎嶇奉母。殫心顛沛之辰。以盡溫恭之職。家難獲紓。頤親誨弟。初舉孝廉。疊應貢計。遭喪骨立。勺漿廢旬。陳紀服除而消瘠。崔實竭貲而營隴。世篤至行。閭鄙慕焉。給札史館。考績奏名。選授湖北東湖縣知縣。班條申信。削記厲威。宣六陽之仁。軫九金之肅。邑有豪猾。蠹虐積稔。君刊厥飲章。報以重比。伍士弗輯。壤我市旅。君執仆於堦。以徹其長。彊衙旣抑。清修載綏。開校舍。甄秀艾。期月未臻。功化以就。伐枳棘。而見頌毓嘉禾。以薦瑞。謂受介祐。將爲國表。陽鳥巢門。景命告謝。以嘉慶二十一年七月。卒於官舍。釋耒下機。奔走厥角。束君之澤。空歌長生。郊令之仁。悲纏服義。德優齒靳。愴兮何極。君深明訓故。尤邃史學。嘗謂扶風以降。志表多缺。汎覽廣輯。次第纂補。已成之編。二十餘卷。藁所未竟。不啻倍之。詩文遺集。又及十卷。嗚呼。君之享年。僅四十有四。而逸軌盛業。淵乎莫尙。若此之懿。豈非桓彬擅過人之姿。周乘真治國之器哉。士友聞悼。遐邇失聲。喆侶遽摧。曷以展抱。君之諸弟。追感慈恤。仲氏能文。敬述楷範。因相與刊立元石。陳於隧左。思闕令聞。俾燿後昆。嗟祿命之不融。庶儒修之永劭。銘曰。

啓胃惟宏。改因時諱。諫議冊葉。世德罔墜。挺生偉賢。伉志匪躬。崇廕紹休。克孝克恭。名父之子。經明行修。六藝貫洽。四史研蒐。祕義丕析。軼篇獨舉。奕奕華稱。滌蘭湛處。韞綬楚邦。達於從政。禮訓誘蒙。峻刑束橫。

輕塵棲卉，奄忽其逝。惠愛莫忘，微言孰嗣。靡不軫懷，伊人云遙。零露沾裳，宿草已凋。貢詞累善，表之瓊闕。谷賈陵遷，英颯爰發。

萬善花室文稿卷七

龍母廟碑

夫道拆八極。智幙六合。燭遠照微。撫雲霓而應樞者。圓首之聖也。籥氣元冥。超象儵忽。處味融鑿。弼泰鴻而司契者。真宅之精也。若夫質毗於陽。德毗於陰。雲緹霧驟。鬼出電入。遐棲昆命。上躔蒼昊。約巨而張。纖穴幽而驚明。彌綸六虛之表。常羊九淵之圍。神化而不可測者。其惟應龍之靈乎。蓋其吐漱蒼澍。卷舒江河。時動則澤普。體潛則壤奠。延福祉於輿萌。昭禎瑞於康時。是以欽響薦潔。比於縣沈之典。祠官序秩。冠於嶽瀆之尊。宮楹嚴闕。瑄牲駢闐。兆庶奉其明馨。羣方畏其盼蠶。辰耀所主。莫與京矣。龍母之廟。見於載記者。皆在唐宋間。昔李衛公夜游。借宿華宅。有媪語之曰。此龍宮也。二子行雨未歸。天符遽下。倩其代役。是知羽嘉之精爽。擬乎列真。端溪之遺迹。同於華渚。哀牢神姬。育翠鱗之九男。張氏仙媛。孕元雲之三嗣。金臺石室。豈獨瑤妃。玉斗璇璣。不殊李姥。掌水府之錄。含太一之英。歷禩所崇。慈祐丕著。沁水之濱。舊有祠舍。未詳始建之年。椽欂雖敝。蘋蘩非匱。黃陵之祀。尙摩季漢之銘。赭山之麓。時肅湘君之駕。其地當武陟縣之城北。相隅重隄。道光三年季夏。虐霖不戢。洪濤驟漾。洧涌衝激。壁立十尋。防岸傾弛。牆危一堵。闔閭竚遷於蛟室。民人相驚以魚服。知縣大興王君榮陞。去蓋襍裳。陟牖湮遏。禱禁請命。靡神不舉。土豚之用。旣竭。車牛之享。莫應。狂波彌厲。陰黷翳空。耆士有言。龍母之靈者。君乃絕流而濟。涓幣告虔。乞仁宥之。

宏拯下土之汨。踴視始竟。退視急湍。竹樾方下。回泐已安。長菱徐引。填淤自見。似萬騎之疾驅。注尾閭而不復。逝川恬若。黔黎懽踊。咸謂明神之庇。迅於激矢。令尹之誠。格於幽祇也。君感囑靈覆。亟謀仰奮。非營飾巍峩之宇。曷足昭敬事之衷。與主簿福山王君文緒。邑士趙大年等。同舉羸羨。集材庀工。芝栴煥於堂。桂閣蔽於寢。庭以隆敞。爲華殿。以靚深。爲美銑。瓦櫺比。綺綴糾紛。因胥徒之駿奔。督斤臬之速究。遂於某月。考此邃宮。清颿入戶。如聞帝女之笙。彩霞映檐。當進陽侯之舞。五色之雲。駢允莅。九真之容。衛森然。儵鉢肱沙。是云息壤。元鶴應節。乃集廊門。共將事於芬燎。爰報功於薰酌。旣歆旣隲。以奠以熙。穰穰來祐。卽黃庭司命之居。浩浩馴流。過天姥神峯之下。豈如瓠子河津。惟聞噴沫。交州舟激。但識潛靈而已哉。盛烈聿彰。穹文未泐。履錢游寄三川。行逾六稔。河伯下林。未扣懸藤之韻。嵩高廟貌。應知鬻畚之人。見夫溷淥之波。不揚黍禾之植。滋茂實聞嘉祝。俱賴神庥。是用輯黎元之頌聲。銘麗牲之貞石。宮亭舟側。繼雅詠於曹毗。龍川碑成。慚飛毫於宗懷。辭曰。

神庥穆懿。德叶乾陽。溟濛毓化。膠葛舒光。俯鑒於下。捍患召祥。粵有舊時。面沁之防。稽彼沁流。導自陘谷。乘崖傾瀾。捷若飛瀑。協洽秋淫。襄陵決麓。爭嚙危隄。砰訇危蹙。王尊爲政。閩惠拊循。不沒三版。鷗立川根。側念災眚。責躬籲神。乃荷廣幃。驅束介鱗。喻納我生。登於漸洳。蔚蔚疆圻。耄警稚愉。曷云酬功。雲旒鳥旛。曷以致之。靈宅其茶。開陽木飛。班倕巧構。工以心競。力因懽懽。脩稅翔鸞。繁燎炫繡。鈿砌光凝。珠屏影糝。鷗脾桓胡。禺強葺收。左幢右簡。鏘珮鳴璆。玉女啓扉。羽童拂箒。朝濛蘋霧。宵肅青颿。碧舂丹籟。蕭芳四舉。

坎坎蹲踞。晉歌且舞。精忱不忒。懷濡恩怙。巫歛致辭。惟神假汝。游波寬緩。鏡清砥安。歲用順成。稽民樂駢。春漪栴闕。日耀松楊。瞻此福庭。以永億年。

周筇雲墓表

君諱爲漢。字心渠。筇雲其自號也。浙江浦江縣人。清第播華。逸蹤裕範。諱考能珂。甘肅山丹縣知縣。野王著高妙之行。鍾離勤隱親之惠。君爲山丹公次子。粹質軼乎璠璵。慧心發乎碧辯。舞雞燭智。夢鳥探胸。學不再問。敏逾任嘏。文若宿構。羣疑范雲。長而曠度益欲。研思罔懈。勁築蹈而表銳。造密酪而含辛。郭亮動聲。則宮商俱暢。王筠涉筆。則孔翠羣翔。喆兄鑑湖刺史。亦以瓌璋博達。早騰令譽。分鑲藝林。炫彩錦肆。辨神韻於鬢鬢。質經業於黷珪。雖雙驥之稱。一時並重。而君尤能精究七略。貫綜百氏。激驚驚芬。英絕領袖。鑑湖亦自謂弗逮也。於是投斧得古。負輅邁往。入槐市而覓舉。宜竹箭之見珍。洛水宴集之賢。太學聲華之彥。莫不定交杵。曰。清論篋瓢。符彩映座。則意氣如雲。奇句懾人。則頭尾擊地。其時無錫楊蓉裳先生。方領農曹。獨雄詞坵。而途甯張侍御。問陶陽湖劉編修。嗣綰桐鄉蔡儀部。鑾揚甘泉汪水部。全德諸君。爭吐洪輝。各標麗象。君頡頏其間。機杼自異。咸推文猛。或畏儒臯。龍門旣登。元禮爲之撫掌。蛾陵坐對。次都洽其高情。由是盛烈愈揚。翕羽日廣。而君砥厲之志。亦益顯密。期埒美於前修。雖銑肝而不悔矣。無如絕塵之步。不能登丹梯之杳。貫月之槎。不能越鴻溝之限。溫卷屢投。屈聲徒振。百中爭能。歎學術之終悞。一第息子。令結轡以寡歡。入粟授官。爲邑主簿。乖其本懷。終不謁選。費郎之號。無愧文園。斗食之吏。難羈僧孺。

繼而遭山丹公憂。衡陽之橘林未植。成都之遺桑已枯。季彥隨兄。守遺令而不返。管生奉母。卜新壠而僑居。遂乃賃廡長安。載旒渭涘。掬土營馬鬣之封。支牀見雞骨之毀。直杖尙陳。蓼莪更廢。稱叔鸞之死孝。感杜棲之噩夢。雖庭下翔鳩。不無靈契。而水中遇蛭。已有隱癥。加以下殤頻告。傳金瓠之哀辭。倚戶微吟。發錦瑟之清怨。幾至歲聞薤露。門列松楸。肺附之親。凋亡殆盡。含酸弔影。積瘁抽心。憂能傷人。宜孝章之不永也。鑑湖宦游桂管。遣書相迓。壬申之秋。辭醫就道。停驂武昌。氣疾增劇。方伯素訥公。雅重君才。躬延伯休之車。手量真長之藥。沈縣轉篤。遂至不掛。年尙促於公明。位未登於少府。旣膺多難。復愴游魂。天道之酷。乃至是乎。君性耽奇思。晚益苦吟。詩文之境。造詣日深。凡骨盡捐。異藻獨豔。鴻黃竊邃之韻。葩華萍布之色。長卿之賦。來非人間。昌谷之辭。加以精理。洵足睥睨時雋。撒腋唐賢。其所自訂者。有枕善齋集八卷。旣卒之後。鑑湖專志搜輯。又得八卷。散佚尙多。存者已足不朽矣。真冷之誠。願侍新阡。鑑湖哀之。護其單槥。以嘉慶二十年某月葬於長安縣塔坡里。計君畢生命多踣隻。文人之厄。幾遺其全。惟有俊昆爲之曲蔭。生則愛無分形。沒則補其遺緒。馬況晚成之論。足慰牢愁。王微告靈之書。或消幽憤。此則君之幸也。履籤與君同侍宦於汧隴之區。並執贄於宏農之館。名齒後先。臭味親洽。時方總角。未及盟心。後客燕都。遽聞君訃。素交設位。余爲奠章。舉觴高誦。相向失聲。今越十年。而鑑湖又屬校其全集。且乞表君之隧。昔日黃童之譽。竟爲後世之相知。此時元右之文。敢附生年之死友。庶使宿草不萎。流泉應節。飄零溫尉。猶懷詞客之靈。慷慨陸機。獨弔中郎之墓。

董大令敏善黎陽城守記

夫鉛刀可以削物。而欲刺犀兕者。必求純鈎湛盧之鏗。襜褕可以飾躬。而欲禦霜颯者。必擇渠搜貂麕之裘。故車奔則精馭者顯其技。波迅則善楫者任其勞。士有蘊奇抱略。而蹈順守常。則無以異於貌執之流。難辭夫蕭杙之稱。及其處艱危。臨猝變。建一策以定羣疑。伸獨智以理衆劇。嶷然不惑。績用有成。然後知翰翮之用。固不同於腹背之毛也。董君諱如。承蔭清懿。受質篤邃。因心則朗。觀物斯融。千尺之松。長輿擅其磊砢。八音之瑟。彥先發其鏘和。衡宇窮經。久滯東溟之翼。儒生感遇。徒聞北門之歎。歌汝墳而解帶。襲緇衣而受牒。遂以投名銓府。署職佐僚。以嘉慶十七年。任河南濬縣丞事。王績樽壘。方傳逸韻。崔倕鋸刃。咸識精良。濬邑卽古黎陽之地。鄰於滑臺。莅澶相之津。扼恆衛之要。實爲巖邑。故唐於此置府兵焉。世運久康。殷阜是著。癸酉季秋。滑匪猖逆。爰肆凶虐。戕厥長吏。負嵎旣成。遂擾鄰境。時惟亂生於俄頃。禍倚於肘腋。未謀外援。先懼內訌。而邑令朱君。素有羸疾。至是尤劇。士庶惶然。靡所竢命。君乃奮激自厲。申誠衆志。稽錄少健。捕索醜類。乘樓堞以呼警。授干櫓以誓言。削棘爲矛。裂帷作幟。令嚴則萬喙毋嘩。望伺則四陬相應。賊攻圍日亟。鋒銳悉至。東踞大伾。南蔽浮邱。睽陽俯瞰。鬢鬢爭嚙。君圍眎拊循。自晝徹晦。闔石積於墉間。瓶甌隱於窵下。燕雉尾之炬。禦兕革之輪。糗芻盡而丸泥。樵蘇竭而撤屋。又復草檄告危。割裳示信。手揮百楮。口授十人。赤白之囊。懸於飛矢。青墨之綬。紉於相衣。是以義堅鎧冑。心固磐石。守不闕於十地。時已越於五旬。然後貔虎邁進。豺獍駭奔。黔首有更甦之慶。郭郭無易市之嗟。然而君之支睫以應機。

忘餐以趨事者。亦岌岌乎殆且困矣。夫狂渠羣煽。自背轉覆。奮當車之力。膏蕭斧之誅。天吏聲罪。大慙殄亡。固知蜂螫之毒。適足隕身。蟻附之徒。豈能兆亂。然非近隘其吭。久羈其踵。使得逞跳踉之性。恣吞噬之雄。則薦食漸多。燎原難撲。必且延歲月之命。緩獮薙之功。況乎孤城巖壑。已成累卵之形。萬靈喁喁。繫於葦苕之上。候奄不夙戒。池隍不暇整。君以孱躬。居乎下位。而能從容審畫。擿伏定傾。拯倒懸之急。挫方張之焰。負楯習勇。欲噬孝長。登樓清嘯。何慚越石。至誠可格。聞耿恭之穿泉。猛氣莫摧。見老鰲之當道。論勳太常。復何愧乎。會有齟齬之者。君遂謙抑弗居。但以率厲之方。歸於邑令。朱君獲晉五品銜。而君仍守其故秩。妒善同於買首。訥言恥於雄成。久之大府知其功能。乃遷爲中牟令。世情旣薄。自明謝覽之操。軍事未嫻。人知嚴峻之讓。今且政成簡惠。績茂浚防。雙幡繪其飛熊。四野翔夫馴翟。比戶薦神君之頌。當寧知健令之名。斯則通方之器。不可以一隅閔。廉劇之類。自可以及鋒試也。余與君有通家之誼。申之以婚媾。而轍迹間阻。聞休烈而未詳。友人吳君碩甫。爲誦顛委。且以君意。乞余爲文記之。此固青簡之所當采。銀管之所爭述也。雖文無孟堅之贍。而事有史公之覈。謹附載筆。以播駿猷。

鄧漢中德政錄跋

夫陽和布氣。大美無言。循良受職。羣生自育。蓋其軼迹標舉。禮意敦龐。委以連城。令如流水。昔馬遷所載。始列鄭僑。至於後史。未嘗乏紀。然而治道漸移。取效日淺。比之古人流風。亦少衰矣。若卓魯之悃款。延史之恩結。衰衣章甫。實頌神君。元酒甘瓠。謨於耆老。則千載誰嗣之歎。豈竟寥闕亡聲哉。浮梁鄧箕山先生。

膺山甫之德。資游夏之藝。芬藻夙彰。脩能內茂。初登鄉舉。繼擢鼎科。釋褐蜀中。改官關石。以洵陽縣知縣。再遷爲漢中府知府。凡在官四十餘載。歷五邑一州二府。其致治也。撤鉤鉅於堂階。振綱領於次舍。肅秋霜於叢棘。煦冬日於枯茨。採輿人之謗謠。通上理以宣化。故能察篤天隱。布濩閭澤。原有讓畔。民無詭訟。皮弁俎豆。遵延壽之教。含哺鼓腹。喜岑君之來。又復敦稼課桑。連泉蓄水。芍陂之下。初見金犁。沈菜之堰。已開石洫。井竿安而業興。文雅習而俗厚。所施之政。百年而不敝。既往之思。一日而不忘。誠曠世之良師。佐化之醇牧也。嘉慶二十有二年。吏民追述功德。請祠名宦。大吏以聞於朝。天子嘉允。時距公之卒。已若干年。遺愛猶傳。褒崇始大。登配庠序。茲賁寵榮。浚儀圖畫。爭仰陸雲。桐鄉奉嘗。獨尊朱邑。子香留題於江介。欒公立社於燕齊。不朽之隆。光於前烈。公之子菽原太守。輯吏民籲請之文。暨德政之條。爲崇祀名宦祠錄一卷。以示命記。其後某侍宦秦川。北游汧隴。慕田叔之餘風。識文翁之學校。扶風長者。爲言芟舍之棠。杜陵男子。泣聽統如之鼓。涇流一石。雲霄相隨。渭水千尋。玉漿可飲。每欲撰講德之論。頌樊惠之渠。自愧小文。莫宣景行。獲徵斯錄。信播徽猷。河南令牒。卽泐韓仁之銘。豫章功狀。遂刊韋丹之碣。庶使馨香可達。亦以勸夫來哲也。

莫愁湖秋泛圖記

袁丈蘭邨。玉液漱胷。仙心納韻。爲林下之儔。嗣得正始之令音。領袖後來。頡頏先達。登龍之彥。爭測交於元方。窺豹之郎。豈遠慙於奉倩。一時題襟勝侶。薦塵名賢。冰雪滿神。林皋把臂。東軒靜寄。同撫春醪。南籬

舊約適逢花信。娛賓之賦初就。折菱之坐既陳。乃復撫麗景。臨素流。駘蕩古歡。徐迴綺迹。呼雀舫之三尺。挈鶴觴之百提。莫愁湖者。地鄰煙月之都。天入水雲之夢。珠紈似月。桃葉誰來。金粉當年。蕩花能記。當夫紺鯉揚幡。明鴛戩翼。訪江楓之未落。見岸蓑之方疎。粼粼碧浪。善借秋心。渺渺素谿。難招美子。錦帆半漾。桂檝雙披。縠細波平。橈圓蘋破。淡煙作障。空翠繞裾。涉目乍遠。乎浮埃。素心遠軼乎天際。爽籟驚其酒抱。晴霞滌其詩腸。交甫之珮。戛衣香而暗搖。洛生之詠。與權謳而競發。斷續相和。低昂自怡。攀荷則如鏡如梁。扣舷則非琴非筑。座飛玉笋。疑墮溟濛。客吹洞簫。若聞太息。跋烏未隱。織阿已升。文禽矚人。老魚留我。過釣徒之館。曲港三叉。鳴菱女之榔。畫橋一桁。於是擘筒選律。刻羽移情。各賦金荃。爭諧瓊管。綠篔青笠。斷句惺忪。碧樹紅牆。新聲窈眇。石城之側。訝璇宮之降真。蘿渚之中。留角巾之餘韻。南國詞場。共傳逸事。中吳妙士。爲吮脩毫。蓋秋泛圖。成於嘉慶丁卯之歲。於今二十載矣。夫賞心所寄。偶領晤於山川。古人有言。亦流連於魚鳥。煙雲閱瞬。陳迹都非。金石不流。游蹤安繫。秋水蒹葭之暮。半屬黃墟。芳洲杜若之吟。全消青鬢。倘使微波可託。定許通辭。卽令極浦忘歸。孰能懷寤。蘭丈之視斯圖也。亦將感盛游之難繼。念曠覽之易暎。湖光滿幃。悄焉憶舊之銘。絮影裁箋。聊作思歸之引。翛然神往。其在斯乎。履篋放志。煙波嘔心。筵譜惜水仙之艇子。未著雲卿。指洛浦之同舟。曾師元禮。謂楊蓉裳夫子淒涼絲竹。愴逾十年。翫咏琴樽。交親一脈。飄流社燕。聽黃蘆苦竹之歌。蕭瑟秋蟲。賡紫陌花鈿之韻。千里欲尋鷗夢。應認盧家。一編重印鴻泥。簪懷德祖。謂疏同深棖觸。追溯蒼茫。猥屬蕪文。述茲雅契。問丹邱之弟子。可識木蘭吟客之魂。招白紵之詞。

人好補紅豆相思之曲。

鶴樓雅集圖記

夫層櫺飛榦之聳。必臨乎鴻濤永川之側。古人所謂左江右湖。其樂無有也。漸於沱。厲於漢。達於沅湘。邇於彭蠡。吳楚之濱。樓觀之美。足以靚遁仙。廓幽抱者。殆以十計。而黃鶴樓爲最雄。蓋其竦眺鄂渚。擡影河首。俯溢流之壯。揖大別之隆。萬檣編貝。億瓦萃鱗。煙雲譎麗。卉樹隱秀。靈湖吐納於其隈。名都駢羅於其際。懽悅變遷。睫不給曠。若夫松棟凝嵐。芝栴疊彩。霞棲窈杪。星承欄乳。絢翠璘緌。髣髴彤炫。爍纒以陽馬之繁。夏以相烏之巧。倚碧落之倒景。似赤城之建標。巖崿博敞。莫能方物。載稽圖經。謂昔有列真。羽騎來翔。然則閩風縣圃之賓。將以此爲別館也。至於崔顥一吟。太白激賞。而風流觴咏之勝。又並萃於斯樓矣。同年友張君寄琴。抗志靈表。播穎辭宗。雅韻邁於濠梁。襟期蘊夫山岳。九疑之露。濡其柔毫。七澤之瀾。激其異藻。元度高情。自有濟勝之具。敬宏朋侶。喜爲人外之游。嘗以秋日。客於武昌。清籟旣永。羈思轉深。乃散帶杖策。提箏命爵。招引僑蹤。徜徉步履。爰躋於鶴樓之巔。慰虛矚遙。暢睇四極。芳醴酬答。朗詠噓呼。舉酬不盡。振哀起舞。釀酒東望。以弔禰生。企南樓之故墟。懷庾公之逸興。指烏林之戍。眺雞翅之峰。綺翰凌雲。玉屑如雨。洪崖浮邱。中坐相間。巴人郢客。仰瞻而訝。或疑夫跨鶴之賓。踰千載而來歸也。矚靈非促。景物不殊。而時與遇遷。欣與感續。迨南皮盛游。已爲陳迹。北服擁旄。徒存遐想。蠶渣之中。塊然靜處。迴思京臺之樂。漳渠之會。契闊琴樽。何嘗不眷。漆園云。造適不及。笑正以言。夫情之易憤。而適之難忘也。今寄琴結

綬清途。服鬲塵鞅。征佞偃側。容頭過身。豈復以羣屐駘蕩之歡。林阜自得之趣哉。余有驚磨之性。而就檻猿之餌。解蘭縛纓。夙願斯遠。且荆漢之邦。五涉其浹。登臨嘯歌。怒焉如昨。與寄琴今昔之軌。可謂同矣。江上愁心。白雲天渺。展卷晤對。百慮欲捐。目存乎尺素之內。神超乎九垓之外。旣蠻蜉以無薄。聊援筆而記之。

趙甌北先生重赴鹿鳴圖序

蓋聞秀翹振穎。枯菀殊時。勁楚闕芳。榮悴一致。何則。陽彩陰條。有偏植之氣。春華秋實。無錯美之英。故士之握奇標譽。詮藝昭能。莫不歸發軌於星衢。望駢迹於雲漢。而或荆璞不剖。郢歌莫揚。韋布棲躬。窮經終老。者有之矣。至於策名青瑣之上。結綬金馬之庭。披翼瀛翰。跨衆陵匹。則又感軒輕於青途。角遲迅於敷歷。汨其心志。擾擾華簪。損其歲年。瑁瑁飛蓋。有以位不副德。才不逮時。俯仰興嗟。薄暮太息。乃思夫拔軼彤闈。掉鞅文畹。譬之假道。視若浮雲。然後知上第之階。游升而已渺。達尊之表。異數所獨鍾也。甌北先生契霧消緯。降綜鴻符。吐論含毫。天下比之鐘瑄。辭宗學府。衣冠以爲領袖。蓋自綺齡而推甲觀。皓髮而守元經。侍從承明之廬。雍容建禮之闕。入則銓衡俊雅。出則膏化林蒸。架學寰區。飛才甸域。日車之首。乃有武功斗壁之陽。聿聞詩教。慕疏氏拂衣之志。歸蔣生荒徑之居。仰屋纂勤。閉關養素。千里之外。傾望重其晨星。卅年之中。閭鄙尊爲祭酒。維時昌寓醲和。環瀛介福。蒲輪錫采。芝檢徵賢。戶闕稽古之榮。野多王澤之壽。霓旌則寵答幽者。鳩玉則惠殊前彥。惟先生以乾隆庚午之歲。薦於鄉。至嘉慶十五年。而紀洽敦牂。

運隆選士。於是。有重宴鹿鳴之盛舉焉。天子乃垂咨名耆。恩禮儒臣。車服顯庸。饗幣增秩。時則蕊榜鸞開。青袍鵠立。主司遜席。修後進之儀。羣士陳賤。獻靈光之頌。簪花非故。如酬絳縣之年。棘壘猶新。疑見令威之化。不特昇平之僅事。抑亦曠古之煒談也。雖使史宓著筆。已屬創聞。儒生徵典。莫踵前烈。此豈持羔雁之技者。詔片玉於崑山。款閭闔之門者。矜看花於日下。所能媿影。不啻望塵。先生賦紀事詩四章。海內詩人爭屬和之。公子廷俊復繪以圖。而列諸作於後。丁丑之夏。余與先生之孫孝廉申嘉。晤於京師。命系之以序。余以居連芳社。道景高山。根矩游學。反遠通德之鄉。文舉成童。已愴典型之遠。飫聆盛美。敢廢揄揚。爰陳希世之麻。可襄志乘之闕。雲垂蓬島。拂巾帶以如遙。日掩箕躔。合笙歌而不復。竟陵先賢之象。丹采依然。襄陽耆舊之篇。風流誰嗣。述斯榮遇。益感前修矣。

孫母倪孺人墓誌銘

會稽孫氏之節母曰倪孺人。襲馥蕙林。承華若秀。誦德象於女師。積淑問於素雅。四典萃躬。三顧成禮。始笄之歲。歸於孫君。貽謀璨珠玉之和。勤紘緼之度。尊鍾美其矩範。威姑悅其影響。綢直如髮。似儀君子。端操有蹤。聞於嫺嫺。鬢髻可截。資樂羊之游學。莞葭爲蓋。娛萊子之高情。婉孌之譽。罔弗宜焉。甫迨七稔。遽丁幽酷。傷芣苢之難療。夢鳩鵲以遘屯。王融之命不延。衛玠之才易折。孺人誓殉泉塗。身薦棺椁。粉書染扉。靡筭在手。而衰翁無馨膳之人。藐孤有抱纒之命。尊幼泣請。嬰然憬悟。乃體逝者之志。任家督之責。作誄而覆布被。搢膺而束蒿簪。於是奉匱以上堂。撤瑱以守閩。織屨以佐餐。斷蓼以誨學。虔魚菽於松牖。壓

茶蓼於黍室。司晨驚其鳴。杼鷓旦迓其懿。篋嚮子之閔。御窮之瘁。憂勤艱脆。貞專精純。積而愈崇。艾而勿弛。蓋其率禮奉終。劬心植稗。性峻於秋霜之潔。惠煦於春陽之和。夙夜黽勉。逾三十年。而後葦苕之祚。固於磐石。破巢之毀。成其豐羽。令子有見。而賢優論交。諸孫競爽。而簪裾益茂。特詔行表閭之典。邑長修致。膳之敬。孺人之克常。厥德再造其家。足以掩丹穴懷清之名。續黃鵠悲歌之韻。詩有之曰。未堪家多難。予又集于蓼。孺人膺之矣。卒於嘉慶十年十月三日。年七十有四。越五年。窆於邑某鄉西河潭之源。明年又卜吉壤。乃遷葬於徐家山麓。子延臣等。申慕罔極。欲報靡從。繭胝經歲。始奠幽居。乃復引乞言之義。揚懿行之煒。故海內賢士大夫。多詠歌會稽孫節母之德善也。惟貞石之藏。誌詞猶闕。聿欽風烈。乃爲之銘。銘曰。

剡江之濱。爰毓獻臣。卓哉倪公。執節丕純。郡有价宗。貞媛資耀。後先百祀。匡植名教。沈翳集叢。憺悽永痾。若燎在原。不蒸寒灰。昔爲女蘿。今爲喬松。葛藟是繫。憂心忡忡。口瘖手庸。仰飭俯哺。耆終有歸。裸息以樹。母躬則槁。母德克彰。煜煜綽楔。爲邦家光。桓齎行義。厥宗乃熾。誠敬勿渝。孝思不匱。載譔載誄。播於管絃。繡黼旣詠。彤史是編。我聞古人。圖畫石室。斯儀可象。衆媿咸述。幽笈之銘。文如銑瑤。壺彝負越。匪此曷昭。

潼陽唱和詩序

嘗聞夔牙之宏響。振北里而不舒。雅頌之微言。歌南風而亦競。比室蘭蕙。紉衣自馨。蓋山絃歌。夏泉赴節。是以君子。悵索居之眇歎。幸交功之有答。則唱子和汝。爲敬業之誦。我馘子佩。昭同聲之諧。至於憔悴江

潭。蕭條羈旅。青樽十日。遠夢稜稜。紅雁一叢。天涯落落。時與境其屢遷。才因緒而迭攬。是則倘無辭製。夙契曷伸。不假陳箋。奇懷易破。若吾友劉子鶴。蒼丹篆晨吞彩筆。夕授戴憑奪席。羣推經師。匡鼎登筵。獨析名理。簪佩寓於清才。要腹副其雅範。錢也。卅歲遊冀。投紵識君。入仲弓之座。每獲端人。慕叔子之誠。載敦友誼。而君亦惠我暇日。舊轍頻過。清交若雲。解筌獨密。因出其潼陽唱和詩一卷。蓋皆客中勝侶贈答之章也。班生之著作。玳瑁爲裝。謝氏之詠歌。芙蓉比麗。南金東箭。芬藻爭舒。雪白蘭薰。質輝相亞。英軌所至。篋有芳風。德星下翔。墨橫奇彩。可謂極文讌之留連。擅騷壇之俊逸者矣。百縑欲市。心賞斯圖。千里可循。神往其地。聆高尚之旣深。感卅離之將久。乃爲序之。以爲展軸之弁言。抗手而道故云爾。

爲金近園與朝鮮駙馬洪約軒書

約軒足下。頃在吾友胡君素亭齋中。獲觀名翰。卽稔足下珪璋之望。久蔚國華。金蘭之思。遠敦交禮。一再披覽。歆慕以深。及與貴邦才士許君澹岩。班荆論益。投袂賞心。每爲僕言先生之風。瓌筆徵其光彩。僂骨擅其風流。雁山之北。明月褰懷。螭海以東。卿雲在珮。平陽第廣。陳百筥之瓊籤。沁水園開。居三徑之珠履。僕中原綴學。弱歲披襟。欲挹清暉。每思譎劣。而貴邦李君絳茶。尹君玉壺。辱修遙契。時錫惠章。雖無一晤之期。已切三生之誼。因思僕與先生。幸同聖世。又沐懿芳。獨不可先折訊以通耶。且有澹岩素亭彼此之合。亦不可謂無介而求也。古之人士。見必以贊。以書代面。敢無所先。敬呈某物。奉邀雅塵。幸賜寵存。不宣。

爲金近園答朝鮮進士尹玉壺書

尹公足下。遐陬旣阻。虛眷末由。迴念羽儀。徒勝勞佇。扶桑之浴。里鼓異於交州。天漢之墟。軫石同於壺領。比維東陸日遲。青陽風解。君子多福。攝衛維宜。祐德在躬。與時納豫。滄洲星露。交冠冕之青峯。環嶼山河。動文章之華簡。孟公擅譽。坐上驚人。鄭莊豪情。花間置驛。翹企之願。不任所懷。某材廁凡猥之流。生幸皞熙之世。昔年洛下。曾賦停雲。四方交遊。惠我遐日。得以觀覽軌躅之盛。優遊文史之場。今歲東國。王人獻琛。復以傾蓋。獲摺名賢。與許君叶契筌蹄。投分蘭蕙。逾旬之中。凡得三晤。而許君於行篋。出先生惠書。及投贈瓊物。迺知下士之名。久列籤記。中州之遙。辱蒙存注。瑤璧奮彩。不遺砒砢。駿驥馳空。迴顧駑蹇。筆端逸氣。攬雲霞而有聲。墨左芳情。蜚風雨而無節。蒲桃一石。偕來塞雁之書。玳瑁千箱。驚瞬雕蟲之座。昔季札結紵於鄭僑。徐陵答交於李那。自古文人。無間遐域。至如眷戀虛譽。吹噓蓬姿。未煩介通。驟達重貺。若先生之於僕者。可謂罕矣。八垓九埏之廣。百城重驛之杳。白雲在天。畢生謝其讎好。青鳥入室。芳信苦於遲回。心乎愛矣。我勞如何。敬因許君。爰復雅信。爾音金玉。猶希贈鯉之函。嗟我懷人。彌切鳴鳶之頌。書不罄懷。但問爰繫。

代胡素亭謝朝鮮進士方暉齋惠藥啓

某謹謝東使來。辱惠良藥一裹。桐君山下。芳草棲人。玉版函中。青精餽客。探葛洪之肘繫。遠療朋遊。得孫氏之禁方。勤貽痼疾。況北國醍醐。親傳博學。東醫寶鑑。久泐奇書。金液研精。明珠恥價。僕才慙文園。幸非消渴。愁同公幹。遂臥漳濱。每嗟丹竈之藏。莫問青囊之祕。今喜百丸入座。春浮二月之花。九候調爐。雲鎖

三年之艾。夙疾盡解。慈母愛而舒顏。新術如神。弱弟驚而起舞。握謝無期。感言莫罄。

袁蘭村誄詞并序

維道光九年二月。河內縣知縣袁丈蘭村。以疾卒於開封。至七月。方履錢始聞其訃。驚咋悲怛。乃於中元之辰。設位而哭。謹陳冽醑。瓜脯之奠。侑之以文。其詞曰。

九乾靈祕。有穎有純。君撮其標。爲世俊人。林下哲嗣。夙播令聞。朱霞白鶴。軒軒出羣。賈山逸才。涉獵自喜。嚼徵含商。詞珍洛紙。五版舒雲。百函散綺。噓枯吹生。擘肌分理。機警有鋒。啖啗流速。符彩所映。士流驚矚。縱情任達。自忘檢束。孝友肫行。實勤且篤。飲傾巨川。聲若迅雷。終朝溫克。玉山不頹。片言折獄。飛翰逞才。稟茲偉異。世孰與儕。野王名邑。臨以慈惠。脂膏難潤。謠詠爰萃。豈期雅德。遭屯中歲。縣縣委運。遽言永逝。我遊覃懷。律應敦牂。彼有寓公。實惟侍郎。我方託迹。坐啓鱣堂。令君始至。循譽丕揚。劉尹襄帷。頻造元度。酬言送難。脫落羣務。各珍氣類。若披雲霧。託心一旦。堅於歲暮。君考圖經。惜其舛訛。授簡小生。史籍是羅。二秋卒業。益少哀多。上達誦訓。下賁絃歌。我謀遠行。君增遐眷。橐筆安昌。亦君之願。馳逐傳車。馬瘖僕怨。時月相依。有如折券。君性英邁。嗜吝怒頑。謔誚所加。膚骨可剗。我鈍而樸。轉免譏彈。愿辭屢諍。抵掌解顏。敝予改爲。緇衣是咏。君之於我。百縑疊贈。惠而勿驕。久益生敬。愛尙文義。商摧官政。維昔之夏。我宦來閩。割俸治裝。君意尤勤。舉觴相勸。醉涕濡巾。豈知今別。幽顯遂分。尺訊未復。離思未除。宵省北鴻。乃傳憚書。琴牀何處。旒帛皆虛。欲聞晚遂。併無酒壚。沈鬱生平。知己實鮮。懷施欲報。衷情猶淺。遽隔重泉。辜此睇眄。

搢膺摧哀。畢生難遣。清魂曠朗。當念素交。克嚮其誠。千里匪遙。浮以甘瓜。酌以醇醪。丹淚盈掬。以染靈輿。哀哉。

宮保尙書制府孫公錫壽恩榮記

聖朝膺籙百九十載。築園粲晏。植蠅熙洽。瓊暉璣連。鏡曜砥平。歲旅乎重光。覃安恭值。皇上五旬萬壽之辰。泰祉萃於黼辰。福嘏溶於瑤階。羣生跂踵。臚歡香瑞。黃輿紫海。咸騰厥華。皇上守盅持約。屏繁崇質。抑慶典而勿彰。啓茂科以選士。旣已酌允鑠。肴樂胥恢。欽明之美。擢秀髦之穎。乃復注嚮元臣。疇咨耆耇。喜容成之得竿。契君奭之棐忱。慶衍昌期。遐播天澤。灑宸翰以延齡。頒珍祕以曜彩。此誠一德納祐之徵。千載希覲之遇。惟我閩浙制府宮保公。實以駿烈瑰望。荷斯寵榮。於鑠哉。酬庸之上儀。可得而揚推也。蓋公秉黃中之德。承素絲之風。七世儒宗。祇服休閒。九奧藝林。刊摘沈祕。或春雲之豔藻。儲冬潭之深識。手策桃杖。而王儉傾衿。友集蘭臺。而任昉冠座。自其勁翮初奮。絕塵未舉。莫不欽爲衣被九州之才。殺駁百家之學矣。洎夫翔步丹梯。鼓鬢碧澗。煎麟草於省中。咏霓裳於天上。宣臺玉衡。定張率之名譽。奏議金馬。褻平當之通明。於是東堂會送。南郡敷猷。夢象而守雄邦。集鳳而旌異政。弱翁之治行。聞於朝廷。野王之高妙。揚於薦牘。乃晉豸使。綰筴政。歷憲府。總藩條。疊履巍階。自恢風教。僅彌十稔。遂擁八騶。天子知方岳之需賢。軫嶼民之舛望。暨移皖節。仍撫閩疆。爰命作督。以專厥成。公銘此殊遇。勵彼匪躬。除三惑以澡心。宣六陽以煦物。園槭設而度昭。鈎距撤而聰達。維瀟娑洋之外。有修羅迦之地。客仇易結。獠性難馴。昔頻扇

亂。震驚戎師。閣茂之春。復兆邊釁。公智運轉規。令嚴立表。眎滄濤如戶限。駕鯤渚以飛梁。破暝捷於迅電。振槁利於勁風。車及蒲胄。方之爲滯。兵若刺蜚。用之如神。櫓鼓沸而鯨旅樹領。霜鋒照而梟徒厥角。威聲旣暢。協氣傍流。畝有棲糧。海無鬪艦。奏三月之績。以奠百年之治。忘一身之勞。而拯萬靈之命。公之勳伐。足以泐景鐘矣。閩甌舊俗。善訐好爭。飲章日騰。推刃夙構。赤丸之探。雖密。黃沙之獄。不疎。惟公止水勵平。舉煙申枉。正足以塞羣疑。明足以摘姦伏。周邵陵之斷獄。陰察稻芒。李司隸之抉豪。親破合柱。帷裳祛蔽。而殘墨免冠。銜轡自緩。而彊橫就格。張弛和於琴瑟。意指肅於鈇鉞。卑梁之墟。遂泯爭桑之隙。臨淮之市。竟無訟絹之誣。養鸞鳳於枳林。化鳴鳧於椹實。公之戢吏導民者。莫不懷其風愛矣。然後下令於流水之源。從欲如靡草之順。班條理務。相法揆時。莆田木蘭陂之築。則如傅祇之堰沈菜也。福州小西湖之濬。則如鄧晨之興鴻卻也。更其斥鹵。報以豐穰。飯豆羹芋之謠。不聞於東作。雷雲渠雨之樂。已徧於南陔。誨以樓犁之器。飫之饘粥之傍。功越岱嵩。潤同江海。公之課績。近古所罕觀也。則又崇尚儒雅。鎔鑄俊流。旌卓適希有之才。采鴻衍驚衆之議。精廬式啓。十郡承風。縣叢整陳。萬人箬錄。容青袍之鵠立。廣開鎖廳。分白屋之朋頭。重開棘院。初副寒峻之望。復搜志乘之遺。嗟舊籍之舛疎。念誦訓之廢墜。亟加修輯。躬爲甄求。秩隆三鉉。而折節於里閭之賢。學窮七略。而倒屣於方聞之士。虛禮無待於庭燎。質疑爭趨於前席。典章備舉。幽微必昭。公之樹風聲者。至此而罔不賅矣。國家歲漕南粟。以給中都。輓粒偶虧。廩支告歉。公雖遐鎮海邦。而遠猷辰告。請運臺陽之穀。徑通析木之津。飛艗十丈。陽侯爲之鼓橈。駛浪萬尋。商鯨爲之振翼。

浹月未登。委輸咸至。天庾無闕。公之功也。夫尾閭有洩。則渤澥不能盈。垂條忽颺。則本實不能靜。公知東南之浸。易啓姦萌。寰寓之安。必消沴氣。是以焦思碩畫。宵起晨勞。孚仁澤於無垠。噓景風於有截。務使鮫戶嬉歌於珠穴。鯁人潛處於菰汀。苛慝不聞。嘉琛時獻。公之填撫一隅者。德愈醇。公之保障九服者。功尤鉅也。聖天子實知公之蓋誠。足以倚畀。公之勳業。邁於等倫。是以恩燾載賁。徽錫有加以公之深仁。久濡於南溟也。是用賜公以錫羨巖疆之額。欲公之安樂延祺也。是用賜公以御書福壽二字。諗公之澡練神明也。是用賜公以藏佛一尊。念公之器服儉素也。是用賜公以珠黻錦縠之美。喜公之博物辨名也。是用賜公以銅玉珍玩之奇。而又推錫類之恩。覃家寵之渥。特詔公次子兵部主事慧翼。奉持天誥。省覲私廷。丕顯休命。若是之懿。焜耀都邑。冠冕當世。非我公之偉德。孰克膺此而無忝哉。昔桓氏之輜車乘馬。僅傳稽古之名。顧生之塵尾素琴。乃在謁歸之日。卽晉文公珪鬯之命。王太傅几杖之頒。亦銘伐之恆經。或乞言之令典。亶若軒轡增赫於玉宇。方召戩穀於金湯。經護比節。通彙延釐。懷肇敏之戎功。賚箕疇於同德。求之青簡。爲百代未有之榮。宣於彤庭。得三壽作朋之慶。操觚者爭摛其麗藻。秉籥者各播其和音。糠粃小生。輪椎薄植。曳裾鈴閣之左。效策華輪之下。欣瞻嘉會。仰溯鴻謨。亦思展其蟲篆之能。褫其棘猴之技。援毫爲記。侑擘以陳。如咏徵招角招之章。載晉聖主賢臣之頌。所以紀熙代明良之盛。不獨爲我公誌錫極之詳也。

跋

戊寅冬。余至省垣。人嘖嘖傳有以身殉夫者。詢之爲方子謹妻。子謹年僅三十而亡。其妻趙。縊以殉。烈已。余稔知子謹與晉卿交最契。迨晤晉卿。述其事甚悉。并出其大父彥聞先生萬善花室文藁相示。時同人方輯畿輔叢書。彥聞固大興人。得之如獲拱璧。是集爲永定人士所刊。彥聞嘗爲其邑宰。政通教興。惠澤旁洽。邑之人食其德。因梓其書以寄甘棠之思。觀於此。生平之立身行政。蓋可想見矣。子謹名慳。讀書守家法。攻訓詁。專務實學。訂史志例二十餘門。能推闡其大父志例諸篇所未及。雖享年不永。而室家貞烈。增輝門祚。有文集若干卷。藏於家。亦足繼是編。並垂不朽也。光緒七年仲春月。定州王灝謹識。



編主五雲王
編初成集書叢
稿文室花善萬
冊三

中華民國二十五年六月初版

撰者 方 履 錢

發行人 王 雲 五
上海河南路

印刷所 商 務 印 書 館
上海河南路

發行所 商 務 印 書 館
上海及各埠

*D一四八三

翁



3
4
2535